

# K A N D U N G A N

<b>JAWAPAN-JAWAPAN LISAN BAGI PERTANYAAN- PERTANYAAN</b>	(Halaman 1)
<b>USUL-USUL:</b>	
Penghargaan dan Terima Kasih Kepada Yang Berhormat Tun Dr. Mahathir bin Mohamad, Ahli Parlimen Bagi Kubang Pasu	(Halaman 13)
Mengalu-alukan dan Menyokong Pelantikan dan Kepemimpinan Yang Amat Berhormat Dato' Seri Abdullah bin Haji Ahmad Badawi, Ahli Parlimen Bagi Kepala Batas Sebagai Perdana Menteri Malaysia Kelima	(Halaman 37)
Kajian Separuh Penggal Rancangan Malaysia Kelapan (2001-2005)	(Halaman 63)



**AHLI-AHLI DEWAN RAKYAT**

- Yang Amat Berbahagia Tuan Yang di-Pertua, Tun Dato Seri Dr. Mohamed Zahir bin Haji Ismail, S.S.M., P.M.N., S.S.D.K., S.P.M.K., D.S.D.K., J.M.N.
- Yang Amat Berhormat Perdana Menteri dan Menteri Kewangan, Dato' Seri Abdullah bin Haji Ahmad Badawi, D.G.P.N., D.S.S.A., D.M.P.N., D.J.N., K.M.N., A.M.N., S.P.M.S. (Kepala Batas)
- Yang Berhormat Menteri Perumahan dan Kerajaan Tempatan, Dato' Seri Ong Ka Ting, D.P.M.P. (Pontian)
- " Menteri Kerja Raya, Dato' Seri S. Samy Vellu, S.P.M.J., S.P.M.P., D.P.M.S., P.C.M., A.M.N. (Sungai Siput)
- " Menteri Perusahaan Utama, Dato' Seri Dr. Lim Keng Yaik, S.P.M.P., D.G.P.N., D.P.C.M. (Beruas)
- " Menteri Tenaga, Komunikasi dan Multimedia, Datuk Amar Leo Moggie anak Irok, D.A., P.N.B.S. (Kanowit)
- " Menteri Perdagangan Antarabangsa dan Industri, Dato' Seri Rafidah Aziz, S.P.M.P., S.P.M.T., D.P.M.S., A.M.N. (Kuala Kangsar)
- " Menteri Pertahanan, Dato' Sri Mohd. Najib bin Tun Haji Abdul Razak, S.S.A.P., S.I.M.P., D.S.A.P., D.P.M.S., P.N.B.S., D.U.B.C.(T). (Pekan)
- " Menteri Sains, Teknologi dan Alam Sekitar, Dato' Seri Law Hieng Ding, P.N.B.S., K.M.N., P.B.S., P.B.J. (Sarikei)
- " Menteri Luar Negeri, Datuk Seri Syed Hamid bin Syed Jaafar Albar, S.P.M.J., S.P.D.K., D.P.M.J., S.M.J., A.M.N. (Kota Tinggi)
- " Menteri Perdagangan Dalam Negeri dan Hal Ehwal Pengguna, Tan Sri Dato' Haji Muhyiddin bin Haji Mohd. Yassin, P.I.S., B.S.I., S.M.J., P.S.M., S.P.M.J. (Pagoh)
- " Menteri Kesihatan, Datuk Chua Jui Meng, D.I.M.P., S.I.M.P., S.M.J., P.I.S. (Bakri)
- " Menteri Perpaduan Negara dan Pembangunan Masyarakat, Datuk Seri Dr. Siti Zaharah binti Sulaiman, S.I.M.P., D.S.A.P., D.I.M.P., S.S.A.P. (Paya Besar)
- " Menteri Penerangan, Tan Sri Dato' Seri Mohd. Khalil bin Yaakob, P.S.M., S.S.A.P., S.I.M.P., D.S.A.P., J.S.M., S.M.P. (Kuantan)
- " Menteri Kebudayaan, Kesenian dan Pelancongan, Datuk Paduka Abdul Kadir bin Haji Sheikh Fadzir, P.G.D.K., D.S.D.K., A.M.K. (Kulim-Bandar Baharu)
- " Menteri Sumber Manusia, Datuk Wira Dr. Fong Chan Onn, D.M.S.M. D.C.S.M. (Selandar)
- " Menteri Pembangunan Usahawan, Dato' Seri Mohamed Nazri bin Abdul Aziz, D.M.S.M., A.M.P., B.K.T. (Chenderoh)
- " Menteri Pembangunan Luar Bandar, Dato' Haji Azmi bin Khalid, D.P.M.P., S.M.P., P.J.K. (Padang Besar)
- " Menteri Belia dan Sukan, Dato' Hishammuddin bin Tun Hussein, D.S.A.P., D.P.M.J. (Tenggara)

- Yang Berhormat Menteri di Jabatan Perdana Menteri, Tan Sri Bernard Giluk Dompok (Kinabalu)
- “ Menteri di Jabatan Perdana Menteri, Datuk Seri Utama Dr. Rais bin Yatim, S.P.N.S., D.S.N.S. (Jelebu)
- “ Menteri Pertanian, Datuk (Dr.) Mohd Effendi Norwawi, S.I.M.P., P.G.B.K., D.P.M.S., J.S.M., J.B.S., K.M.N., P.P.B. (Kuala Rajang)
- “ Menteri Pembangunan Wanita dan Keluarga, Dato' Seri Hajah Shahrizat binti Abdul Jalil, D.G.P.N., D.I.M.P. (Lembah Pantai)
- “ Menteri Kewangan Kedua, Dato' Dr. Haji Jamaludin bin Dato' Mohd. Jarjis, S.I.M.P., D.I.M.P. (Rompin)
- “ Menteri Pengangkutan, Datuk Seri Chan Kong Choy, D.S.A.P., D.P.M.S., S.S.A.P. (Selayang)
- “ Timbalan Yang di-Pertua, Dato' Haji Muhamad bin Abdullah, P.J.N., D.I.M.P., S.M.P., P.J.K. (Maran)
- “ Timbalan Yang di-Pertua, Datuk Lim Si Cheng, P.I.S. (Senai)
- “ Timbalan Menteri Pembangunan Usahawan, Dato' Haji Mohd. Khalid bin Mohd. Yunus, D.S.N.S. (Jempol)
- “ Timbalan Menteri Luar Negeri, Datuk Dr. Leo Michael Toyad, P.G.D.K., J.B.S. (Mukah)
- “ Timbalan Menteri Kesihatan, Dato' Seri Dr. Suleiman bin Mohamed D.P.M.S., S.S.S.A. (Titiwangsa)
- “ Timbalan Menteri Perumahan dan Kerajaan Tempatan, Datuk Peter Chin Fah Kui, P.G.B.K. (Miri)
- “ Timbalan Menteri Perdagangan Antarabangsa dan Industri, Dato' Seri Kerk Choo Ting, D.P.M.P., D.G.P.N. (Taiping)
- “ Timbalan Menteri Kewangan, Dato' Dr. Ng Yen Yen, D.I.M.P., D.S.A.P. (Raub)
- “ Timbalan Menteri Perdagangan Dalam Negeri dan Hal Ehwal Pengguna, Dato' S. Subramaniam, D.P.M.J., D.S.N.S., S.M.J. (Segamat)
- “ Timbalan Menteri Pertahanan, Datuk Mohd. Shafie bin Haji Apdal, P.G.D.K., D.S.A.P. (Semporna)
- “ Timbalan Menteri Pengangkutan, Datuk Douglas Uggah Embas, P.G.B.K., P.B.S., A.B.S., A.M.N. (Betong)
- “ Timbalan Menteri Kewangan, Dato' Dr. Haji Shafie bin Haji Mohd. Salleh, D.S.S.A., S.M.S., S.S.A., K.M.N. (Kuala Langat)
- “ Timbalan Menteri Dalam Negeri, Dato' Chor Chee Heung, D.S.D.K., A.M.N., J.P. (Alor Setar)
- “ Timbalan Menteri Tenaga, Komunikasi dan Multimedia, Datuk Tan Chai Ho, P.J.N., K.M.N., A.M.N. (Bandar Tun Razak)
- “ Timbalan Menteri Pembangunan Luar Bandar, Dato' G. Palanivel, D.S.S.A., S.S.A., P.J.K. (Hulu Selangor)
- “ Timbalan Menteri Belia dan Sukan, Datuk Ong Tee Keat, P.J.N., S.M.S. (Ampang Jaya)
- “ Timbalan Menteri Pengangkutan, Tan Sri Dato' Seri DiRaja Ramli bin Ngah Talib, P.C.M., S.P.C.M., A.M.N., J.P. (Pasir Salak)

- Yang Berhormat Timbalan Menteri Pertanian, Dato' Seri Mohd. Shariff bin Haji Omar, D.G.P.N., D.M.P.N., P.P.T. (Tasek Gelugor)
- “ Timbalan Menteri Sains, Teknologi dan Alam Sekitar, Dato' Zainal bin Dahalan, P.J.K., K.M.N., J.S.M., D.P.M.S. (Sabak Bernam)
- “ Timbalan Menteri Dalam Negeri, Dato' Zainal Abidin bin Zin, D.P.M.P., P.M.P. (Bagan Serai)
- “ Mulia Timbalan Menteri di Jabatan Perdana Menteri, Tengku Dato' Seri Azlan ibni Sultan Abu Bakar, S.P.T.J., D.S.A.S. (Jerantut)
- “ Timbalan Menteri Kerja Raya, Dato' Mohamed Khaled bin Haji Nordin, D.S.P.N., P.I.S. (Johor Bahru)
- “ Timbalan Menteri Perusahaan Utama, Datuk Anifah Aman (Beaufort)
- “ Timbalan Menteri Tanah dan Pembangunan Koperasi, Dr. Tan Kee Kwong (Segambut)
- “ Timbalan Menteri Perpaduan Negara dan Pembangunan Masyarakat, Datuk Dr. Tiki anak Lafe, D.M.S.M. (Mas Gading)
- “ Timbalan Menteri Penerangan, Dato' Ir. Donald Lim Siang Chai (Petaling Jaya Selatan)
- “ Timbalan Menteri Kebudayaan, Kesenian dan Pelancongan, Datuk Fu Ah Kiow, D.I.M.P. (Mentakab)
- “ Timbalan Menteri Sumber Manusia, Datuk Dr. Abdul Latiff bin Ahmad, D.M.S.M. (Mersing)
- “ Timbalan Menteri Pendidikan, Dato' Hon Choon Kim, D.S.N.S. (Seremban)
- “ Setiausaha Parlimen Kementerian Pertanian, Dato' Abu Bakar bin Taib, D.S.D.K., S.D.K., B.C.K., K.M.N., P.J.K. (Langkawi)
- “ Setiausaha Parlimen Kementerian Dalam Negeri, Datuk Seri Abu Zahar bin Isnin, D.G.S.M., D.M.S.M., A.M.N. (Jasin)
- “ Setiausaha Parlimen di Jabatan Perdana Menteri, Dato' Hajah Khamsiyah binti Yeop, P.P.T., A.M.N., A.M.P., P.M.P. (Gerik)
- “ Setiausaha Parlimen di Jabatan Perdana Menteri, Dato' Haji Noh bin Haji Omar, D.P.M.S., D.M.S.M., K.M.N., A.S.A., P.J.K., J.P. (Tanjong Karang)
- “ Setiausaha Parlimen Kementerian Kerja Raya, Datuk Yong Khoon Seng, D.S.P.N., K.M.N. (Stampin)
- “ Setiausaha Parlimen Kementerian Kewangan, Tuan Hashim bin Ismail, P.P.N., P.I.S. (Ledang)
- “ Setiausaha Parlimen Kementerian Tenaga, Komunikasi dan Multimedia, Tuan Chia Kwang Chye (Bukit Bendera)
- “ Setiausaha Parlimen Kementerian Perdagangan Dalam Negeri dan Hal Ehwal Pengguna, Tuan Wong Kam Hoong, K.M.N. (Bayan Baru)
- “ Setiausaha Parlimen Kementerian Kesihatan, Tuan S. G. Sothinathan (Telok Kemang)
- “ Setiausaha Parlimen Kementerian Tanah dan Pembangunan Koperasi, Dr. Robia binti Dato' Kosai (Muar)

- Yang Berhormat Setiausaha Parlimen Kementerian Perpaduan Negara dan Pembangunan Masyarakat, Dato' S. Veerasingam, P.M.P., A.M.P, A.M.N. (Tajah)
- “ Setiausaha Parlimen Kementerian Penerangan, Datuk Rizalman bin Abdullah, P.G.D.K., J.P. (Tenom)
- “ Setiausaha Parlimen Kementerian Pembangunan Luar Bandar, Datin Paduka Hajah Rohani binti Haji Abdul Karim, P.B.S., P.P.B., (Santubong)
- “ Setiausaha Parlimen Kementerian Pendidikan, Dato' Mahadzir bin Mohd. Khir (Sungai Petani)
- “ Setiausaha Parlimen Kementerian Perdagangan Antarabangsa dan Industri, Dato' Ir. Ho Cheong Sing, P.M.P., A.M.N. (Ipoh Barat)
- “ Setiausaha Parlimen Kementerian Pembangunan Wanita dan Keluarga, Datuk Hajah Mastika Junaidah binti Husin (Arau)
- “ Drs. Haji Abu Bakar bin Othman (Jerlun)
- “ Tuan Haji Abdul Fatah bin Haji Haron, S.M.K. (Rantau Panjang)
- “ Tun Abdul Ghafar bin Baba, S.S.M. (Batu Berendam)
- “ Dato' Seri Haji Abdul Hadi bin Haji Awang, D.S.S.S.M.T. (Marang)
- “ Datuk Haji Abdul Hamid bin Abdul Rahman, P.J.N. (Sungai Benut)
- “ Dato' Haji Abdul Kadir bin Annuar, S.P.M.J., K.M.N., P.I.S., B.S.I., A.M.N. (Pulai)
- “ Tuan Abd. Rahman bin Yusof, (Kemaman)
- “ Tan Sri Datuk Patinggi Abdul Taib Mahmud, S.P.M.J., S.P.M.T., S.S.S.A, S.S.A.P., S.S.D.K., P.S.M., S.P.M.B., D.G.S.M., P.K.C., D.P. (Kota Samarahan)
- “ Dato' Dr. Abdullah Fadzil bin Che Wan, D.P.C.M., P.C.M. (Bukit Gantang)
- “ Datuk Wira Abu Seman bin Haji Yusop, B.K.T., J.P., D.M.S.M., K.M.N., D.C.S.M. (Alor Gajah)
- “ Dato' Haji Ahmad Husni bin Mohd. Hanadzlah, P.P.T., A.M.P. (Tambun)
- “ Datuk Ahmad Zahid bin Hamidi, D.M.S.M., P.P.T., P.J.K. (Bagan Datok)
- “ Datuk Raja Ahmad Zainuddin bin Raja Haji Omar, D.S.A.P., D.M.S.M. (Larut)
- “ Tuan Alexander Nanta Linggi, A.B.S. (Kapit)
- “ Tuan Alwi bin Jusoh (Pasir Puteh)
- “ Dato' Haji Amihamzah bin Ahmad, D.I.M.P. (Lipis)
- “ Datu Amirkahar bin Tun Datu Haji Mustapha (Marudu)
- “ Dato' Haji Badrul Hisham bin Abdul Aziz, D.P.M.S., A.S.A. (Hulu Langat)
- “ Tuan Billy Abit Joo, K.M.N. (Hulu Rajang)

- Yang Berhormat Datuk Bung Moktar bin Radin, P.G.D.K., A.D.K., A.S.D.K. (Kinabatangan)
- “ Tuan Chang See Ten, P.I.S. (Gelang Patah)
- “ Tuan Haji Che Ghani bin Che Ambak, P.J.K. (Setiu)
- “ Puan Chew Mei Fun (Petaling Jaya Utara)
- “ Puan Chong Eng (Bukit Mertajam)
- “ Tuan Chow Kon Yeow (Tanjong)
- “ Tun Dato' Daim Zainuddin, D.G.S.M., S.S.M., S.P.M.S., D.H.M.S., S.S.A.P. (Merbok)
- “ Fong Kui Lun (Bukit Bintang)
- “ Puan Fong Po Kuan (Batu Gajah)
- “ Tuan Goh Kheng Huat (Nibong Tebal)
- “ Dato Goh Siow Huat (Rasah)
- “ Dato' Dr. Hasan bin Haji Mohamed Ali, D.I.M.P., S.M.S. (Parit Buntar)
- “ Tuan Hassan bin Mohamed (Besut)
- “ Tuan Henry Sum Agong, A.K. (Bukit Mas)
- “ Tan Sri Dato' Hew See Tong, P.S.M., D.P.M.P., J.P. (Kampar)
- “ Tuan Hoo Seong Chang (Kluang)
- “ Tuan Husam bin Haji Musa (Kubang Kerian)
- “ Tuan Haji Ismail bin Noh (Pasir Mas)
- “ Dato' Jacob Dungau Sagan, J.B.S., K.M.N., P.P.B. (Baram)
- “ Dr. James Dawos Mamit, P.P.B., P.P.S. (Mambong)
- “ Tuan Jawah anak Gerang (Lubok Antu)
- “ Tuan Jimmy Lim Donald (Sri Aman)
- “ Tuan Joseph Mauh anak Ikeh (Selangau)
- “ Datuk Seri Panglima Joseph Pairin Kitingan, P.G.D.K., P.N.B.S., S.S.A.P., S.P.D.K. (Keningau)
- “ Dato' Joseph Salang anak Gandum (Julau)
- “ Datuk Juslie bin Ajirol, A.S.D.K. (Libaran)
- “ Dato' Kamarudin bin Jaffar, B.C.M., D.S.N.S. (Tumpat)
- “ Tuan Kerk Kim Hock (Kota Melaka)
- “ Tan Sri Dato' Dr. K.S. Nijhar, P.S.M., S.P.M.J., J.M.N. (Subang)
- “ Tuan Kong Cho Ha (Lumut)
- “ Datuk Lau Ngan Siew, A.D.K., K.M.N., P.G.D.K. (Sandakan)
- “ Tuan Lee Kah Choon (Jelutong)
- “ Tuan Liew Teck Chan (Gaya)
- “ Puan Lim Bee Kau, A.M.K., B.K.M., P.J.K. (Padang Serai)
- “ Tuan Lim Hock Seng (Bagan)

- Yang Berhormat Tuan Liow Tiong Lai, S.M.P. (Bentong)
- “ Dato' Loke Yuen Yow, D.P.M.P., A.M.P. (Tanjong Malim)
- ” Tuan Mah Siew Keong (Teluk Intan)
- “ Tun Dr. Mahathir bin Mohamad, D.K.(Brunei), D.K.(Perlis), D.K.(Johor), D.U.K., S.S.D.K., S.S.A.P., S.P.M.S., S.P.M.J., D.P. (Sarawak), D.U.P.N., S.P.N.S., S.P.D.K., S.P.C.M., S.S.M.T., D.U.M.N., P.I.S. (Kubang Pasu)
- ” Tuan Haji Mahfuz bin Haji Omar (Pokok Sena)
- “ Tuan Haji Mat Basir bin Rahmat (Parit)
- “ Datuk Dr. Maximus Johnity Ongkili, A.S.D.K., J.P. (Bandau)
- “ Datuk Haji Mohamad bin Haji Aziz, P.N.J., S.M.J., K.M.N., P.I.S., B.S.I., A.M.N., P.P.N. (Sri Gading)
- ” Tuan Mohamad bin Sabu (Kuala Kedah)
- “ Tuan Mohamed Nasir bin Che Daud (Kuala Krai)
- “ Tuan Mohamed Sayuti bin Said, P.P.T., P.J.K., P.P.N. (Kuala Selangor)
- “ Datuk Haji Mohd. Ali bin Haji Hassan, P.J.N., S.M.J., K.M.N., P.I.S., A.M.N., P.P.N. (Tebrau)
- “ Tuan Mohd. Amar bin Abdullah (Pengkalan Chepa)
- “ Tuan Mohd. Apandi bin Haji Mohamad (Jeli)
- “ Datuk Seri Panglima Mohd. Salleh bin Tun Md. Said, P.G.D.K. (Kota Belud)
- “ Datuk Mohd. Sarit bin Haji Yusoh (Temerloh)
- “ Tuan Mohd. Yusoff bin Mohd. Nor, P.P.N., J.M.N. (Machang)
- “ Dato' Mohd. Zain bin Omar, D.S.P.N., K.M.N., P.J.K., P.J.M. (Balik Pulau)
- “ Dato' Ir. Mohd. Zin bin Mohamed, D.P.T.J., J.P. (Shah Alam)
- “ Tuan M. Shukrimun bin Shamsudin (Kuala Nerus)
- “ Tuan Muhamad bin Mustafa (Peringat)
- “ Tuan Haji Muhyidin bin Haji Abd. Rashid (Hulu Terengganu)
- “ Dato' Mustafa bin Ali, D.P.M.T. (Dungun)
- “ Datuk Napsiah binti Omar (Kuala Pilah)
- “ Tuan Nasharudin bin Mat Isa (Yan)
- “ Tuan Ng Lip Yong (Batu)
- “ Datuk Osu bin Sukam, S.P.D.K., P.G.D.K., D.A. (Papar)
- “ Dato' Othman bin Abdul (Pendang)
- ” Datuk Peter Tinggom anak Kamarau, P.P.B., P.P.C., K.M.N., P.N.B.S., J.B.S., A.M.N., P.B.S. (Saratok)
- “ Tuan Philip Benedict Lasimbang, A.S.D.K. (Penampang)
- ” Puan P. Komala Devi, P.P.T. (Kapar)
- ” Datuk Railey bin Haji Jeffrey, P.G.D.K., J.M.N. (Silam)

Yang Berhormat	Tuan Ramli bin Ibrahim (Kota Bharu)
"	Mulia Tengku Tan Sri Razaleigh Hamzah, D.K., P.S.M., S.P.M.K., S.S.A.P., S.P.M.S. (Gua Musang)
"	Tuan Richard Riot anak Jaem (Serian)
"	Datuk Robert Lau Hoi Chew, J.B.S. (Sibu)
"	Tuan Ronald Kiandee, A.S.D.K. (Beluran)
"	Datuk Ruhanie bin Haji Ahmad, D.M.S.M., P.I.S. (Parit Sulong)
"	Tuan Saupi bin Daud (Tanah Merah)
"	Datin Paduka Hajah Seripah Noli binti Syed Hussin, D.S.S.A (Sepang)
"	Dato' Shahnnon bin Ahmad, D.S.D.K., K.M.N. (Sik)
"	Dato' Shaziman bin Abu Mansor, A.N.S. (Tampin)
"	Tuan Shim Paw Fatt, J.P. (Tawau)
"	Tuan Haji Siam bin Haji Kasrin, K.M.N., P.I.S. (Batu Pahat)
"	Dato' Suhaili bin Abdul Rahman, D.I.M.P., A.S.D.K. (Labuan)
"	Puan Sukinam Domo (Batang Sadong)
"	Tan Sri Datuk Seri Amar Dr. Haji Sulaiman bin Haji Daud, S.I.M.P., D.A., D.S.S.A., P.N.B.S., J.B.S. (Petra Jaya)
"	Dr. Syed Azman bin Syed Ahmad Nawawi (Kuala Terengganu)
"	Tuan Taib Azamudden bin Md. Taib, J.B.S., A.M.N. (Baling)
"	Tuan Tan Kok Wai (Cheras)
"	Dr. Tan Seng Giaw (Kepong)
"	Datin Paduka Dr. Tan Yee Kew, D.S.S.A (Kelang)
"	Puan Teresa Kok Suh Sim (Seputeh)
"	Tuan Thong Fah Chong (Ipoh Timur)
"	Tan Sri Dato' Dr. Ting Chew Peh, P.S.M., D.P.M.S., D.P.M.P. (Gopeng)
"	Dato' Seri Tiong King Sing, D.S.S.A., J.P. (Bintulu)
"	Dato' Tiong Thai King (Lanang)
"	Datin Seri Dr. Wan Azizah Wan Ismail (Permatang Pauh)
"	Datuk Haji Wan Junaidi bin Tuanku Jaafar, P.J.N., J.B.S., P.B.S. (Batang Lupar)
"	Tuan Wan Nik bin Wan Yussof (Bachok)
"	Tuan Wilfred Madius Tangau, J.S.M., J.P., A.D.K. (Tuaran)
"	Dato' Yap Pian Hon, D.P.M.S., A.M.N., P.J.K. (Serdang)
"	Dr. Yee Moh Chai (Tanjong Aru)
"	Datuk Dr. Haji Yusof bin Haji Yacob, P.G.D.K., A.D.K. (Sipitang)
"	Tan Sri Hajah Zaleha binti Ismail, P.S.M., S.S.S.A., D.P.M.S., S.M.S., K.M.N. (Gombak)
"	Tuan Zawawi bin Haji Ahmad (Padang Terap)

Yang Berhormat Dato' Zulhasnan bin Rafique, D.I.M.P., A.M.N. (Wangsa Maju)

**MENTERI/TIMBALAN MENTERI (SENATOR)**

Yang Berhormat Menteri di Jabatan Perdana Menteri, Brig. Jen. (B) Datuk Abdul Hamid bin Haji Zainal Abidin, K.M.N., P.A.T., D.P.M.P., J.S.M., P.J.N.

" Menteri Tanah dan Pembangunan Koperasi, Tan Sri Datuk Kasitah Gaddam, P.S.M., P.G.D.K., J.S.M.

" Menteri di Jabatan Perdana Menteri, Datuk Pandikar Amin Haji Mulia

" Menteri Pendidikan, Tan Sri Dato' Seri Musa bin Mohamad, P.S.M., D.P.M.N., D.P.C.M.

" Menteri di Jabatan Perdana Menteri, Tengku Datuk Adnan bin Tengku Mansor, K.M.N., D.S.D.K., D.I.M.P., D.S.A.P., P.J.N., S.I.M.P.

" Timbalan Menteri Pendidikan, Dato' Abdul Aziz bin Shamsuddin, D.M.S.M., D.P.M.S.

" Timbalan Menteri di Jabatan Perdana Menteri, Datuk M Kayveas, P.J.N.

" Timbalan Menteri Penerangan, Datuk Zainudin bin Maidin, P.J.N., J.M.N., S.M.S., A.M.K.

**DEWAN RAKYAT****PEGAWAI-PEGAWAI KANAN****Setiausaha Dewan Rakyat**

Datuk Mohd. Salleh bin Haji Hassan

**Ketua Penolong Setiausaha**

Roosme binti Hamzah  
Zamani bin Haji Sulaiman

**Penolong Setiausaha**

Ruhana binti Abdullah  
Riduan bin Rahmat  
Muhd Sujairi bin Abdullah

**PETUGAS-PETUGAS  
CAWANGAN DOKUMENTASI**

Azhari bin Hamzah  
Monarita binti Mohd. Hassan  
Hajah Shamsiah binti Mohd. Yusop  
Hajah Supiah binti Dewak  
Mohamed bin Osman  
Hajah Norishah binti Mohd. Thani  
Zaiton binti Yaacob  
Abd. Talip bin Hasim  
Syed Azuddin bin Syed Othman  
Jamilah Intan binti Haji Bohari  
Nurziana binti Ismail  
Taharah binti Mohamed  
Nik Elyana binti Ahyat  
Marzila binti Muslim  
Habibunisah binti Mohd. Azir  
Sherliza Maya binti Talkah  
Mohd. Izhar bin Hashim  
Chong Lai Peng

**PETUGAS-PETUGAS  
UNIT CETAK**

Kamaroddin bin Mohd. Yusof  
Mohamed Shahrizan bin Sarif  
Alias bin Mohd. Nor

**JURUBAHASA SERENTAK**

Hajah Paizah binti Haji Salehuddin  
Ungku Fauzie bin Ungku A. Rahman  
Mazidah binti Mohamed

**BENTARA MESYUARAT**

Lt Kol (B) Mohamed Nor bin Mohd. Darus  
Mejar (B) Zakaria bin Salleh  
Mejar (B) Kamaruddin bin Abdullah

**PETUGAS-PETUGAS  
CAWANGAN KOMPUTER**

Mohd Shah bin Rahman  
Sulaiman bin Sirad  
Azzahar bin Hashim

**PETUGAS-PETUGAS  
CAWANGAN PERUNDANGAN**

Mohd. Shariff bin Hussein  
Azmi bin Othman  
Zafniza binti Zakaria  
Hindun binti Wahari  
Rozaimah binti Mohamad Ariffin  
Mohd. Sidek bin Mohd. Sani  
Mazlina binti Ali  
Norlaila binti Abdullah Sidi  
Ropiah binti Tambi  
Suhairi bin Othman



**MALAYSIA****DEWAN RAKYAT****Isnin, 3 November 2003****Mesyuarat dimulakan pada pukul 10.00 pagi****DOA****[Tuan Yang di-Pertua *mempengerusikan Mesyuarat*]****JAWAPAN-JAWAPAN LISAN BAGI PERTANYAAN-PERTANYAAN**

1. **Datuk Ahmad Zahid bin Hamidi [Bagan Datok]** minta Menteri Pembangunan Luar Bandar menyatakan apakah langkah-langkah yang diambil untuk menentukan penduduk di kawasan penempatan Orang Asli memperoleh perumahan yang selesa sejajar dengan dasar memiliki rumah mampu milik yang selesa di seluruh negara.

**Timbalan Menteri Pembangunan Luar Bandar [Dato' G. Palanivel]:** Tuan Yang di-Pertua, bagi kemungkinan penduduk di kawasan penempatan Orang Asli yang selesa, kerajaan melalui Jabatan Hal Ehwal Orang Asli telah menyediakan perumahan kepada masyarakat Orang Asli secara percuma. Di bawah Rancangan Malaysia Kelapan sehingga kini sejumlah 1,668 unit rumah telah pun disediakan melibatkan peruntukan sebanyak RM20,633,160. Jabatan Hal Ehwal Orang Asli atau JHEOA menjangkakan penyediaan perumahan masyarakat Orang Asli akan selesai dalam Rancangan Malaysia Kesembilan dengan sasaran 20,000 unit rumah bagi menampung keperluan seramai 20,000 ketua isi rumah. Sekian, terima kasih.

**Datuk Ahmad Zahid bin Hamidi:** Tuan Yang di-Pertua, soalan tambahan, walaupun peruntukan rancangan perumahan dalam Rancangan Malaysia Kelapan adalah cukup besar pada hemat saya iaitu sebanyak RM20 juta, adakah dari segi jangka panjang, garis panduan Majlis Tindakan Ekonomi Negara iaitu MTEN untuk menyediakan rumah berdasarkan kepada tiga kamar dengan satu kamar utama serta dua bilik air akan diambil kira di dalam pembinaan untuk rumah Orang-orang Asli kerana Orang Asli juga perlukan rumah yang selesa untuk keluarga mereka yang besar. Terima kasih.

**Dato' G. Palanivel:** Tuan Yang di-Pertua, keadaan sekarang dalam rancangan Kementerian Pembangunan Luar Bandar ialah untuk memberi rumah dua bilik. Walau bagaimanapun, usaha kerajaan ialah untuk meningkatkan dan menambah pembangunan Orang Asli, sebab itu, dalam Rancangan Malaysia Kelapan, wang yang diperuntukkan untuk pembangunan ialah RM190 juta dan untuk penempatan Orang Asli, penempatan tersusun RM87 juta akan dibelanjakan dan ini mengambil kira cadangan Yang Berhormat dari Bagan Datok dan saya juga suka memaklumkan bahawa kita dalam satu rancangan untuk menyediakan satu pelan pembangunan yang komprehensif untuk pembangunan Orang Asli di seluruh negara.

Ini ialah satu perkara yang kita perlu sebab sekarang kita ada 840 buah kampung Orang Asli di mana kita dapat penduduk lebih dari 120,000 Orang Asli dan rancangan kita sehingga kini ialah untuk memberi rumah kepada 488 kampung yang dipilih. Sekian, terima kasih.

**Dato' Haji Amihamzah bin Ahmad:** Tuan Yang di-Pertua, terima kasih. Terima kasih kepada Timbalan Menteri Pembangunan Luar Bandar, di atas usaha-usaha kementerian untuk membantu golongan Orang Asli ini.

Tuan Yang di-Pertua, kita tahu bahawa sebentar tadi penekanan ialah tentang *shelter* atau tempat tinggal, di kawasan-kawasan penempatan memang disediakan tempat tinggal yang agak selesa bagi penduduk-penduduk Orang Asli ini, persoalannya, bagaimana di kawasan-kawasan yang tidak ada penempatan, di tempat saya ada beberapa tempat penempatan, tetapi ramai juga di kalangan Orang Asli ini yang tidak mahu pindah,

jadi dia masih tinggal dalam kelompok-kelompok kecil dan duduk dalam rumah yang tidak begitu selesa dan daif sekali, kadang-kadang sampai tidak ada bilik.

Jadi, apakah perancangan Kementerian untuk meningkatkan lagi kemudahan-kemudahan perumahan bagi mereka ini dan di kawasan penempatan apakah rancangan Kementerian di samping memberi tempat tinggal yang agak selesa tetapi faktor ekonomi pula, bagaimana mereka ini dapat mencari pendapatan yang boleh menyara keluarga mereka. *So, the question of food and shelter* patut juga kita beri penekanan. Itu sahaja, terima kasih.

**Dato' G. Palanivel:** Tuan Yang di-Pertua, terima kasih untuk cadangan yang dibuat oleh Ahli Yang Berhormat, saya harap semua keperluan Orang Asli akan diambil kira bila kita merangka pelan pembangunan komprehensif untuk Orang Asli, ini saya ingat akan menjamin bahawa Orang Asli tidak terlepas dari program-program pembangunan yang dilaksanakan di negara ini. Sekian, terima kasih.

**[Soalan No. 2 – Yang Berhormat Dato' Seri Haji Abdul Hadi bin Haji Awang [Marang] tidak hadir]**

3. **Puan Chew Mei Fun [Petaling Jaya Utara]** minta Menteri Sumber Manusia menyatakan adakah Kementerian sedar ramai siswazah kursus teknologi maklumat sukar memperoleh pekerjaan yang sesuai dan terpaksa menganggur. Apakah punca-punca masalah ini. Pada masa kini, penuntut kursus apakah yang menghadapi masalah paling serius dalam memperoleh pekerjaan.

**Timbalan Menteri Sumber Manusia [Datuk Dr. Abdul Latiff bin Ahmad]:** Tuan Yang di-Pertua, untuk menyatakan siswazah teknologi maklumat, sukar memperoleh pekerjaan dan terpaksa menganggur adalah tidak tepat, mungkin adik-adik di galeri yang hendak ambil kursus teknologi maklumat, mungkin terpengaruh dengan kata-kata Ahli Yang Berhormat bagi Petaling Jaya Utara.

Mengikut kajian mengesan kedudukan pekerjaan siswazah, setelah berdaftar dengan Jabatan Tenaga Rakyat, dari bulan Januari 2001 hingga Mei 2002, mereka memerlukan masa kira-kira enam hingga tujuh bulan untuk mendapat pekerjaan. Ini berikutan terdapat lebih graduan teknologi maklumat di pasaran akibat daripada banyak institusi latihan awam dan swasta yang menawarkan kursus ICT dan yang berkaitan.

Berdasarkan kajian yang dibuat oleh Multimedia Development Corporation atau MDC, dengan izin bagi syarikat berstatus MSC menunjukkan kebanyakan IPT yang menyediakan kursus-kursus ICT belum dapat mengeluarkan siswazah yang mempunyai kemahiran yang mendalam. Manakala syarikat-syarikat pembangunan *software* memerlukan *programmer* yang mempunyai kemahiran tinggi seperti C++ atau Java. Kajian oleh *World Bank* bersama Unit Perancang Ekonomi Jabatan Perdana Menteri pula mendapati bahawa Malaysia telah berjaya mengeluarkan ramai siswazah ICT sebagai *adapter*, dengan izin tetapi masih kekurangan sebagai *inventor*.

Antara bidang-bidang yang diperlukan adalah seperti perkakasan, *web application*, dengan izin, *multimedia database*, *web designer* dan sebagainya. Mengikut kajian mengesan kedudukan pekerjaan siswazah setelah berdaftar dengan Jabatan Tenaga Manusia, siswazah dalam kemanusiaan atau sastera serta ekonomi dan pengajian Islam lebih sukar mendapat pekerjaan berbanding dengan disiplin-disiplin lain.

**Puan Chew Mei Fun:** Terima kasih Tuan Yang di-Pertua. Terima kasih kepada jawapan yang diberi oleh Yang Berhormat Timbalan Menteri. Selepas mendengar jawapan ini, saya pun rasa senang hati tetapi hakikatnya saya dapat banyak aduan dari penduduk di kawasan saya. Mereka beritahu saya anak mereka tidak dapat cari kerja dan perlu cari kerja di bidang yang lain. Oleh itu apakah masalah ini, dan apakah langkah yang akan diambil oleh Kementerian untuk membantu pelajar-pelajar ICT ini.

Dalam usaha mengatasi masalah sukar memperoleh pekerjaan selepas *graduate*, adakah Kementerian Sumber Manusia mempunyai rancangan untuk mengemukakan maklumat tentang permintaan pasaran pekerjaan kepada orang ramai pada setiap tahun, supaya para pelajar boleh merujuk semasa memilih kursus dan apakah profesion yang paling dimintai oleh pasaran pekerjaan buat masa ini. Terima kasih.

**Dr. Abdul Latiff bin Ahmad:** Tuan Yang di-Pertua, ada tiga isu yang dibangkitkan oleh Yang Berhormat bagi Petaling Jaya Utara, terima kasih. Pertama, apakah langkah yang dibuat? Kita ada dua strategi di sini, satu *at the source* iaitu di peringkat Kementerian Pendidikan, di mana Yang Berhormat Menteri Pendidikan mempengerusikan satu Jawatan-kuasa Kabinet yang dianggotai oleh empat kementerian, Kementerian Sumber Manusia, Kementerian Pembangunan Usahawan, Kementerian Belia dan Sukan dan juga MITI bagi meninjau dan mengenal masalah-masalah sementara dan cara mengatasi isu siswazah menganggur. Seperti saya katakan tadi mereka sebenarnya, kebanyakannya adalah wanita. 68% siswazah menganggur adalah wanita dan wanita ada masalah-masalah lain seperti mobiliti dan sebagainya tetapi kita perlu terima hakikat bahawa tidak ada *deepening* atau kemahiran yang mendalam bagi siswazah-siswazah yang menganggur ini.

Ekoran daripada itu kementerian menjalankan dua program iaitu Latihan Semula kali pertama sebanyak RM137 juta dibelanjakan. Kedua adalah RM50 juta sekarang ini sedang berjalan dan sengaja kita pilih kursus-kursus yang menjurus kepada *inventor*. Umpamanya kita galakan siswazah ICT yang masih menganggur mengambil kursus tambahan *Microsoft System Engineer* atau MCSE ataupun CISCO, CCNP yang memakan masa lebih kurang empat bulan dan dua bulan *on job training*, dengan izin dan didapati ramai daripada mereka beroleh pekerjaan selepas itu. Terima kasih.

**Puan Chong Eng:** Terima kasih Tuan Yang di-Pertua. Menurut apa yang dijawab oleh Yang Berhormat Timbalan Menteri bahawa *graduates* yang menganggur itu setinggi 80% adalah siswi. Jadi bolehkah Yang Berhormat Timbalan Menteri memberi satu analisis sama ada adalah kerana lebih ramai siswi ataupun pelajar wanita mengikuti kursus sastera, ekonomi dan pengajian Islam serta ICT, dan memang kebanyakan mereka yang dalam bidang ini tidak mendapat kerja ataupun dalam bidang pengajian seperti ekonomi. Di dalamnya ada pelajar lelaki yang lebih mendapat kerja kalau berbanding dengan wanita dan apakah sebabnya? Terima kasih.

**Dr. Abdul Latiff bin Ahmad:** Terima kasih Tuan Yang di-Pertua, terima kasih Bukit Mertajam yang sentiasa *gender sensitive*. Kalau kita lihat *cohort* di universiti tempatan ataupun di universiti swasta, kebanyakan yang masuk ke masuk ke universiti adalah 70% wanita dan 30% lelaki. Maka kalau kita lihat *cohort* bila mereka *graduate*, ini jelas kita lihat kerana golongan wanita melebihi golongan lelaki di peringkat..., *especially education*. Oleh yang demikian ini adalah satu fenomena biasa yang berlaku sekarang. Antara sebab-sebab yang saya katakan tadi adalah mobiliti, itu untuk wanita. Mereka pilih kerja. Kalau ada kerja di tempat mereka, mereka hendak bekerja di kampung mereka. Dia tidak hendak pergi 50 batu, 100 kilometer selepas itu pun mereka tidak hendak pergi.

Ini yang menyebabkan mereka lambat dapat kerja. Bukan mereka terus menganggur dan majoriti tidak kira lelaki dan wanita, mereka yang lambat dapat kerja ini adalah kurang *soft skill*. Mereka kurang boleh berbahasa Inggeris dan alhamdulillah Tuan Yang di-Pertua, RM50 juta yang kita *spend*, dengan izin baru-baru ini, setengah daripada mereka mengambil Kursus Bahasa Inggeris untuk meningkatkan *skill* mereka dalam bidang komunikasi.

4. **Tuan Haji Che Ghani bin Che Ambak [Setiu]** minta Menteri Pertahanan menyatakan, bilakah Program Khidmat Nasional akan dimulakan dan persiapan yang telah dibuat bagi memastikan kejayaannya.

**Menteri Pertahanan [Dato' Sri Mohd. Najib bin Tun Haji Abdul Razak]:** Tuan Yang di-Pertua segala perancangan ke arah pelaksanaan Program Latihan Khidmat Negara mulai bulan Februari tahun 2004 sedang berjalan dengan baik. Dari segi pelaksanaan Program Khidmat Negara ini akan berjalan selama sebulan di pusat-pusat latihan secara berkhemah untuk latihan fizikal dan penempatan dua bulan secara berasrama di IPTA bagi modul kenegaraan dan pembentukan watak serta aktiviti khidmat komuniti. Langkah-langkah ke arah menyediakan keperluan-keperluan logistik, mengenal pasti dan menyiapkan pusat-pusat latihan, tenaga pengajar, penyediaan kurikulum dan manual dan sebagainya sedang diambil oleh pihak Kementerian Pertahanan bersama-sama dengan agensi-agensi lain.

Pihak kementerian dan Perbendaharaan pada masa ini sedang dalam peringkat akhir menguruskan perolehan peralatan serta pelantikan syarikat-syarikat yang terlibat membekalkan logistik bagi Program Khidmat Negara.

**Tuan Haji Che Ghani bin Che Ambak:** Terima kasih Tuan Yang di-Pertua dan terima kasih kepada Yang Berhormat Dato' Menteri yang ini dapat hadir. Mungkin insya-Allah jawatan Timbalan Perdana Menteri cerah sudah kot! Soalan tambahan. Bagaimana komposisi kaum bagi memastikan bahawa integrasi nasional dapat dicapai dalam program ini dan adakah betul bahawa bajet yang dijangka diperuntukkan bagi program ini sehingga sekarang belum diperolehi lagi. Terima kasih.

**Dato' Sri Mohd. Najib bin Tun Haji Abdul Razak:** Tuan Yang di-Pertua, bagi memastikan bahawa matlamat Program Khidmat Negara ini ialah untuk memperkukuhkan lagi perpaduan dan integrasi nasional, maka telah ditetapkan sebagai satu dasar bahawa penyertaan dalam Program Khidmat Negara ini adalah berasaskan kepada komposisi kaum yang sebenarnya dalam negara kita. Penyertaan ini akan ditentukan melalui satu sistem *balloting* yang akan dibuat dengan menggunakan sistem komputer dan kita akan tentukan bahawa bilangan tahun hadapan, yakni seramai lebih kurang 85,000 akan mencerminkan komposisi kaum dalam negara kita.

Soalan kedua, tentang bajet. Bajetnya telah diluluskan oleh kerajaan dan kita telah menerima sebahagian daripada peruntukan tersebut.

**Datuk Haji Mohamad bin Haji Aziz:** Assalamualaikum warahmatullahi wabarakatuh dan salam sejahtera. Terima kasih Tuan Yang di-Pertua. Soalan tambahan, kita menunggu-nunggu Program Khidmat Negara ini akan dilancarkan pada awal tahun hadapan. Saya kira ini satu program yang sangat besar, bermakna dan diharapkan akhirnya nanti penuh dengan kejayaan kerana ianya akan melahirkan warga negara yang penuh bertanggungjawab. Program ini boleh dikatakan program pembinaan bangsa tentang kurikulum dan kokurikulum - soal disiplin, ketahanan diri, peningkatan rasa kekitaan, rasa tanggungjawab dan cinta negara yang akan membentuk negara akan datang menjadi warganegara yang penuh dengan tanggungjawab....

**Tuan Yang di-Pertua:** Ya, soalan.

**Datuk Haji Mohamad bin Haji Aziz:** Soal ini saya rasa Yang Berhormat Menteri, soal peruntukan. Saya harap soal peruntukan tidak menjadi penghalang kepada program besar yang sangat besar manfaatnya kepada negara....

**Tuan Yang di-Pertua:** Ya, sebahagian besar peruntukan telah pun diberikan, Yang Berhormat.

**Beberapa Ahli:** [Ketawa]

**Datuk Haji Mohamad bin Haji Aziz:** Ya. Jadi, saya...

**Tuan Yang di-Pertua:** Soalannya Yang Berhormat.

**Datuk Haji Mohamad bin Haji Aziz:** Soalannya, saya berharap program yang julung-julung kali diadakan ini dan dinanti-nantikan oleh kita semua supaya negara kita pada masa akan datang akan penuh dengan kecemerlangan. Jadi soal pelaksanaan di peringkat awal ini dapat kiranya diteliti termasuk soal jurulatih. Jadi harapan kita supaya Kementerian Pertahanan akan dapat melaksanakan dengan sebaik-baiknya. Ini harapan kita dan dengan itulah saya menyokong soal peruntukan ini jangan menjadi halangan kepada program yang sangat besar gunanya ini. Terima kasih, Tuan Yang di-Pertua.

**Tuan Yang di-Pertua:** Ya.

**Dato' Sri Mohd. Najib bin Tun Haji Abdul Razak:** Sokongan Yang Berhormat bagi Sri Gading sangat dialu-alukan. Terima kasih.

5. **Datuk Juslie bin Ajirol [Libaran]** minta Menteri Pendidikan menyatakan berapakah jumlah sekolah rendah dan menengah yang telah diluluskan dalam RMK-8 di Sabah, terutamanya di Kawasan Libaran.

**Menteri Pendidikan [Tan Sri Dato' Seri Musa bin Muhamad]:** Tuan Yang di-Pertua, jumlah sekolah rendah dan menengah yang diluluskan dalam Rancangan Malaysia Kelapan di Sabah adalah seperti berikut:-

Sekolah Rendah - 61 buah; dan

Sekolah Menengah - 37 buah.

Di kawasan Libaran, jumlah sekolah yang diluluskan dalam Rancangan Malaysia Kelapan adalah:

Sekolah Rendah - 10 buah; dan

Sekolah Menengah - 2 buah.

Sekian.

**Dato' Kamarudin bin Jaffar:** Terima kasih Yang Berhormat Menteri. Berkenaan dengan sekolah rendah di Sabah yang baru yang hendak ditubuhkan, saya ingin bertanya berapa lagikah sekolah-sekolah di Sabah yang tidak mempunyai kemudahan air dan kemudahan elektrik untuk kegunaan pelajar-pelajar kita untuk komputer dan sebagainya?...  
[Tepuk]

**Tan Sri Dato' Seri Musa bin Muhamad:** Tuan Yang di-Pertua, saya tidak mempunyai data mengenai perkara itu, walau bagaimanapun, perkara ini telah dijawab dalam soalan-soalan lain di Parlimen dan saya juga dalam Parlimen ini telah mengatakan bahawa kita sedang mengambil tindakan untuk memperbaiki dan membina sekolah-sekolah rendah baru di kawasan-kawasan luar bandar dan memberikan sekolah-sekolah ini bekalan air dan elektrik dan perkara ini saya rasa telah dijawab beberapa kali di Parlimen ini.

**Datuk Juslie bin Ajirol:** Terima kasih Tuan Yang di-Pertua dan terima kasih atas jawapan Menteri. Seperti yang kita ketahui, pembangunan pendidikan dirangka dari tahun 2001 hingga 2010 bertujuan untuk membina bangsa Malaysia yang berdaya tahan dan juga menghadapi persaingan antarabangsa dengan matlamat menentukan setiap rakyat di Malaysia ini dapat menikmati peluang pendidikan secara saksama sama ada di bandar ataupun di luar bandar.

Soalan saya, bagaimanakah kementerian dapat menentukan atau memantau dari segi pelaksanaannya supaya ia seimbang. Misalnya di kawasan saya di Libaran di mana taburan sekolah tidak mencapai matlamat kerana sekolah dibina kebanyakannya di pinggir bandar dan berdekatan antara satu sama lain seperti SMK Merpati, SMK Fajar, SMK Perempuan, SMK Lupura, SMK Muhibah dan SMK Muhibah 2. Jaraknya adalah terlalu dekat, antaranya tidak sampai pun empat kilometer. Keadaan ini sudah tentu menimbulkan masalah perhubungan ...

**Tuan Yang di-Pertua:** Yang Berhormat, Yang Berhormat, hem....

**Datuk Juslie bin Ajirol:** ...pelajar daripada luar bandar.

**Tuan Yang di-Pertua:** Jangan panjang sangat itu, ya.

**Datuk Juslie bin Ajirol:** Ya Tuan Yang di-Pertua, kalau tidak, tidak mencapai matlamatnya.... [Ketawa]

**Tuan Yang di-Pertua:** Ya lah.

**Datuk Juslie bin Ajirol:** Jadi saya memohon supaya kementerian ....

**Tuan Yang di-Pertua:** Yang Berhormat, Yang Berhormat tanya mengenai bilangan sekolah-sekolah. Janganlah perkara yang lain-lain, ya.

**Datuk Juslie bin Ajirol:** Ya, sekian, terima kasih.

**Beberapa Ahli:** ...[Ketawa]

**Tan Sri Dato' Seri Musa bin Muhamad:** Tuan Yang di-Pertua, seperti yang kita semua maklum, masalah pembangunan sekolah-sekolah di luar bandar di Sabah dan Sarawak telah diperbincangkan dalam satu Jawatankuasa Kabinet yang dipengerusikan

oleh Perdana Menteri kita yang baru. Perkara ini juga telah diberitahu dalam mesyuarat Parlimen pada masa-masa dahulu, kita telah pun mengekshaskan RM600 juta untuk membina sekolah-sekolah baru, membekalkan air, membekalkan elektrik kepada sekolah-sekolah di Sabah dan Sarawak terutamanya di luar bandar.

Perkara-perkara khusus yang dibangkitkan khusus mengenai kawasan Libaran, saya akan lihat perkara ini dan akan laporkan kepada Yang Berhormat kemudian.

6. **Tuan Haji Mohamed Sayuti bin Said [Kuala Selangor]** minta Menteri Perpaduan Negara dan Pembangunan Masyarakat menyatakan:-

- (a) tindakan diambil bagi mengadakan bangunan tabika sendiri bagi aktiviti-aktiviti murid prasekolah memandangkan kebanyakan beroperasi menggunakan bangunan balai raya; dan
- (b) tindakan diambil bagi mengadakan Bangunan Perpaduan di peringkat daerah di mana ia akan menjadi *role model* kepada perpaduan berbilang kaum untuk mengadakan pelbagai aktiviti-aktiviti semasa.

**Timbalan Menteri Perpaduan Negara dan Pembangunan Masyarakat [Dr. Tiki anak Lafe]:** Terima kasih Tuan Yang di-Pertua dan terima kasih Yang Berhormat bagi Kuala Selangor. Tuan Yang di-Pertua, untuk makluman Yang Berhormat, Kementerian Perpaduan Negara dan Pembangunan Masyarakat melalui Jabatan Perpaduan Negara dan Pembangunan Masyarakat telah mengadakan aktiviti murid prasekolah di dalam program yang dijalankan oleh Rukun Tetangga sejak tahun 1975. Sehingga kini sebanyak 1,296 buah kelas tabika perpaduan sedang beroperasi di seluruh negara. Pada tahun 2000, sebanyak 67 buah bangunan dengan kos RM95,000 sebuah berjumlah RM6.37 juta keseluruhannya, telah dibina.

Pada tahun 2001 pula, sebanyak 64 buah bangunan tabika dengan kos berjumlah RM6.08 juta telah dibina. Namun begitu, bagi menampung keperluan bilangan kanak-kanak yang bertambah dari setahun ke setahun, jabatan telah menyewa sebanyak 270 buah bangunan swasta perseorangan untuk program tabika. Memandangkan ada kawasan yang tiada bangunan untuk disewa atau tiada mendapat peruntukan untuk membina bangunan sendiri, kelas dijalankan di balai raya, rumah perseorangan, bangunan pejabat lama, surau, kuarters kerajaan dan bangunan kosong lain yang dibenarkan oleh pihak berkuasa tempatan.

Pada tahun 2002, Jabatan telah mendapat peruntukan khas daripada Perbendaharaan bagi pembinaan bangunan Pusat Rukun Tetangga di kawasan berisiko tinggi sebanyak RM5.84 juta bagi pembinaan 30 buah Pusat Rukun Tetangga dan bangunan ini juga digunakan sebahagiannya sebagai kelas Tabika.

Dalam kajian semula Rancangan Malaysia Kelapan, Jabatan telah memohon peruntukan pembangunan sebanyak RM21 juta bagi pembinaan bangunan Pusat Rukun Tetangga dan Pusat Aktiviti Perpaduan di seluruh negara. Bangunan ini juga kelak akan menampung kelas Tabika yang pada masa ini dijalankan di Balai Raya atau premis-premis lain.

Tuan Yang di-Pertua, Jabatan Perpaduan Negara telah pun membina enam buah Pusat Aktiviti Perpaduan ataupun PAP di antara tahun 2000 hingga 2002 bagi menjalankan aktiviti perpaduan di negeri-negeri telah di daerah-daerah. PAP tersebut ialah:

- (i) PAP Taman Sri Rampai, Wilayah Persekutuan Kuala Lumpur;
- (ii) PAP Jempul, Negeri Sembilan;
- (iii) PAP Permatang Badak, Kuantan, Pahang;
- (iv) PAP Bukit Mak Dayang, Kemaman, Terengganu;
- (v) PAP Kemunting, Taiping, Perak; dan
- (vi) PAP Maran di Pahang.

PAP tersebut dibina dengan kos di antara RM800,000 hingga RM1.3 juta sebuah selain sebagai pusat bagi menjalankan aktiviti perpaduan di peringkat daerah dan juga negeri, ia juga akan menempatkan ruang pejabat untuk Pejabat Perpaduan Daerah dan menyediakan ruang bagi Rukun Tetangga dan cawangan di peringkat daerah melaksanakan aktiviti.

Untuk pengetahuan Yang Berhormat, adalah dalam perancangan Jabatan Perpaduan Negara untuk membina PAP di setiap daerah dengan keluasan tanah tiga suku ekar dengan kos banyak RM1.5 juta sebuah. Sekian.

**Tuan Haji Mohamed Sayuti bin Said:** Terima kasih Tuan Yang di-Pertua dan terima kasih kepada Timbalan Menteri yang telah pun memberikan angka mengenai dengan perpaduan yang ada, kelas perpaduan di seluruh negara 1,296 buah dan telah pun dibina 161 buah. Persoalannya, soalan sampai, persoalannya Tuan Yang di-Pertua, adakah kerajaan melalui kementerian ini tidak untuk memberikan ataupun mendirikan lebih banyak lagi bangunan-bangunan Tabika Perpaduan ini memandangkan perpaduan ini adalah sangat penting di sebuah negara yang kecil tetapi unik seperti negara kita ini. Jadi, termasuklah pembangunan PAP yang akan dibangunkan di setiap daerah ataupun Parlimen termasuk Kuala Selangor jangan diberikan ketinggalan. Terima kasih.

**Datuk Dr. Tiki anak Lafe:** Jawapannya, ya!

**Datin Paduka Dr. Tan Yee Kew:** Tuan Yang di-Pertua, soalan tambahan. Kita difahamkan, Kementerian Pendidikan ada rancangan untuk menjadikan prasekolah ataupun Tadika sebahagian pendidikan sekolah rendah. Jadi, saya ingin tahu apakah akan terjadi kepada Tadika di bawah Kementerian Perpaduan Negara dan Pembangunan Masyarakat yang ada sekarang bila Kementerian Pendidikan mengambil alih pendidikan prasekolah.

Adakah rancangan kementerian Yang Berhormat untuk menukar Tabikanya menjadikan mereka asuhan-asuhan ataupun pusat jagaan kanak-kanak untuk kanak-kanak di bawah umur empat tahun memandangkan kekurangan asuhan di taman-taman perumahan dan juga keperluan wanita-wanita bekerja. Ini sahaja terima kasih.

**Datuk Dr. Tiki anak Lafe:** Terima kasih Yang Berhormat. Seperti mana Yang Berhormat sedia maklum di dalam negara kita ini, ada berbagai agensi yang terlibat dalam mengendalikan aktiviti prasekolah ataupun pendidikan prasekolah. Satu daripada agensi tersebut adalah Kementerian Perpaduan Negara dan Pembangunan Masyarakat melalui Jabatan Perpaduan Negara melalui agensinya Rukun Tetangga.

Jadi, kelas Tabika Perpaduan yang dijalankan oleh kementerian adalah merupakan satu daripada aktiviti di bawah Rukun Tetangga. Jadi, persoalan sama kita akan menukar kelas-kelas Tabika Perpaduan menjadi pusat asuhan atau tidak, itu tidak timbul oleh kerana kelas-kelas Tabika Perpaduan yang dijalankan oleh Rukun Tetangga atau melalui Rukun Tetangga merupakan ataupun mempunyai ciri-ciri tersendiri di mana kita menekankan aktiviti-aktiviti yang berunsur perpaduan.

Untuk makluman Dewan yang mulia ini juga, kurikulum yang digunakan adalah sama dengan kurikulum yang digunakan oleh Kementerian Pendidikan. Jadi, kita tidak ada cadangan untuk menukar kelas-kelas tersebut bahkan kita akan meningkatkan lagi kualiti aktiviti atau pendidikan yang diberikan dan kita telah mendapat kelulusan daripada pihak Kabinet untuk memperkenalkan Tabika 21.

7. **Datin Seri Dr. Wan Azizah binti Wan Ismail [Permatang Pauh]** minta Menteri Luar Negeri menyatakan pendirian Kerajaan dalam isu penahanan pemimpin politik pembangkang Myanmar, Aung San Suu Kyi dan komitmen Negara terhadap pemulihan demokrasi di Myanmar. Apakah Kerajaan akan mengkaji semula hubungan diplomatik dan perdagangan dengan Myanmar sekiranya Suu Kyi tidak dibebaskan.

**Menteri Luar Negeri [Datuk Seri Syed Hamid bin Syed Jaafar Albar]:** Tuan Yang di-Pertua, terdapat dua soalan mengenai isu Myanmar yang dibuat oleh Ahli Parlimen Kota Bharu dan Ahli Parlimen Permatang Pauh. Memandangkan kedua-dua soalan tersebut adalah berkaitan, saya mohon izin untuk menjawab soalan tersebut secara serentak.

**Tuan Yang di-Pertua:** Baik.

**Datuk Seri Syed Hamid bin Syed Jaafar Albar:** Tuan Yang di-Pertua, ekoran insiden 30 Mei 2003 dan penahanan pemimpin pro-demokrasi Myanmar, Aung San Suu Kyi serta pemimpin-pemimpin National League For Democracy dengan izin, kerajaan Malaysia telah menyuarakan rasa kesal kerana tindakan yang diambil oleh kerajaan Myanmar dianggap boleh menggugat proses pendemokrasian dan pemulihan negara ataupun dengan izin, *national reconciliation*.

Tindakan kerajaan Myanmar itu juga menyimpang dari nilai-nilai dan prinsip ASEAN yang berasaskan kepada prinsip penyertaan masyarakat awam dalam kerajaan serta peranan konstruktif dalam hal ehwal serantau dan antarabangsa.

Sehubungan dengan ini Malaysia telah menggesa kerajaan Myanmar supaya menarik balik tindakan yang telah diambil termasuk mengambil usaha bagi membebaskan Aung San Suu Kyi dan menyambung semula proses konsultasi dengan pihak National Liberation For Democracy.

Baru-baru pada penghujung Ogos 2003, beberapa perkembangan terbaru telah berlaku di Myanmar. Pertama, Jeneral Khin Nyunt telah dilantik sebagai Perdana Menteri baru Myanmar dan Jeneral Khin Nyunt dianggap sebagai seorang pemimpin yang bersifat sederhana terbuka terhadap rundingan bagi pembebasan Aung San Suu Kyi dan penglibatan partinya NLD.

Kedua, di dalam ucapan ulung Jeneral Khin Nyunt semasa pelantikannya, beliau telah mengemukakan pelan, *roadmap of Myanmar* dengan izin yang menggariskan tujuh langkah ke arah perwujudan negara moden, maju dan demokratik.

Di antara langkah yang dilaksanakan ialah mengujudkan semula *National Convention* untuk menggubal perlembagaan Myanmar melalui perundingan yang telah terhenti semenjak 1996. Menggubal perlembagaan berdasarkan prinsip asas yang dipersetujui oleh *National Convention*, mendapatkan persetujuan rakyat ke atas kelonggaran melalui *referendum* serta mengadakan pilihan raya yang bebas dan adil untuk badan-badan *legislative*.

Tuan Yang di-Pertua, kerajaan Malaysia menganggap pelan ke arah pendemokrasian Myanmar ini sebagai satu langkah positif di dalam usaha mencari penyelesaian terhadap masalah yang sedang dihadapi di Myanmar. Malaysia mengalu-alukan inisiatif kerajaan Myanmar bagi meredakan tekanan masyarakat antarabangsa berikutan penahanan Aung San Suu Kyi. Sebagai negara jiran, Malaysia bersedia membantu Myanmar dan usaha-usaha ke arah mencapai objektif pendemokrasian. Terima kasih.

**Tuan Abd. Rahman bin Yusof:** Terima kasih Tuan Yang di-Pertua. Saya hendak tanya kelayakan Malaysia dalam *negotiate* ataupun *mediator* yang menjalankan perhubungan di antara Aung San Suu Kyi dengan kepimpinan negara kerana kita difahamkan bahawa Tan Sri Ghazali ini banyak terlibat dengan kepentingan-kepentingan perniagaan beliau di Myanmar.

Jadi kelayakan beliau sebagai *mediator* di dalam proses membebaskan Myanmar ....

**Seorang Ahli:** [Menyampuk]

**Tuan Abd. Rahman bin Yusof:** Apa salahnya. Hendak tanya soalan, nanti dia akan jawab.

**Tuan Yang di-Pertua:** Ya, sila. Sila teruskan.

**Tuan Abd. Rahman bin Yusof:** Jadi kelayakan beliau sebagai *mediator* dipersoalkan.

Yang keduanya ialah kelayakan Malaysia sendiri pun kerana Malaysia sendiri pun tidak mengamalkan nilai-nilai demokrasi yang ingin diperjuangkan.... [Disampuk] Di

Malaysia sendiri pun banyak tahanan politik yang melalui proses bukan demokrasi dilaksanakan di negara kita. Minta penjelasan.

**Datuk Seri Syed Hamid bin Syed Jaafar Albar:** Tuan Yang di-Pertua, nyata sekali Yang Berhormat adalah salah seorang yang mengacau dan cuba menghantui pandangan baik masyarakat dunia terhadap Malaysia!... *[Sorak]* Kita menghormati peranan yang dimainkan oleh pembangkang tetapi bila tidak bertanggungjawab, ia boleh mendatangkan sesuatu yang kita amat kesal sekali di atas sikap Yang Berhormat!

Biar saya memberitahu berkenaan Tan Sri Razali. Pertamanya, Tan Sri Razali Ismail adalah seorang wakil khas Setiausaha Agung. Kalau peranannya tidak dihormati dan integriti dan kredibilitinya tidak ada, maka Setiausaha Agung Bangsa-Bangsa Bersatu akan memberhentikannya daripada peranan yang dimainkan..... *[Disampuk]* Sehingga sekarang, mengikut laporan yang kita dapat sama ada daripada Setiausaha Agung Bangsa-Bangsa Bersatu ataupun daripada European Union iaitu EU, mereka berpuas hati dengan peranan positif yang diberikan oleh Tan Sri Razali Ismail.

Saya fikir kalau kita tidak mengamalkan demokrasi, orang-orang yang macam Yang Berhormat tidak ada dalam Parlimen! Terima kasih Tuan Yang di-Pertua... *[Disampuk]*

**Datuk Haji Mohd. Ali bin Haji Hassan:** Assalamualaikum warahmatullahi wabarakatuh.

**Beberapa Ahli:** Waalaikumussalam.

**Datuk Haji Mohd. Ali bin Haji Hassan:** Salam sejahtera, *sabbahul khoir*. Tuan Yang di-Pertua, soalan tambahan. Yang pertama, saya hendak ucap tahniah kepada kerajaan dan Menteri Luar Negeri kerana berjaya mengadakan Persidangan OIC dengan amat berjaya sekali. Tahniah kepada kerajaan dan juga Menteri Luar Negeri.

Seperti kita maklum, Aung San Suu Kyi sudah banyak kali ditahan dan telah pun dibebaskan oleh junta tentera, selepas itu ditahan balik semula. Dia berbeza dengan pembangkang di negara kita. Pembangkang di negara kita ini, ucapan dan perkataan yang dibuat itu mengancam keselamatan negara dan perpaduan kaum, termasuk baru-baru ini hendak bawa balik Ketua Parti Komunis, Chin Peng, ke negara Malaysia. Ini amat mengecewakan bagi saya kerana latar belakang Chin Peng, semua rakyat Malaysia terutama orang lama-lama tahu, yang muda-muda ini tidak tahu sejarah. Apa...

**Seorang Ahli:** Soalan, soalan!

**Datuk Haji Mohd. Ali bin Haji Hassan:** Ini tengah hendak soallah... *[Ketawa]* Dia mana boleh soal terus? Dia mesti ada ekor-ekor, baru pergi soalan. Hendak tanya tindakan negara-negara ASEAN. Kalau junta tentera tidak hendak bebaskan, apa tindakan negara-negara ASEAN dalam hendak menyelesaikan perkara ini? Walaupun Perdana Menteri baru, Yang Berhormat Menteri pun sudah jawab - kita doakan dia - tetapi sekiranya juga junta tentera tidak hendak membebaskan, apakah tindakan selanjutnya yang dibuat oleh negara-negara ASEAN untuk mengatasi masalah ini? Sila jawab... *[Ketawa]*

**Datuk Seri Syed Hamid bin Syed Jaafar Albar:** Saya mengucapkan terima kasih kepada Yang Berhormat....

**Tuan Yang di-Pertua:** Tebrau!

**Datuk Seri Syed Hamid bin Syed Jaafar Albar:** Yang Berhormat bagi Tebrau yang suruh saya sila jawab. Terima kasih di atas budi bahasa yang baik.... *[Ketawa]*

Tuan Yang di-Pertua, bila kita melihat kepada Myanmar, kita berpegang kepada prinsip tidak campur tangan di dalam hal ehwal dalaman sesebuah negara. Pada masa yang sama, kita memainkan peranan untuk menggalak dan supaya Myanmar bertukar secara evolusi dan tidak dipaksa. Kita melihat banyak negara yang dipaksa untuk menukar terus secara radikal kepada demokrasi, akhirnya membawa keadaan porak-peranda dan huru-hara di dalam negara itu.

Oleh itu, langkah yang diambil oleh Perdana Menteri baru, Gen. Khin Nyut, untuk mengadakan *road map* ataupun peta jalan ke arah pendemokrasian adalah sesuatu yang positif dan kita berharap masalah Myanmar secara keseluruhannya dapat diselesaikan, dan urusan Suu Kyi adalah sebahagian daripada proses itu dan bila tiba masanya perkara itu tidak berlaku, kita akan menjawab kemudiannya. Terima kasih.

8. **Dato' Mohd. Sarit bin Haji Yusoh [Temerloh]** minta Menteri Perpaduan Negara dan Pembangunan Masyarakat menyatakan:-

- (a) sejauh manakah Dasar Sosial Negara benar-benar menjadi dasar payung kepada dasar-dasar pembangunan sosial, misalnya Dasar Wanita Kebangsaan dan dasar Pembangunan Belia Negara; dan
- (b) apakah wujud forum perundingan yang melibatkan sektor swasta dan NGO dalam memantau pelaksanaan dasar ini.

**Datuk Dr. Tiki anak Lafe:** Terima kasih Yang Berhormat, terima kasih Tuan Yang di-Pertua. Sekali lagi, Tuan Yang di-Pertua, Dasar Sosial Negara ataupun DSN merupakan dasar payung kerana ia digubal bukan untuk menggantikan mana-mana dasar sosial yang sedia ada. DSN sebaliknya dibentuk dalam erti kata yang lebih meluas lagi dan tidak hanya tertumpu kepada sesuatu aspek sosial sahaja.

Ia memberikan tumpuan kepada semua aspek sosial seperti kesihatan, pendidikan, latihan, perumahan dan sebagainya, termasuklah perkara-perkara yang boleh menjejaskan pembangunan sosial seperti gejala sosial. Ini selaras dengan matlamat DSN iaitu untuk memberikan kesejahteraan hidup kepada semua individu, keluarga dan masyarakat tanpa mengira latar belakang, jantina dan peringkat umur.

Sebagai dasar payung, DSN akan menjadi landasan dan pemandu arah kepada semua program pembangunan sosial yang selama ini pelaksanaannya lebih bersifat *piecemeal* dan ditadbir oleh kementerian masing-masing secara berasingan. Dengan terbentuknya DSN, jentera pelaksanaannya yang bersepadu di peringkat Persekutuan, negeri, daerah dan juga akar umbi, penyelarasan perancangan, pelaksanaan dan juga pemantauan program-program pembangunan sosial akan dapat dilaksanakan dengan lebih bersepadu dan berkesan di atas satu landasan yang sama.

Dari segi pelaksanaannya, DSN sebagai dasar payung bukan sahaja memberikan penekanan kepada jentera pelaksanaan yang bersepadu di semua peringkat pentadbiran, tetapi juga memberi perhatian kepada kerjasama padu multi sektor.

Bagi merealisasikan dasar ini, jentera pelaksanaan DSN telah diwujudkan di pelbagai peringkat pentadbiran termasuk di peringkat Persekutuan dengan penubuhan Majlis Sosial Negara atau MSN, Jawatankuasa Pembangunan Sosial Negara atau JPSN dan Jawatankuasa Kerja Pembangunan Sosial di peringkat kementerian iaitu JKPSK. Manakala di peringkat negeri dan daerah, mekanisme sedia ada iaitu Majlis Pembangunan Negeri iaitu MPNG dan Jawatankuasa Kerja Pembangunan Negara atau JKPNG dan Jawatankuasa Kerja Pembangunan Daerah atau JKPD terus diguna pakai bagi menyelaras perancangan, pelaksanaan, pemantauan dan juga penilaian DSN. Semua agensi kerajaan sektor sosial diwakili dalam semua peringkat majlis dan juga jawatankuasa ini.

Tuan Yang di-Pertua, berhubung dengan penglibatan sektor swasta dan juga NGO dalam pelaksanaan DSN, kerajaan sememangnya menggalakkan sokongan dan bantuan sektor swasta dan NGO. Ini adalah selaras dengan salah satu objektif DSN iaitu menjana strategi multi sektor. Malah, jentera pelaksanaan DSN yang telah dibentuk di semua peringkat itu merupakan forum perundingan yang boleh turut melibatkan sektor swasta dan NGO mengikut kesesuaian.

**Puan Lim Bee Kau:** Terima kasih Tuan Yang di-Pertua, terima kasih Timbalan Menteri di atas jawapan yang telah diberikan. Kita dapati bahawa masalah sosial kian meningkat dan Dasar Sosial Negara itu memang tepat pada masanya.

Soalan tambahan saya ialah sejauh manakah kejayaan yang dicapai dan apakah masalah-masalah yang dihadapi dalam melaksanakan dasar sosial ini? Terima kasih.

**Datuk Dr. Tiki anak Lafe:** Tuan Yang di-Pertua, terima kasih. Untuk makluman Yang Berhormat, Dasar Sosial Negara ini baru sahaja diluluskan oleh Kabinet pada Februari tahun ini dan baru sahaja dilancarkan oleh Yang Amat Berhormat Perdana Menteri sekarang atau Timbalan Perdana Menteri dahulu dan kita baru sahaja menubuhkan Majlis Sosial Negara dan juga jentera-jentera pelaksanaan yang lain, jadi DSN ini belum dilaksanakan. Saya belum lagi dapat memberitahu tentang masalah-masalah yang dihadapi oleh kita. Sekian.

9. **Dr. Yee Moh Chai [Tanjung Aru]** minta Menteri Kesihatan menyatakan sama ada negara kita telah mendapat sebarang pengajaran dari wabak SARS baru-baru ini dan sama ada langkah-langkah utama yang akan diambil untuk memastikan bahawa kesan yang dihadapi oleh negara kita hanya minimum sahaja sekiranya terdapat wabak yang sama di masa depan.

**Menteri Kesihatan [Datuk Chua Jui Meng]:** Tuan Yang di-Pertua, menurut statistik terkini yang dikeluarkan oleh Pertubuhan Kesihatan Sedunia, dalam tempoh krisis SARS, sebanyak 8,098 kes telah dilaporkan dengan 774 kematian. Krisis ini melibatkan 29 negara dan kawasan di seluruh dunia termasuk Asia, Eropah dan Amerika.

Pihak WHO telah mengeluarkan *global alert* oleh SARS pada 12 Mac tahun ini untuk memaklumkan tindakan kawalan dan pencegahan yang perlu diambil oleh semua pihak yang terlibat. Manakala pada 5 Julai tahun ini, pihak WHO telah memaklumkan bahawa penularan SARS pada manusia telah berjaya diputuskan di seluruh dunia.

Malaysia telah menjalankan langkah-langkah kawalan dan pencegahan yang sepenuhnya bagi memastikan tiada penularan SARS di Malaysia. Hasil komitmen dan kerjasama serta penglibatan semua pihak, kita telah berjaya mencegah penularan SARS di Malaysia. Lima kes SARS yang dilaporkan di Malaysia adalah kes import dari mereka yang melawat negara terjejas SARS. Tiada jangkitan tempatan SARS di Malaysia. Walaupun pihak WHO telah melaporkan tiada lagi penularan SARS pada manusia di dunia sejak 5 Julai tahun ini, Kementerian Kesihatan sentiasa membuat pemantauan ke atas SARS. Kementerian Kesihatan juga sentiasa memberikan perhatian wajar untuk menghadapi kemungkinan berlakunya SARS pada masa hadapan. Aktiviti-aktiviti yang berikut telah terus dijalankan.

Yang pertama, semua klinik dan hospital diarah untuk sentiasa berwaspada kepada kejadian kes-kes SARS. Kes-kes yang memenuhi kriteria diagnosis SARS hendaklah dikesan dengan segera dan telah dirawat dan diisolasi serta kawalan jangkitan-jangkitan dilaksanakan sepenuhnya. Konteks-konteks kes dikenal pasti dan dikenakan pengawasan dan kuarantin. Pemantauan kejadian dan berita SARS yang dilaporkan dalam media tempatan dan antarabangsa dilaksanakan. Maklumat ini akan divalidasi serta diverifikasikan untuk mengelakkan kerisauan atau panik di kalangan orang awam. Jika ada kes baru, pihak kementerian akan mengeluarkan kenyataan rasmi memaklumkan keadaan sebenar dan tindakan yang diperlukan.

Pihak Kementerian Kesihatan juga telah menyediakan satu garis panduan yang bertajuk "*Alert Enhance Surveillance and Public Health Management of SARS in the Post Outbreak Period*". Melalui garis panduan ini diperjelas aktiviti pengawasan yang perlu dijalankan dan tindakan-tindakan kawalan dan pencegahan yang perlu diambil jika ada kes SARS dikesan. Garis panduan ini diberi kepada semua hospital swasta dan kerajaan serta Pejabat Kesihatan Daerah. Semua aktiviti yang disarankan oleh pihak WHO telah diberi perhatian dalam penyediaan garis panduan ini.

Kabinet dalam mesyuaratnya pada 20 April tahun ini telah bercadang agar Kompleks Makmal Keselamatan Tahap B3 yang akan dibina di Makmal Kesihatan Awam Kebangsaan Sungai Buloh dinaikkan tarafnya ke tahap *Enhance B3* dengan peruntukan tambahan RM5 juta supaya ia boleh mengendalikan patogen yang berisiko tinggi. Secara berperingkat, ia akan dinaikkan taraf hingga mencapai tahap B4.

Makmal B3 di Institut Penyelidikan Perubatan juga akan dinaikkan taraf ke tahap *Enhance B3*. Makmal di IMR ini mempunyai keupayaan dan kepakaran dalam menjalankan ujian-ujian virologi *hi-end* termasuk isolasi virus, ujian *diagnostic, molecular VCR*, ujian

antibodi *immuno fluorescent*, *microscopy electron* dan kemahiran penjujukan virus. Sebuah pusat kawalan penyakit akan ditubuhkan di Institute of Medical Research. Kertas konsep sedang disediakan. Setakat ini IMR telah meneliti *kit-ilizer* dari Korea Selatan dan dari Centers for Disease Control, USA dan didapati kedua-duanya adalah memuaskan untuk melakukan ujian untuk memastikan kes *probable SARS*. Unit Virologi IMR kini telah diselesaikan *up-scaling* iaitu peningkatan kitar virus SARS yang diasingkan. Ini akan memudahkan penyelidikan ke atas virus SARS untuk tujuan membantu dalam diagnosis.

Kerajaan juga telah meluluskan penubuhan Institut Kebangsaan Produk Asli dan Vaksinologi di Bio-Valley. Di antara lain, ini akan membantu dalam pembangunan vaksin untuk penyakit berjangkit yang sedia ada dan yang akan muncul pada masa hadapan. Bagi tujuan memperkukuh kerjasama dan kolaborasi negara serantau dan antarabangsa, aktiviti perkongsian dan pertukaran maklumat berkaitan SARS telah diperkukuh dan diteruskan. Di rantau Asian, Malaysia akan membangunkan program untuk meningkatkan kapasiti dan kualiti makmal diagnostik bagi kawalan dan pengawasan penyakit-penyakit berjangkit. Thailand akan membangunkan program untuk meningkatkan kapasiti negara-negara ASEAN dalam pengawasan epidemiologi. Indonesia akan membangunkan rangkaian web ASEAN bagi pengedaran dan perkongsian maklumat penyakit-penyakit berjangkit.

Pihak Kementerian Kesihatan yakin aktiviti pengawasan yang sedang dijalankan ini mampu mengesan penularan SARS dan penyakit berjangkit yang lain di peringkat awal supaya respons awal dalam bentuk aktiviti kawalan dan pencegahan dapat dijalankan.

**Datuk Dr. Maximus Johnity Ongkili:** Terima kasih Tuan Yang di-Pertua. Seperti mana yang ditekankan oleh Yang Berhormat Menteri tadi, tentang konteks Malaysia setakat ini, kes-kes yang telah didapati adalah melalui kes import. Maka berasaskan kepada fakta ini, memandangkan Malaysia ini satu negara pelancongan, satu negara pusat industri di mana *corporate visitors* dengan izin, keluar masuk dan juga rakyat Malaysia rajin melancong.

Maka apakah tindakan-tindakan yang lebih khusus untuk memastikan sektor yang terlibat orang asing keluar masuk negara kita walaupun dalam bentuk *corporate visitors* ataupun pelancong itu dapat dikawal dengan lebih rapi. Adakah *early warning system* itu terus *in place* dengan izin, bagi memastikan supaya jangkitan daripada kes import ini tidak akan wujud lagi dalam keadaan di mana negara tidak bersedia. Terima kasih.

**Datuk Chua Jui Meng:** Tuan Yang di-Pertua, saya ucapkan terima kasih kepada Yang Berhormat bagi Bandau. Apa yang perlu kita lakukan ialah meningkatkan keyakinan rakyat kita sendiri dan orang asing juga yang akan datang ke negara kita pada setiap masa iaitu mereka yakin dengan langkah-langkah yang negara kita telah ambil dan akan diambil.

Umpamanya dalam wabak SARS, kegentingan krisisnyanya, WHO pilih Malaysia sebagai tempat untuk mengadakan *The Global Scientific Conference on SARS*. Ini menunjukkan keyakinan WHO terhadap Malaysia bahawa ia adalah negara yang selamat daripada ancaman SARS. Kita akan teruskan aktiviti-aktiviti pemantauan yang saya katakan tadi. Yang paling mustahak adalah pemantauan, *surveillance* perlu dijalankan setiap masa. Kalau seseorang menunjukkan tanda-tanda SARS, kita kenalalah..., bila ada tanda-tanda ini atau *symptom* ini, ia akan terus dirawat dan diasingkan di hospital. Ini akan memastikan tidak ada perebakan SARS di negara kita dan ini akan meyakinkan manusia sejagat.

**Dr. Tan Seng Giaw:** Tuan Yang di-Pertua, soalan tambahan. Memang kita sedar bahawa pihak kementerian sudah pun mengambil tindakan bukan sahaja dari segi masalah di negara ini bahkan juga di antarabangsa, bekerjasama dengan negara-negara yang lain, ini memang satu langkah ke arah yang betul dan saya juga faham bahawa bekerjasama di antara hospital-hospital ataupun penjaga-penjaga hospital di Malaysia ini dan Singapura pun semasa wabak SARS adalah baik sehingga kita dapat mencegah dengan baik.

Walau bagaimanapun, apakah terjadi dengan CDC yang dicadangkan dan mengapa hanya sekarang pihak kementerian sedar bahawa kita perlukan CDC sebab sebelum ini saya pernah bertanya dan jawapannya, adalah tidak perlu. Dan sekarang kita perlu kerana adanya SARS. Dari manakah asal usul virus SARS ini setahu pihak kementerian dan di sini saya hendak bertanya mengenai vaksin yang telah disebut oleh Yang Berhormat. Setahu saya pihak kementerian telah pun membeli berjuta-juta ringgit

untuk Vaksin JE. Apakah terjadi dengan vaksin ini? Kerajaan sudah berbelanja dengan banyak dan setakat ini kita tidak tahu disimpan di stor mana dan sekarang mungkin *date of expiry* sudah sampai.

**Datuk Chua Jui Meng:** Terima kasih kepada Yang Berhormat bagi Kepong yang sebenarnya CDC telah dirancang dahulu. Saya tidak pernah mengatakan dan saya tidak tahu Yang Berhormat mendapat maklumat dari mana dan mengatakan kita tidak perlu CDC. CDC sudah lama dirancang di Kementerian Kesihatan dan akan diwujudkan tidak lama lagi.

Yang kedua, mengenai asal usul SARS ini, kajian masih dijalankan, masih banyak tidak diketahui mengenai virus SARS ini. Mengenai vaksin, saya hendak memberitahu dan ingatkan Yang Berhormat bagi Kepong adalah seorang doktor tulen iaitu virus adalah satu mikro organisma yang susah ditangani. *The most difficult of the micro organism* ialah virus. Umpamanya HIV AIDS sampai hari ini sejak tahun 1981 sudah 67 manusia sejagat telah dijangkiti dengan virus HIV dan 25 juta orang manusia sudah meninggal dunia oleh kerana AIDS tetapi sampai kini masih belum ditemui vaksin bagi HIV AIDS. Begitu juga dengan denggi sampai kini tidak ada vaksin untuk denggi tetapi kita akan berusaha di dalam institut vaksinologi yang akan diwujudkan tidak lama lagi.

**[Masa untuk Pertanyaan-pertanyaan bagi Jawab Lisan telah tamat]**

### USUL

#### **PENGHARGAAN DAN TERIMA KASIH KEPADA YANG BERTHORMAT TUN DR. MAHATHIR BIN MOHAMAD AHLI PARLIMEN BAGI KUBANG PASU**

##### **11.01 pagi**

**Perdana Menteri [Dato' Seri Abdullah bin Haji Ahmad Badawi]:** Tuan Yang di-Pertua izinkan saya bangun membawa usul khas di bawah Peraturan Mesyuarat Dewan Rakyat 27(3) dalam persidangan Dewan kali ini yang berbunyi

“Bahawa Dewan ini,

**menerima** hakikat bahawa Ahli Parlimen bagi Kubang Pasu, yang menjadi Perdana Menteri Malaysia Keempat sejak 16 Julai 1981 dan telah berkhidmat dengan penuh dedikasi, tegas, cekap, berkesan, cemerlang dan bijaksana, telah pun mengosongkan persada kepimpinan negara;

**menghargai** serta menyanjung tinggi perjuangan, pengorbanan, budi, jasa dan bakti bekas Perdana Menteri iaitu Ahli Parlimen bagi Kubang Pasu yang amat murni, abadi serta tidak ternilai besarnya, menerusi pelbagai dasar, strategi dan program yang pragmatik, demi perpaduan dan ketahanan nasional, keselamatan dan kesejahteraan bangsa serta kemakmuran dan kegemilangan negara;

**menyedari** serta menginsafi konsistensi, kesungguhan dan keprihatinan Ahli Parlimen bagi Kubang Pasu di dalam perjuangannya memartabatkan Islam dan umat Islam di seluruh jagat, khususnya di negara Malaysia yang majmuk, menerusi penguasaan dan kecemerlangan ilmu di semua bidang kehidupan mutakhir,

**menghayati** serta menyokong penuh kebijaksanaan Ahli Parlimen bagi Kubang Pasu di dalam menangani krisis ekonomi negara akibat kedurjanaan penganas kewangan antarabangsa menerusi strategi ekonomi, kewangan dan pengurusan yang unik, efektif dan diiktiraf dunia;

**mengiktiraf** bahawa Wawasan 2020 yang diilhamkan oleh Ahli Parlimen bagi Kubang Pasu iaitu bekas Perdana Menteri adalah satu

doktrin perdana bagi perjuangan membina negara Malaysia yang terus berdaulat dan merdeka serta lebih bersatu padu, sejahtera, aman, makmur, maju, cemerlang, bermaruah dan berwibawa di era globalisasi dan neo-kolonialisme;

**mengakui** bahawa perjuangan Ahli Parlimen bagi Kubang Pasu memajukan ICT menerusi penubuhan Koridor Raya Multimedia serta memajukan bioteknologi menerusi kewujudan Lembah Bio akan memberi manfaat besar kepada bangsa dan negara Malaysia di hari muka;

**mengagumi** kewibawaan, kebijaksanaan serta keberanian Ahli Parlimen bagi Kubang Pasu yang telah memperkasa martabat bangsa dan negara Malaysia serta umat manusia di negara-negara membangun secara amnya, di arena antarabangsa, menerusi inisiatif multilateral sewilayah, di antara benua dan di seluruh jagat, serta menerusi pandangan, gagasan serta pemikirannya yang universal di bidang kemanusiaan, kesaksamaan, kesamarataan, perdagangan sains, teknologi, siasah dan keluhuran undang-undang antarabangsa, khususnya di peringkat ASEAN, APEC, NAM, OIC dan PBB;

**Maka**, Dewan Rakyat yang bersidang pada hari ini, 3 November 2003, bersamaan 8 Ramadhan 1424H, mengambil ketetapan untuk;

**Merakamkan** setinggi-tinggi penghargaan serta jutaan terima kasih dari seluruh rakyat jelata Malaysia kepada Ahli Parlimen bagi Kubang Pasu;... *[Tepuk]*

**berikrar** akan terus berjuang mempertahankan kedaulatan, kemerdekaan dan kesejahteraan tanah air menerusi seluruh dasar, strategi dan program yang telah diperkenalkan serta diperjuangkan oleh Ahli Parlimen Kubang Pasu; dan

**terus** berusaha ke arah mencemerlangkan rakyat Malaysia di hari muka berasaskan semangat Perlembagaan Persekutuan, prinsip-prinsip Rukun Negara dan juga matlamat utama Wawasan 2020."

Tuan Yang di-Pertua, Tun Dr. Mahathir bin Mohamad telah mengabadikan diri untuk negara bangsa Malaysia selama tempoh 22 tahun 3 bulan 15 hari sebagai Perdana Menteri bermula pada 16 Julai 1981 sehinggalah pada tarikh beliau bersara pada 31 Oktober lalu. Sesungguhnya khidmat beliau kepada negara bangsa bermula lebih awal dari itu. Suara bernas lagi tegas beliau mula bergema di Dewan ini sejak dipilih sebagai Ahli Parlimen bagi kawasan Kota Setar Selatan dalam pilihan raya umum yang diadakan pada 25 April 1964. Perkhidmatan beliau sebagai Ahli Parlimen terputus seketika apabila beliau tewas dalam pilihan raya umum pada Mei 1969. Pada 12 Februari 1973 beliau dilantik sebagai Ahli Dewan Negara. Dalam pilihan raya pada 24 Ogos, 1974 beliau dipilih menjadi Ahli Parlimen bagi kawasan Kubang Pasu.

Beliau lalu dilantik oleh Allahyarham Tun Abdul Razak sebagai Menteri Pelajaran apabila Tun Abdul Razak kembali ke rahmatullah, beliau di lantik oleh Allahyarham Dato' Hussein Onn sebagai Timbalan Perdana Menteri. Di bawah kepimpinan Dato' Hussein Onn beliau pernah menjawat jawatan Menteri Perdagangan dan Industri. Dalam tempoh waktu menjawat jawatan Perdana Menteri beliau turut menjadi Menteri kepada Kementerian Pertahanan, Kementerian Dalam Negeri dan Kementerian Kewangan. Ditolak 42 bulan beliau terputus menjadi Ahli Parlimen, Ahli Dewan ini, Ahli Parlimen bagi Kubang Pasu adalah orang kedua yang paling lama selepas Ahli Parlimen bagi Batu Berendam berkhidmat sebagai Ahli Parlimen.... *[Tepuk]*

Dalam tempoh hampir 36 tahun menjadi Ahli Parlimen, selama 29 tahun beliau menjadi anggota Jemaah Menteri dan selama lebih 22 tahun sebagai Perdana Menteri, sewaktu menjadi Ahli Parlimen biasa di Dewan Rakyat mahupun di Dewan Negara, beliau telah menyuarakan pendapat secara berani, secara kritis, secara terbuka, secara berterus terang, beliau memiliki identiti sebagai Ahli Parlimen yang menyuarakan pandangan bernas

dan berpendirian tegas. Beliau sentiasa membawa nada pembaharuan sering kali mendahului jauh ke hadapan dari segi pandangan, pendirian unjuran dan wawasan.

Ketika mengambil tanggungjawab sebagai Perdana Menteri negara di ambang menyambut ulang tahun kemerdekaan kali yang ke 24. Ketika beliau mengundurkan diri dari jawatan tersebut Malaysia telah menyambut hari ulang tahun kemerdekaan kali yang ke 46. Beliau mewarisi dari kepimpinan terdahulu sebagai sebuah negara yang stabil dari segi politik dan makmur dari segi ekonomi, bertapakkan gagasan sebuah negara yang aman lagi makmur, beliau telah melonjakkan pencapaian negara kepada satu tahap kejayaan yang amat membanggakan.

Pembangunan prasarana fizikal dan pembangunan sumber manusia negara berlaku paling pesat dalam tempoh beliau menjadi Perdana Menteri yang lebih penting adalah kejayaan meletakkan negara mendapat pengiktirafan dunia hingga Malaysia dijadikan negara contoh dari segi kestabilan politik, kemakmuran ekonomi, perpaduan kaum dan toleransi agama serta diiktiraf sebagai sebuah negara Islam yang paling progresif. Melalui kepimpinan beliau, negara kecil bernama Malaysia bangun untuk memainkan peranan besar di forum antarabangsa, Kerjasama Selatan-selatan diberikan nafas baru, ASEAN berjaya diperbesarkan, Persidangan Negara-negara Komanwel, Negara G15, Persidangan Negara-negara Berkecuali dan Persidangan Negara OIC dapat dianjurkan di Malaysia.

Hari ini Malaysia menjelma, menjelma sebagai negara kelapan belas terbesar dunia dari segi perdagangan. Malaysia telah menggariskan wawasan jangka panjang menjadi sebuah negara maju dalam tahun 2020. Malaysia berkeupayaan menangkis ancaman krisis kewangan 1997. Beliau berjaya membina dan menyemaikan keyakinan diri kebanggaan nasional, nilai maruah dan semangat kenegaraan di kalangan warga. Beliau adalah wira bangsa, wira negara telah mengharumkan nama negara, bangsanya di serata dunia.

Bekas Perdana Menteri pemimpin berwawasan lebih penting dari itu beliau mempunyai kesungguhan memastikan wawasan menjadi realiti. Beliau merupakan negarawan yang memenuhi aspirasi warganya dan memberikan inspirasi kepada mereka untuk mencapai aspirasi yang diimpikan. Seorang negarawan yang mendahului pemikiran warga sezaman, namun berjaya mencipta masa depan yang penuh realiti. Beliau melakukan transformasi kepada negara dari begitu bergantung kepada sumber pertanian menjadi sebuah negara perindustrian dan maju di kalangan negara membangun.

Bahawa warga dan negara amat menghargai jasa dan khidmat bakti yang telah beliau laksanakan secara amanah, secara bertanggungjawab hingga memungkinkan warga dan bangsa berada di persada kehebatan bertapak di altar kecemerlangan muncul sebagai sebuah negara yang dihormati lagi disegani.

Dewan ini Tuan Yang di-Pertua ingin merakamkan setinggi-tinggi penghargaan dan terima kasih atas segala jasa dan segala bakti, segala cetusan pemikiran, segala kebernasan pendapat, segala pengorbanan, segala khidmat, segala kesungguhan, segala kegigihan yang telah beliau buktikan.

Sesungguhnya Dewan ini juga merakamkan setinggi-tinggi penghargaan dan terima kasih kepada Yang Amat Berbahagia Tun Dr. Siti Asmah binti Mohd Ali dan seluruh anggota keluarga beliau...[Tepuk] yang turut sama melakukan pengorbanan besar untuk membolehkan beliau menumpukan tenaga, pemikiran dan masa mengabdikan diri berkhidmat bukan sekadar untuk negara dan warga Malaysia, malah di rantau ini di kalangan negara-negara membangun, di kalangan negara-negara Islam.

Kita mendoakan semoga hari-hari persaraan beliau dilimpahkan segala rahmat dan keberkatan. Semoga beliau berada dalam keadaan sihat lagi sejahtera, semoga beliau dan Tun Dr. Siti Asmah serta keluarga dilimpahkan segala kebahagiaan. Semoga khidmat bakti beliau diterima oleh Allah S.W.T sebagai amal *maa'ruf*, dianugerahkan ganjaran di dunia dan ganjaran akhirat. Sebesar-besar hadiah persaraan yang dapat warga Malaysia berikan kepada beliau adalah untuk meneruskan wawasan dan impian menjadikan Malaysia sebuah negara maju, makmur, aman dan stabil.

Saya amat bersyukur bahawa bekas Perdana Menteri telah mewariskan satu kejayaan, kejayaan mengekalkan kestabilan politik, kejayaan mengukuhkan perpaduan warga, kejayaan membangunkan ekonomi negara, kejayaan mengisi erti kemerdekaan, atas tapak kejayaan tersebut dengan bimbingan Illahi dan mengambil pedoman dari kejayaan yang telah dicipta oleh pemimpin-pemimpin terdahulu. Dengan kerjasama anggota Jemaah Menteri dan dengan sokongan dari setiap lapisan rakyat saya akan berusaha menumpukan fikiran dan tenaga meneruskan usaha membina kejayaan lebih cemerlang, lebih gemilang dan lebih terbilang.... [Tepuk]

Tuan Yang di-Pertua, izinkan saya memetik hadis yang diriwayatkan oleh Abu Daud bermaksud: *"Jikalau Allah inginkan supaya sesuatu bangsa itu sejahtera maka Tuhan memberikan bangsa itu pemimpin yang baik."* Kita bersyukur kerana Allah S.W.T telah mengurniakan negara Malaysia dengan barisan kepimpinan yang baik. Keempat-empat Perdana Menteri terawal Yang Teramat Mulia Tunku Abdul Rahman Putera - Al-Marhum, Tun Abdul Razak Hussein - Al-Marhum, Tun Hussein Onn - Al-Marhum dan Ahli Parlimen bagi Kubang Pasu, Tun Dr. Mahathir bin Mohamad telah mewariskan kepada kepimpinan terkemudian sebuah negara yang aman, stabil dan makmur. Pemimpin terkemudian berupaya membina kejayaan lebih cemerlang atas kejayaan yang telah dicipta oleh pemimpin sebelumnya. Setiap Perdana Menteri telah mencipta kejayaan dalam era kepimpinan masing-masing. Dewan ini wajar memperingati jasa dan bakti setiap Perdana Menteri. Mewariskan kepada warga sebuah negara yang stabil lagi makmur. Semoga Allah S.W.T. mencucuri rahmat ke atas mereka yang telah pergi mendahului kita kembali ke Rahmatullah.

Pada petang Jumaat 31 Oktober 2003, bersama 5 Ramadhan 1424 Hijrah, dengan ketentuan Allah S.W.T. saya telah mengangkat sumpah jawatan sebagai Perdana Menteri Malaysia Kelima... [Tepuk] Penentuan tersebut memperkukuhkan betapa kebesaran kuasa Illahi bahawa manusia sekadar merancang, Allah juga yang menentukan. Ketahuilah Allah S.W.T. adalah berkuasa dan mentakdirkan segala-galanya dalam ayat Al-Quran 68, Surah Al-Qasas, ada sepotong ayat yang maksudnya: *"Dan Tuhanmu menciptakan apa yang dirancang berlakunya, dan dialah juga yang memilih sesuatu dari makhluknya untuk sesuatu tugas ataupun keutamaan dan kemuliaannya. Tidaklah layak dan tidaklah berhak bagi sesiapa pun memilih selain dari Allah, maha suci Allah dan maha tinggilah keadaannya dari apa yang mereka sekutukan dengannya."*

Saya sedar bahawa dalam usaha nasional untuk mengurus kejayaan dan mempertingkatkan pencapaian ke tahap kecemerlangan saya mempunyai tugas dan peranan utama sebagai ketua kerajaan yang baru. Atas kesedaran itulah saya memilih untuk berucap di Dewan yang mulia ini, untuk memberi garis panduan serta menjelaskan prinsip-prinsip dan falsafah...[Tepuk] yang kita perlu pegang bersama dalam hasrat dan usaha mencapai matlamat kecemerlangan dan kegemilangan bagi negara Kita.

Saya amat-amat insaf betapa tanggungjawab ini menuntut saya melaksanakan secara amanah, cekap, jujur dan adil. Saya lebih sedar betapa tanggungjawab ini akan dinilai oleh Ahli-ahli Yang Berhormat, oleh rakyat jelata keseluruhannya. Dan lebih dari itu oleh Allah S.W.T., bahawa jawatan dan kuasa adalah satu ujian dari Allah S.W.T. Jika tanggungjawab ini dapat disempurnakan secara amanah, jujur, cekap dan adil akan berjaya lah seseorang hambanya dalam menghadapi ujian Illahi. Di sebaliknya kegagalan memenuhinya akan menjadi satu tanggungan berat untuk dihadapi baik di dunia mahupun di akhirat.

Dewan ini saya pilih sebagai tempat melafazkan ucapan utama yang ulung atas nama Perdana Menteri sebagai simbol penghormatan kepada Dewan yang mulia ini.... [Tepuk] Dewan ini adalah simbol institusi demokrasi, institusi yang dilandaskan kepada sistem syura, sistem yang mengutamakan amalan perundingan, budaya perbincangan, tempat undang-undang digubal dan dasar-dasar negara diputuskan.

Sejak pilihan raya pertama dalam tahun 1955, institusi demokrasi ini telah dapat dipertahankan. Hanya terputus untuk tempoh 21 bulan semasa pemerintahan MAGERAN. Malaysia terbukti satu-satunya negara yang berani mengembalikan kuasa kepada rakyat untuk memilih kerajaan. Institusi demokrasi paling sesuai dalam sistem kerajaan yang mengutamakan suara dan penyertaan rakyat. Institusi demokrasi perlu dipupuk untuk

mencapai tahap kematangan. Kepimpinan politik perlu memperlihatkan sebaik contoh, kepimpinan politik akan berkesan jika dapat dihormati.

Kepimpinan politik perlu memperlihatkan sifat-sifat kejujuran, kerajinan, ketekunan dan kesungguhan menjadi penggerak dan peneraju kepada kepimpinan-kepimpinan lain. Kepimpinan politik perlu memperlihatkan sikap terbuka, bersedia menerima teguran untuk menyuburkan budaya demokrasi, kepimpinan politik perlu mencerminkan imej bersih, bebas dari tohmahan dan amalan rasuah serta mengamalkan gaya hidup sederhana.... [Tepuk]

Amalan demokrasi subur jika semangat demokrasi dapat dipamerkan secara penuh bertanggungjawab oleh pelbagai pihak. Perlu diingatkan bahawa demokrasi tidak bererti kebebasan mutlak, isu-isu yang menyentuh sensitiviti agama, kaum, budaya dan bahasa, jangan sama sekali disensasikan. Sementara isu-isu yang boleh menjejaskan keselamatan negara dan ketenteraman awam perlu ditangani secara tegas. Kita perlu tegas dalam menghadapi ancaman ekstremisme, keganasan dan *militancy*. Ketegasan kerajaan menangani ancaman sedemikian perlu diberi sokongan padu demi menjamin keselamatan negara terkawal kukuh dan ketenteraman awam tidak terjejas. Warga Malaysia perlu didewasakan menjadi warga bertanggungjawab berpandukan prinsip-prinsip Rukun Negara membina masyarakat yang berasaskan dengan semangat kepercayaan kepada Tuhan, kesetiaan kepada Raja, keluhuran Perlembagaan, kedaulatan undang-undang, kesopanan dan kesusilaan.

Tuan Yang di-Pertua, kejayaan yang diwarisi pada hari ini tidak mungkin kekal jika kreativiti dan inovasi tidak dijadikan sebahagian daripada budaya masyarakat Malaysia. Kemudahan fizikal bertaraf dunia pertama perlu diperengkap dengan warga berfikiran dan berbudaya dunia pertama, pembangunan sumber manusia perlu dipertingkatkan supaya warga diibandingkan pembangunan dari segi fizikal, mental dan spiritual.

Manusia merupakan input terpenting dalam ekonomi berlandaskan pengetahuan. Oleh itu negara perlu memastikan bahawa pendidikan berkualiti disediakan untuk memberi seluas-luas peluang kepada setiap warga Malaysia memperoleh tahap pendidikan setinggi yang boleh, di samping usaha ke arah membekalkan ilmu dan meningkatkan kemahiran, pengisian dalaman amatlah penting dalam membangunkan barisan warga yang memiliki jati diri dan daya tahan untuk menghadapi persaingan dunia sejagat.

Sistem nilai yang betul perlu dipupuk demi melindungi warga dari terlalu dilanda budaya materialistik sehingga sanggup melakukan apa sahaja kerana kepentingan kebendaan atau kepentingan sempit kumpulan dan peribadi. Sumber baru bagi menjamin pertumbuhan ekonomi negara perlu diterokai. Pendekatan baru menguruskan kegiatan ekonomi sedia ada perlu dirintis demi menjamin daya saing dan daya tahan negara dapat dipertingkatkan.

Pembangunan pulangan ekonomi perlu memperlihatkan kesaksamaan yang dinikmati oleh seramai mungkin rakyat. Pembangunan luar bandar perlu dirangka dalam arus perdana ekonomi melalui program yang dapat meningkatkan sumber kekayaan penduduk desa. Warga Malaysia hendaklah berani menghadapi dan melakukan perubahan. Bidang-bidang teknologi komunikasi dan maklumat, sains teknologi dan pertanian moden masih belum cukup diterokai, dan untuk itu amat perlu dipertingkatkan usaha-usaha penyelidikan dan pembangunan.

Agenda pembangunan masyarakat bumiputera baik untuk melahirkan masyarakat perdagangan dan perindustrian, mahu pun masyarakat sains dan teknologi bumiputera hendaklah mencerminkan kesaksamaan pembahagian dan diasaskan kepada meritokrasi di kalangan masyarakat bumiputera supaya masyarakat bumiputera akan benar-benar dihormati keupayaannya, supaya keadilan dapat benar-benar diamalkan di kalangan semua bumiputera, menyetepikan bumiputera yang benar-benar layak dan berkebolehan, walau apa pun alasannya akan lebih merugikan masyarakat bumiputera dan jangka masa panjang.

Negara mengiktiraf peranan sektor swasta untuk menjana pertumbuhan ekonomi. Sektor swasta diharap memainkan peranan lebih penting dan lebih aktif terutama mencipta peluang-peluang baru ekonomi, sekali gus menyediakan pekerjaan. Hasrat tersebut menuntut kepada peranan sektor awam yang lebih cekap terutama dalam memperbaiki

sistem penyampaian. Sektor awam hendaklah secara lebih radikal mengubah diri hanya dari peranan kawal selia dan penguatkuasaan undang-undang kepada peranan pemudah cara, membantu secara berkesan, menjayakan usaha dan peranan sektor swasta dengan secara lebih cekap, lebih cepat dan lebih telus.

Sektor awam berperanan penting memastikan dasar-dasar negara dilaksanakan secara berkesan, secara telus, mencerminkan imej perkhidmatan yang bersih dan bebas dari rasuah. Kakitangan awam hendaklah menghayati sedalam-dalamnya slogan 'Bersih, Cekap dan Amanah' hingga dapat dijemakan dalam budaya kerja dan dapat mempamerkan corak kepimpinan melalui teladan. Layanan mesra dan saksama kepada rakyat terutama kepada kumpulan bawahan, di kalangan warga miskin, di kalangan rakyat biasa, di kalangan yang tidak berpangkat dan tidak berkedudukan, di kalangan yang tidak memiliki nama besar dan tidak mempunyai gelaran, amat perlu diutamakan.

Rasuah adalah amalan jijik. Pendekatan lebih berkesan menangani rasuah hendaklah diterokai. Pendekatan pencegahan sama penting dengan pendekatan punitif. Pendekatan pencegahan yang lebih berkesan perlu difikirkan, antaranya melalui usaha mempercepatkan proses kerja, mengurangkan *red tape*, memperbaiki sistem penyampaian, meningkatkan mutu kerja dan melakukan audit kerja yang lebih kerap. Saya menyeru supaya matlamat membina perkhidmatan awam yang sifar rasuah tidak digagalkan oleh amalan kurang sihat di kalangan pihak swasta dan pihak yang tidak berada di dalam kerajaan.

Keutuhan negara bertambah kukuh jika undang-undang dikuatkuasakan secara tegas, secara telus. Keberkesanan pencegahan jenayah perlu ditingkatkan. Jenayah yang mempengaruhi nilai moral perlu dibanteras. Kumpulan-kumpulan yang menjalankan rangkaian gelap perlu diperangi dan mereka yang bersubahat dengan kumpulan tersebut perlu didedahkan. Keselamatan harta benda dan keselamatan diri terutama bagi wanita, kanak-kanak dan pengunjung ke negara ini perlu dijamin melalui komitmen dan kesungguhan pihak-pihak yang bertanggungjawab menjalankan tugas.

Tuan Yang di-Pertua, negara kita bukan sahaja muda dari segi usia tetapi memiliki komposisi rakyat yang majoritinya muda. Malaysia perlu menjadi bumi tempat bertapak dan langit tempat memberi naungan kepada memenuhi harapan generasi muda. Oleh itu, penyertaan warga muda hendaklah digalakkan. Tenaga, fikiran dan idealisme warga muda perlu dibawa dalam arus perdana pembangunan negara dengan menggalakkan perkembangan minda dan intelek, mencambahkan idea, inovasi, ciptaan dan kreativiti.

Institusi keluarga berperanan penting dan perlu diperkukuhkan. Mendidik warga muda meletakkan nilai tinggi terhadap institusi keluarga dan membina keluarga bahagia wajib dilakukan demi memastikan bahawa warga tua akan terus dihargai, dimuliakan, disayangi dan diberikan perhatian sesuai dengan ajaran Islam dan budaya masyarakat Timur. Wanita merupakan 50% dari komposisi rakyat, layanan seimbang tanpa prejudis dan diskriminasi terhadap wanita perlu diperlihatkan baik di peringkat penggubalan dasar, di peringkat pelaksanaan dan di peringkat penyertaan. Peranan mereka perlu diiktiraf kepentingannya.... [*Tepuk*]

Tuan Yang di-Pertua, globalisasi serta teknologi komunikasi dan maklumat telah menjadikan dunia hari ini semakin terangkai. Negara tidak lagi dan tidak boleh hidup secara isolasi. Kita perlu bertekad membangunkan negara menjadi satu wadi di rantau ini, menarik pelaburan asing, meningkatkan perdagangan antarabangsa serta menjayakan pertemuan budaya. Dalam menghadapi cabaran permainan politik kuasa besar, kerajaan tidak akan mengorbankan kepentingan negara dan sama sekali tidak berkompromi dalam mempertahankan kedaulatan negara bangsa.... [*Tepuk*] Malaysia kekal dan tetap tegas dengan pendirian menuntut keadilan sejagat. Kita akan melakukan pelbagai ikhtiar memastikan ekonomi dunia lebih saksama dan aturan politik dunia dilandaskan kepada undang-undang antarabangsa. Prinsip ini akan kita jadikan pegangan dalam memenuhi peranan sebagai Pengerusi NAM dan OIC.

Tuan Yang di-Pertua, dalam mengambil tanggungjawab berat ini saya memberikan jaminan untuk meneruskan segala dasar yang telah digariskan oleh pemimpin-pemimpin sebelum saya. Wawasan 2020 akan terus menjadi inspirasi memacu kita melakukan

pembangunan secara komprehensif untuk mencapai taraf negara maju. Kita juga perlu mengusahakan emansipasi dan pengukuhan dalam segala aspek pembangunan manusia dari segi sosial, moral, etika dan politik. Dasar Wawasan Negara akan terus dijadikan rangka strategik kepada dasar ekonomi negara.

Semangat Dasar Ekonomi Baru untuk memastikan penyusunan masyarakat yang dapat membina perpaduan nasional dan agenda membasmi kemiskinan tidak harus sama sekali diabaikan. Semangat perkongsian kuasa yang menjadi kekuatan kita berkerajaan dan bernegara akan diperkukuhkan. Amalan Raja Berperlembagaan dan Demokrasi Berparlimen disokong dengan menghormati piagam pembahagian kuasa di antara kuasa Perundangan, kuasa Eksekutif dan kuasa Kehakiman, nyata terbukti memberikan satu bentuk semak dan timbang yang amat berkesan untuk menyekat sebarang salah guna kuasa dari berlaku.

Hari ini saya mewarisi tanggungjawab kepimpinan bagi sebuah negara yang telah mencapai kejayaan. Tugas dan tanggungjawab berat ini tidak mungkin dapat dilaksanakan secara berseorangan. Untuk itu, saya mohon mendapat kerjasama dan sokongan dari setiap Ahli Yang Berhormat, dari para pentadbir, dari pihak swasta, dari kumpulan politik, dari pihak media malah dari setiap seorang warga Malaysia membantu saya membawa Malaysia mencapai kejayaan lebih cemerlang, lebih gemilang dan lebih terbilang. Insya-Allah.... [Tepuk]

Kepada Allah S.W.T. kepadaMu Ya Allah, hambaMu ingin memohon petunjuk dan hidayah, kekuatan dan kecekalan, kesabaran dan kesungguhan. Terima kasih... [Tepukan gemuruh]

**Tuan Yang di-Pertua:** Ya.

**11.33 pagi**

**Menteri Perumahan dan Kerajaan Tempatan [Dato' Seri Ong Ka Ting]:** Tuan Yang di-Pertua, saya mohon untuk menyokong Usul yang dibentangkan oleh Yang Amat Berhormat Perdana Menteri supaya Dewan yang mulia ini merakamkan setinggi-tinggi penghargaan dan jutaan terima kasih dari seluruh rakyat jelata kepada Ahli Parlimen bagi Kubang Pasu.

Tuan Yang di-Pertua, sebelum saya meneruskan ucapan selanjutnya, bagi pihak parti MCA, saya ingin mengucapkan setinggi-tinggi tahniah kepada Ahli Parlimen Kepala Batas, Yang Amat Berhormat Dato' Seri Haji Abdullah bin Haji Ahmad Badawi, kerana telah dilantik menjadi Perdana Menteri Malaysia yang kelima... [Tepuk] Dengan sokongan semua lapisan masyarakat di negara kita. Kami berikrar memberi sokongan padu dan kerjasama yang sepenuhnya kepada Yang Amat Berhormat Perdana Menteri yang kita sanjung tinggi.

Tuan Yang di-Pertua, Yang Berhormat Ahli Parlimen Kubang Pasu, Tun Dr. Mahathir Mohamad, telah memulakan persaraan pada 31 Oktober 2003 yang lalu setelah berkhidmat kepada negara dan rakyat selama 22 tahun tiga setengah bulan sebagai Perdana Menteri Malaysia.

Kehibaan terhadap persaraan Yang Berhormat Tun Dr. Mahathir Mohamad, begitu dirasai oleh segenap masyarakat berbilang kaum di negara kita. Rakyat negara kita tetap akan merindukan Yang Berhormat Tun Dr. Mahathir kerana beliau memimpin dan membimbing kita selama lebih 22 tahun sebagai Perdana Menteri dengan begitu berjaya dan cemerlang. Beliau adalah negarawan yang telah memimpin kita untuk mencapai arah tuju menjadi negara maju, menjelang 2020, beliau adalah berjaya mencetuskan semangat arah tuju dan keyakinan diri ke dalam jiwa rakyat Malaysia. Jasa dan bakti beliau kepada negara adalah begitu besar. Penghargaan kita melalui segala ucapan sama ada melalui kata-kata, tulisan, iklan, ataupun acara-acara dalam beberapa hari yang lalu dan seterusnya, masih tidak dapat ditunjuk atau digambarkan dengan sepenuhnya.

Tuan Yang di-Pertua, memang kita tidak dapat menafikan kejayaan Malaysia hari ini di semua bidang sama ada ekonomi, pendidikan, politik, sains, teknologi, industri, sukan ataupun semua bidang yang lain, kesemuanya berhubung kait rapat dengan dasar-dasar dan panduan arah diberi oleh bekas Perdana Menteri kita. Beliau memang adalah seorang

pemimpin yang luar biasa dari segi pemikiran, kemampuan, kecergasan, keberanian dan ketokohan. Walaupun Malaysia adalah sebuah negara yang kecil tetapi di bawah kepimpinan Yang Berhormat Tun Dr. Mahathir Mohamad, Malaysia dilihat sebagai sebuah negara yang bermaruah dan disanjung tinggi oleh kebanyakan negara di dunia. Bekas Perdana Menteri telah membina keyakinan diri dalam jiwa rakyat Malaysia dan beliau adalah yang berjaya menimbulkan perasaan bangga kita menjadi rakyat Malaysia.

Di arena antara bangsa, Malaysia adalah negara yang sentiasa berani tampil ke depan untuk membela nasib negara-negara yang ditindas oleh kuasa besar dunia terutamanya kuasa Barat. Bekas Perdana Menteri berpegang kuat kepada prinsip keadilan dan kebenaran. Beliau tidak pernah tunduk kepada tekanan dari luar untuk menyuarakan pandangan dan pendirian Malaysia berhubung isu-isu antara bangsa.

Status beliau sebagai pemimpin dunia memang diiktiraf oleh semua pihak apabila beliau mewakili Malaysia dipilih sebagai Pengerusi NAM dan OIC yang masing-masing mewakili negara-negara sedang membangun dan negara-negara Islam. Imej dan kedudukan Malaysia yang kian meningkat di masyarakat antara bangsa menjadikan Malaysia dikenali dan dihormati oleh seluruh dunia.

Tuan Yang di-Pertua, di bawah pimpinan Yang Berhormat bekas Perdana Menteri, Barisan Nasional telah menjadi satu *coalition* politik yang paling kukuh dan paling lama berkuasa di dunia. Beliau juga berjaya memimpin Barisan Nasional mencapai kecemerlangan, kemenangan cemerlang dalam pilihan raya umum sebanyak lima penggal berturut-turut sejak tahun 1982... [Tepuk] Ini satu rekod yang memang sukar dipecahkan dan menjadi kebanggaan semua penyokong Barisan Nasional. Kejayaan Malaysia yang kini muncul sebagai sebuah negara sedang membangun yang paling moden dan maju di dunia adalah hasil kepimpinan beliau yang berkaliber, strategik, berdinamik dan berwawasan.

Projek-projek pemodenan besar yang diilhamkan dan dilaksanakan oleh beliau, seperti Lebuhraya Utara Selatan, Lapangan Terbang Antarabangsa KLIA, Menara Berkembar Petronas, Putrajaya, MRT, ERL, Westport, Pelabuhan Tanjung Pelepas, Koridor Raya Multimedia dan banyak lagi projek pembangunan telah dapat meningkatkan tahap pembangunan negara.

Memang tepat dan sesuai Yang Berhormat bagi Kubang Pasu, Tun Dr. Mahathir Mohamad, digelar sebagai "Bapa Pemodenan Malaysia" telah berjaya mengubah wajah Malaysia dari sebuah negara pertanian yang miskin kini muncul menjadi sebuah negara perindustrian moden yang mampu bersaing dengan negara-negara maju. Kedudukan Malaysia sebagai negara perdagangan yang ke-17 terbesar di dunia membuktikan kekuatan Malaysia dari segi ekonomi.

Tuan Yang di-Pertua, selain dari kemajuan ekonomi, kestabilan sosial dan keharmonian dan perpaduan kaum merupakan faktor-faktor yang penting, membolehkan Malaysia membangun dengan pesat dan juga merupakan antara pencapaian terbesar Ahli Parlimen bagi Kubang Pasu, Yang Berhormat Tun Dr. Mahathir Mohamad.

Tuan Yang di-Pertua, masyarakat Cina sememangnya menyanjung tinggi kepimpinan Yang Berhormat Tun Dr. Mahathir Mohamad kerana beliau sentiasa prihatin dan peka kepada masalah-masalah yang dihadapi oleh masyarakat Cina dan sudi memberi bantuan untuk menyelesaikan dengan baik. Bagi pihak masyarakat Cina, saya ingin merakamkan setinggi-tinggi penghargaan dan mengucapkan berbilang-bilang terima kasih kepada Yang Berhormat Tun Dr. Mahathir Mohamad atas segala bantuan dan kerjasama yang diberi kepada masyarakat Cina di Malaysia selama ini.... [Tepuk]

Tidak lupa juga bagi pihak MCA saya merakamkan setinggi-tinggi penghargaan dan penghormatan kepada Yang Berhormat Tun Dr. Mahathir Mohamad kerana telah memberi sokongan kepada MCA dalam banyak aspek seperti projek pembangunan Kolej Tunku Abdul Rahman dan penubuhan Universiti Tunku Abdul Rahman di samping memainkan peranan yang positif selaku Pengerusi Barisan Nasional untuk membantu pucuk pimpinan MCA dalam pelbagai cabaran yang dihadapi oleh parti MCA selama ini.

Tuan Yang di-Pertua, MCA dan pertubuhan-pertubuhan masyarakat Cina memberi sokongan padu dan kerjasama yang sepenuhnya kepada Perdana Menteri, Yang Amat Berhormat Dato' Seri Abdullah bin Haji Ahmad Badawi, yang baru mengambil alih tanggungjawab untuk memimpin Kerajaan Persekutuan dan Barisan Nasional.... [Tepuk]

MCA mempunyai keyakinan penuh bahawa di bawah pimpinan Yang Amat Berhormat Dato' Seri Abdullah bin Haji Ahmad Badawi, Malaysia akan terus maju dan berjaya kerana beliau adalah seorang pemimpin yang berpengalaman, bijaksana, berprinsip, adil, peka dan sensitif, berpandangan jauh dan berjiwa rakyat. Sudah tentu Yang Amat Berhormat Perdana Menteri dan Kerajaan Barisan Nasional akan berusaha dengan lebih gigih untuk merealisasikan wawasan dan aspirasi Yang Berhormat bekas Perdana Menteri menjadikan Malaysia sebuah negara maju pada tahun 2020.

Sesungguhnya menyokong dan memberi kerjasama yang sepenuhnya kepada Yang Amat Berhormat Perdana Menteri mulai sekarang untuk meneruskan perjuangan bekas Perdana Menteri adalah merupakan ucapan terima kasih yang paling berkesan dan bermakna.

Tuan Yang di-Pertua, sekali lagi saya ucapkan jutaan terima kasih kepada Yang Berhormat Ahli Parlimen Kubang Pasu, Tun Dr. Mahathir bin Mohamad atas segala sumbangan, pengorbanan, jasa dan bakti beliau kepada negara dan rakyat. Negarawan yang amat kita hormati ini akan dikenang oleh semua rakyat untuk selama-lamanya. Semoga Yang Berhormat Tun Dr. Mahathir bin Mohamad dan Yang Amat Berbahagia, Tun Dr. Siti Hasmah binti Mohamad Ali dan semua ahli keluarga beliau akan terus hidup dalam keadaan sihat, bahagia dan sejahtera.

Tuan Yang di-Pertua, saya mohon untuk menyokong usul ini. Terima kasih.

**Tuan Yang di-Pertua:** Ahli-ahli Yang Berhormat, masalahnya ialah Usul Yang Amat Berhormat Perdana Menteri sekarang terbuka untuk di bahas. Ya, sila.

#### 11.42 pagi

**Menteri Kerja Raya [Dato' Seri S. Samy Vellu]:** Tuan Yang di-Pertua, saya bagi pihak MIC dan keseluruhan rakyat keturunan India, menyokong penuh usul ucapan terima kasih yang dibentangkan oleh Yang Amat Berhormat Dato Seri Abdullah bin Haji Ahmad Badawi, Perdana Menteri kita di Dewan yang mulia ini. Saya ingin merakamkan ucapan setinggi terima kasih dan penghargaan atas segala khidmat bakti yang diberikan oleh Yang Amat Berbahagia Tun Dr. Mahathir bin Mohamad kepada negara ini semasa kepimpinan beliau. Yang Amat Berbahagia Tun Dr. Mahathir bin Mohamad ialah seorang daripada pemimpin Asia yang ulung dan kukuh yang membangunkan Malaysia moden.

Sumbangan beliau kepada Malaysia bukan sedikit, malah terlalu banyak jika ingin disenaraikan satu persatu sehingga kita mungkin terpaksa melanjutkan sesi Parlimen ini.... [Disorak] Sumbangan beliau yang paling penting ialah idea dan inisiatif. Inisiatif beliau dalam membawa Malaysia dari sebuah ekonomi berasaskan pertanian kepada yang berasaskan industri pada pertengahan tahun 80an. Berikutan langkah berani dalam percubaan bersaing dengan negara-negara maju, Yang Amat Berbahagia Tun Dr. Mahathir bin Mohamad memperkenalkan pula slogan *Malaysia Boleh*. Malaysia bila-bila pun boleh.... [Ketawa]

Tuan Yang di-Pertua, di bawah kepimpinan Yang Amat Berbahagia Tun Dr. Mahathir bin Mohamad, Malaysia telah menikmati pembangunan ekonomi yang mantap dan kestabilan politik. Beliau telah berjaya memastikan Barisan Nasional terus memerintah negara ini dalam setiap pilihan raya umum. Saya harap dan mohon doa kepada Tuhan, kita terus memajukan dan memerintah kerajaan ini di bawah kepimpinan Yang Amat Berhormat Dato Seri Abdullah bin Haji Ahmad... [Tepuk] Betul ke tidak?

**Beberapa Ahli:** Betul.

**Dato' Seri S. Samy Vellu:** Malaysia turut mendapat penghormatan dunia kerana sumbangan Yang Amat Berbahagia Tun Dr. Mahathir bin Mohamad. Bukannya dari mana-mana pemimpin. Beliau berjaya meletakkan Malaysia pada peta dunia dan menjadikan negara kita negara contoh yang dikagumi banyak negara termasuk negara-negara maju.

Beliau juga telah mengubah minda rakyat Malaysia menjadi lebih proaktif. Yang Amat Berbahagia Tun Dr. Mahathir bin Mohamad adalah seorang wira bangsa. Beliau bukan sahaja menjadi wira negara kita tetapi juga wira dunia ketiga. Dunia sanjung beliau sebagai seorang pemimpin yang dinamik. Nama beliau menjadi sebutan di seluruh dunia kerana sifat beliau yang tegas dan berprinsip.

Hari ini dunia mengenali Yang Amat Berbahagia Tun Dr. Mahathir bin Mohamad sebagai seorang Perdana Menteri yang berjaya menangani berbagai krisis dalaman dan antarabangsa. Beliau juga dikenali sebagai dengan izin, *economic wizard* setelah menyelamatkan negara daripada krisis ekonomi dan mata wang pada tahun 1998. Beliau telah berjaya mengangkat martabat Malaysia menjadi pemain global yang penting dan diiktiraf. Pandangan serta suara lantang Yang Amat Berbahagia Tun Dr. Mahathir bin Mohamad mengenai isu-isu antarabangsa termasuk yang membabitkan negara-negara Islam dan dunia ketiga didengari.

Yang Amat Berbahagia Tun Dr. Mahathir bin Mohamad adalah pemimpin serba boleh yang mungkin hanya satu dalam sejuta atau dengan izin *one in a million*. Tuan Yang di-Pertua, beliau adalah doktor, beliau juga arkitek, arkitek yang telah membina negara ini. Beliau juga jurutera, jurutera membantu arkitek untuk membina. Beliau juga artis, beliau juga pakar niaga dan penceramah, beliau juga adalah guru, guru memikir, perancang dan pelaksana. Beliau adalah bapa dan sahabat. Paling penting beliau adalah negarawan terulung yang dilahirkan di bumi bertuah ini.... [*Tepuk*] Jasa Yang Amat Berbahagia Tun Dr. Mahathir bin Mohamad akan terus dikenang dan akan dijadikan contoh oleh semua lapisan masyarakat dalam usaha mencapai pembangunan dan kemajuan bangsa dan negara.

Rakyat Malaysia harus mencontohi semangat perjuangan beliau kerana semangat inilah yang telah menjadikan negara kita aman dan makmur baik dari segi politik mahupun ekonomi. Kita amat bertuah dan berterima kasih kepada Yang Amat Berbahagia Tun Dr. Mahathir bin Mohamad kerana telah memberikan kita seorang pengganti, seorang tokoh pemimpin yang berwibawa dan handal seperti Yang Amat Berhormat Dato' Seri Abdullah bin Haji Ahmad Badawi.... [*Tepuk*] Rakyat Malaysia akan terus menikmati pembangunan dan keamanan di bawah kepimpinan Perdana Menteri kita yang baru.

Kita akan memberikan sokongan yang padu kepada Yang Amat Berhormat Dato' Seri Abdullah bin Haji Ahmad Badawi dalam mentadbir negara ini seperti yang kita telah berikan kepada Yang Amat Berbahagia Tun Dr. Mahathir bin Mohamad selama ini.

Tuan Yang di-Pertua, hadiah terbesar rakyat Malaysia boleh diberikan kepada Yang Amat Berbahagia Tun Dr. Mahathir bin Mohamad ialah merealisasikan wawasan beliau, wawasan negara untuk meletakkan Malaysia sebagai negara maju menjelang tahun bukan sahaja 2020, seribu-ribu tahun. Saya berdoa kepada Tuhan, seribu-ribu tahun ini akan menjadi kenyataan. Terima kasih.... [*Tepuk*]

**Tuan Yang di-Pertua:** Kepong.

**11.50 pagi**

**Dr. Tan Seng Giaw:** [*Pembesar suara lambat berfungsi*] Ya, pembesar suara kita mesti cepat sedikit di zaman yang moden ini....

**Tuan Yang di-Pertua:** Ya.

**Dr. Tan Seng Giaw:** Tuan Yang di-Pertua, saya bangun untuk mengambil bahagian di dalam perbahasan ini. Yang pertama, saya mengucapkan tahniah kepada Yang Amat Berhormat bagi Kepada Batas yang menjadi Perdana Menteri yang kelima. Memang kita tidak sangka. Pada tahun 1958 hingga 1959, di Methodist Boys School, Jalan Air Hitam Pulau Pinang sampai ke sini, setengah abad sudah. Kita boleh sambut dengan minuman halia...

[*Dewan gamat dengan ketawa*]

**Seorang Ahli:** Sama Tongkat Ali.

**Dr. Tan Seng Giaw:** ...[Ketawa] Tuan Yang di-Pertua, mudah-mudahan Yang Amat Berhormat dapat menerajui kepimpinan negara ini kepada satu tahap yang lebih tinggi, warisan daripada Yang Berhormat bagi Kubang Pasu.

Tuan Yang di-Pertua, rakyat di Malaysia mestilah menghayati semangat Perlembagaan Persekutuan dengan Demokrasi Berparlimen sebagai sistem pentadbiran seperti mana yang terkandung di dalam usul ini. Kita memang berjuang mempertahankan kedaulatan, kemerdekaan dan kesejahteraan tanah air. Kita juga memelihara, menghayati dan mempertahankan Perlembagaan Persekutuan yang berteraskan kepada Demokrasi Berparlimen dan baiklah Yang Amat Berhormat bagi Kepala Batas kembali ke Dewan ini untuk memberi ucapan yang pertama, yang sulung sebagai Perdana Menteri untuk menghormati kepada Sistem Demokrasi Berparlimen dan saya berharap beliau dapat memperkembangkan konsep ini untuk seluruh negara bagi kebaikan rakyat kita.

Segala dasar dan amalan harusnya mengambil kira keadaan dan suasana ala Malaysia. Kita tidak boleh meniru negara-negara lain termasuk Amerika Syarikat seratus peratus. Yang Berhormat bagi Kubang Pasu mengatakan demikian, dan ini tidak salah. Tahun lepas saya memberitahu Yang Berhormat bagi Kubang Pasu bahawa apabila kita menilai seseorang terutamanya tokoh politik, kita patutlah mengadakan dua ruangan. Satu ruangan bagi jasanya dan satu lagi untuk dosanya...

**Beberapa Ahli:** [Ketawa]

**Dr. Tan Seng Giaw:** Pada akhirnya, Tuhan sahaja yang dapat menentukan. Pada akhirnya, jika jasanya adalah lebih baik, lebih banyak daripada dosanya, beliau adalah seorang yang baik. Kita bukan manusia yang kamil.

Yang Berhormat bagi Kubang Pasu mengatakan bahawa ia adalah seperti pertimbangan dengan mesin timbang atau dalam istilah beliau, seperti dacing. Saya berharap dacing baris sana itu adillah kepada semua, bukan dacing yang berat sebelah. Seandainya seorang ahli politik berjasa, berbakti, melakukan banyak kebaikan kepada rakyat, orang ramai akan menghormati dan mengenanginya untuk selama-lamanya.

Mentadbirkan negara boleh disifatkan mengemudikan sebuah kapal. Perdana Menteri adalah seorang Kapten dan pegawai-pegawainya ahli-ahli Kabinet. Kaptennya adalah hanya seorang sahaja. Jika Kapten ini bersih, cekap dan beramanah seperti Yang Amat Berhormat bagi Kepala Batas sebut tadi, pegawai-pegawainya akan ikut teladan. Para kelasi dan penumpangya selamat. Begitu juga dengan Perdana Menteri. Ada sesetengah orang sentiasa hendak mengambil hatinya kerana tujuan yang tertentu. Bukan main, setelah memanjat kepada jawatan Perdana Menteri, ramai yang mengerumuni. Itu memang satu tabiat dan tabii manusia.

Akan tetapi Perdana Menteri harus menurut tindakan dan amalan seseorang sebelum melantiknya. Meritokrasi yang disebut tadi. Beliau selalu mendengar nasihat dan cadangan, tidak mudah tersinggung dan tidak menaikkan marah, merah di cuping telinganya di atas kritikan yang tajam dan tidak menggunakan kuasa dengan sewenang-wenang dan saya berharap Yang Amat Berhormat tidak akan menggunakan ISA dengan sewenang-wenang... [Tepuk] [Ketawa]

**Tuan Haji Mahfuz bin Haji Omar:** Dia sudah guna. Dia sudah guna sebagai Menteri Dalam Negeri.

**Dr. Tan Seng Giaw:** Ini lain dahulu. Sebagai Perdana Menteri, lain.

**Tuan Yang di-Pertua:** Yang Berhormat, Yang Berhormat, Yang Berhormat, ya...

**Dr. Tan Seng Giaw:** Enam bulan yang lepas, Yang Berhormat bagi Kubang Pasu membentangkan usul menentang Amerika Syarikat mencero bohi Iraq. Ini adalah langkah yang betul. Saya sebut sedemikian:

*Burung Merbuk terbang melayang,  
Hinggap bertenggek di dahan mati,  
Kalau menepuk air di dulang,  
Nanti memercik ke muka sendiri... [Tepuk]*

Amerika Syarikat menduduki Iraq tetapi tiap-tiap hari air memercik ke mukanya. Beberapa askarnya terkorban setiap hari dan Iraq terus bergolak. Mudah-mudahan Amerika Syarikat berundur dengan cepat bagi membolehkan orang-orang Iraq sendiri mentadbirkan negaranya.

Yang Berhormat bagi Kubang Pasu memang bersuara dengan begitu lantang di forum-forum antarabangsa untuk menuntut bagi pihak orang-orang yang tertindas, teraniaya, menuntut keadilan, menuntut kesaksamaan, menuntut demokrasi dan menuntut kebebasan media. Kita pun pernah mengharapkan beliau mengkaji semula demokrasi, keadilan dan kebebasan media di dalam negara sendiri. Dengan izin; *in measure for measure, William Shakespeare writes: "Our doubts are traitors and make us lose the good we oft might win by fearing to attempt"*.

*This does not apply to* Yang Berhormat bagi Kubang Pasu. *He has been on the square.* Beliau berterus terang, *outspoken*, pencucuh. Sifat itulah yang menjadikan kekuatan, karisma dan juga kelemahannya. Dari *The Malay Dilemma* hingga komen terhadap Yahudi di Sidang OIC baru-baru ini. Hampir separuh abad dengan sifat berterus terang dan pencucuh, ada kalanya kata-kata beliau menjengkelkan sesetengah orang.

Ada perkara-perkara yang saya tidak setuju dengan Yang Berhormat bagi Kubang Pasu semacam pengisytiharan Malaysia sebagai *Islamic State* di Konvensyen Gerakan pada 29 September 2001. Terdapat tafsiran yang berbeza-beza mengenai semangat Perlembagaan Persekutuan. Rasuah adalah penyakit yang boleh menjadi seumpama wabak SARS seperti yang diketahui oleh Yang Berhormat Menteri Kesihatan kita. Kebudayaan politik wang masih berterusan. Inilah satu cabaran yang besar bagi Yang Amat Berhormat bagi Kepala Batas.

Pelbagai projek adalah kena-mengena dengan Yang Berhormat bagi Kubang Pasu seumpama Wawasan 2020, KLIA, Putrajaya, Menara Petronas, LRT, monorel, kita mestilah memastikan semua projek adalah berbaloi dengan harganya. Yang Berhormat bagi Kubang Pasu hendak mendirikan Putrajaya di Janda Baik. Bukan 'janda merana' tetapi Janda Baik. Namun kerana faktor-faktor yang tertentu, pusat pentadbiran negara itu telah dibangunkan di Sepang. Memang pada satu hari kelak, Yang Berhormat bagi Kubang Pasu mungkin akan mencatatkan faktor-faktor yang menyebabkan Putrajaya dibangunkan di Sepang, bukan di Janda Baik.

Dengan penuh tenaga dan staminanya Yang Berhormat bagi Kubang Pasu melafazkan Bahasa Malaysia yang hampir serupa dengan *Malaysian Malaysia* nya dan *Multimedia Super Corridor* iaitu MSC kita, yang saya berharap dapat diperluaskan kepada Pulau Pinang dan kepada seluruh negara. Beliau cuba menukarkan fikiran atau *mindset* orang-orang Malaysia terutamanya orang-orang Melayu. Beliau meminda Perlembagaan di dalam krisis 1993, 1974 menjamin tiada orang yang dikecualikan daripada undang-undang dengan izin, Tuan Yang di-Pertua, *no body is above the law.*'

Tahun lepas, Yang Berhormat bagi Kubang Pasu ajak saya untuk minum kopi tetapi yang membayarnya bukan beliau disebabkan ramai yang mengerumuni Perdana Menteri. Beliau masih hutang saya secawan kopi..... [*Dewan riuh*] [*Ketawa*] Yang Berhormat bagi Kubang Pasu tidak melupakan kawannya dan tidak juga menyenangkan lawannya. S

Sekian, terima kasih.

**Tuan Yang di-Pertua:** Ya, Kinabalu.

**12.05 tgh.**

**Tan Sri Bernard Giluk Dompok [Kinabalu]:** Tuan Yang di-Pertua, saya ingin menyokong usul penghargaan kepada Ahli Yang Berhormat bagi Kubang Pasu di atas sumbangan kepimpinan beliau kepada negara sepanjang 22 tahun ini. Dalam tempoh berkenaan, beliau telah menerajui kepimpinan negara dengan dasar-dasar pembangunan yang telah berjaya mewujudkan pembangunan fizikal dan kemudahan-kemudahan awam sehingga menjadi teladan di kalangan negara-negara membangun.

Keseluruhan negara ataupun generasi Malaysia yang besar pada hari ini telah melihat sendiri kemudahan-kemudahan bertaraf dunia seperti jalan raya, hospital, sekolah, bangunan-bangunan tinggi, lapangan terbang dan sebagainya sehingga ada rakyat yang mungkin tidak menyedari betapa bertuahnya diri kita, di mana dasar-dasar yang berwawasan, yang dilaksanakan di negara ini telah pun membolehkan kita untuk terus melangkah ke hadapan tidak bersikap leka tetapi terus berusaha mencapai kecemerlangan serta mengangkat martabat kita di dunia.

Selain menumpukan perhatian terhadap pembangunan fizikal yang kita lihat di Malaysia, kita juga telah berusaha keras untuk mengubah fikiran rakyatnya untuk terus mencuba membuat pencapaian yang membanggakan, yang pada suatu masa dahulu tidak pernah terfikir atau dianggap tidak mungkin akan dapat dicapai.

Semangat *Malaysia Boleh* telah pun tertanam dalam minda rakyat Malaysia yang dibuktikan dengan pendakian ke gunung yang tertinggi di dunia, pelayaran solo mengelilingi dunia dan renang menyeberangi Selat Inggeris. Begitulah berjayanya semangat itu yang dicetuskan oleh bekas Perdana Menteri.

Tuan Yang di-Pertua, namun kesemua kejayaan tersebut sudah tentu tidak akan dapat dicapai, sekiranya tidak ada keamanan dan kestabilan di negara ini malah tahap ekonomi Malaysia yang memberangsangkan juga telah menimbulkan perasaan kagum di banyak negara yang membangun. Kewibawaan kepimpinan Ahli Yang Berhormat bagi Kubang Pasu berjaya mewujudkan persekitaran yang baik, yang dapat merangsang rakyat berbilang kaum di negara ini untuk hidup bersatu padu sebagai satu entiti dan membolehkan dasar-dasar ekonomi negara digubal dan dilaksanakan dengan jayanya.

Ahli Parlimen bagi Kubang Pasu jelas mempunyai idea-idea bernas tentang cara-cara ekonomi negara ini harus diselia dan rakyat Malaysia daripada golongan bumiputera dan bukan bumiputera telah pun mendapat banyak manfaat daripada dasar-dasar kerajaan itu. Rakyat melihat masa depannya yang cerah dan menunggu kejayaan Wawasan 2020 itu apabila tiba masanya nanti.

Tuan Yang di-Pertua, tarikh 31 Oktober 2003 kini merupakan satu tarikh yang harus dihafal oleh sejarawan akan datang.

Tuan Yang di-Pertua, pada pendapat saya, tarikh berkenaan juga merupakan satu lagi pencapaian penting bahawa amalan demokrasi di negara kita ternyata dipraktikkan di Malaysia dan ianya akan terus diamalkan selama-lamanya. Saya fikir peralihan kuasa yang teratur, yang dijalankan dengan penuh adat istiadat dan gilang-gemilang oleh Malaysia agak jarang dilihat di negara-negara membangun yang lain seperti mana yang turut disaksikan oleh barisan pembangkang sendiri.

Tuan Yang di-Pertua, semua ini telah berlaku oleh kerana Ahli Parlimen bagi Kubang Pasu bekas Perdana Menteri, yang selama ini digelar sebagai diktator dan penindas demokrasi telah menyerahkan kuasa kepada penggantinya dengan tatacara dan budaya demokrasi kuno iaitu dengan cara meletakkan jawatan.... [*Tepuk*]

Tuan Yang di-Pertua, saya juga ingin mengucapkan tahniah kepada Ahli Yang Berhormat bagi Kepala Batas di atas pelantikan beliau sebagai Perdana Menteri Malaysia Kelima dan bagi pihak Parti UPKO berikrar untuk memberi sokongan penuh kepada kepimpinan beliau.

Tuan Yang di-Pertua, saya mohon menyokong.

**Tuan Yang di-Pertua:** Ya, Parit Buntar.

#### 12.09 tgh.

**Dato' Dr. Hasan bin Haji Mohamed Ali [Parit Buntar]:** Terima kasih Tuan Yang di-Pertua. Saya ucapkan terima kasih kerana diberi peluang bersama-sama membahaskan usul mengikut Peraturan Mesyuarat Dewan Rakyat 27(3).

Pertama sekali yang, saya bagi rakan-rakan dalam PAS ingin mengucapkan Selamat Bersara keadaan Ahli Parlimen bagi Kubang Pasu Yang Berbahagia Tun Dr. Mahathir Mohamad dan juga selamat menjawat jawatan yang tertinggi negara Ahli Parlimen

bagi Kepala Batas yang baru sahaja menjawat jawatan tersebut, tahniah daripada kami dan tahniah daripada PAS. Mudah-mudahan kita sama-sama berdoa negara ini akan terus memacu kepada kejayaan demi kejayaan, yang akan dapat kita wariskan kejayaan itu kepada anak-anak bangsa kita, generasi yang akan datang dan buat keturunan yang akan datang.

Tuan Yang di-Pertua, saya ingin bersama-sama dengan teman-teman merakamkan betapa kita merasakan hebatnya bekas Perdana Menteri kita dan saya tidak ada lagi rakaman yang hendak dirakamkan melainkan mengatakan sememangnya sebagai seorang manusia, sebagai seorang insan, sebagai seorang yang berasal daripada Malaysia, rakyat Malaysia ini satu-satunya insan yang ulung yang terdapat di dunia mutakhir ini.

Beliau telah meletakkan wawasan, misi dan visi negara, telah meletakkan matlamat menjadi *goal centered* yang sukar ditandingi, menjadi perancang yang bijak, *intelligent planner*, menjadi pelaksana yang berimbang, *balanced executor*, menjadi penentu kepada tempoh pembangunan yang realistik, memberi rangsangan kepada seluruh jentera yang melaksanakan daripada pelbagai aras dan pihak, menetapkan tanda aras, *benchmark* yang paling baik dan merebut peluang yang bijak dalam keadaan-keadaan yang tertentu untuk memacu kemajuan dan pembangunan negara.

Satu perkara, Tuan Yang di-Pertua, yang saya sendiri merasakan yang perlu menjadi contoh kepada rakyat Malaysia ialah kededikasiannya. Hingga saat-saat akhir, beliau masih berada dalam suasana kerja, siang malam, pagi petang. Yang ini tidak dapat kita *dispute*, Tuan Yang di-Pertua, keagungan, kebolehan dan dedikasi yang sedemikian yang sepatutnya mesti diwarisi dan dicontohi oleh segenap rakyat Malaysia, terutamanya dari kumpulan muda, anak-anak di peringkat sekolah, yang belum sekolah, prasekolah, sekolah rendah, sekolah menengah, sampailah ke universiti dan sampailah kepada kita orang yang dewasa dan orang yang akan bertemu dengan Allah S.W.T patutlah melihat dan mewarisi dan menggemakan kehebatan dedikasi seperti ini.

Tuan Yang di-Pertua, saya paling tertarik dan kagum kepada Yang Amat Berbahagia Tun Dr. Mahathir bin Mohamad tentang kebolehan beliau menggarap, memahami, menghayati, mempraktikkan ilmu-ilmu terkini kepada pembangunan negara. Ilmu ekonomi, misalnya *economics* dan ekonomi, ilmu sains komunikasi dan maklumat, ilmu mengurus pembangunan terkini, ilmu hubungan antara negara seluruhnya dapat dikuasai dengan baik, walhal latar belakang beliau adalah latar belakang perubatan. Ini adalah satu kebolehan dan kekuatan yang ada kepada manusia dan menunjukkan kepada kita, insan itu boleh menguasai dunia, insan itu boleh menguasai apa ilmu pun, kalau semangat, kalau kededikasikan, kalau kemahuan, kalau kebolehan, dapat dipadukan untuk bersama-sama menjadi manusia ulung itu.

Tuan Yang di-Pertua, hanya satu perkara yang saya kurang senang. Di akhir-akhir hampir satu tahun, berlaku ada elemen unsur *over eulogizing*, terlalu kita memberikan satu gambaran kehebatan, puji-pujian yang melangit yang begitu. Saya merasakan, Tuan Yang di-Pertua, kalau ini dilakukan, bukan menolong dia untuk mengekalkan martabatnya sebagai pemimpin ulung di peringkat dunia, tetapi ini akan dapat meracik dan menghakis kekuatan dan kebolehan dengan keadaan kita memberikan elemen unsur *over eulogizing* yang saya sebutkan ini.

Sebab itu, Tuan Yang di-Pertua, sangatlah penting kita melihat realiti dan keadaan, dapat kita melihat ke hadapan dan melihat ke belakang, melihat ke kiri dan ke kanan dalam kita membuatkan atur ukur kepada seseorang manusia sama ada mereka sedang hidup ataupun mereka telah menemui Allah S.W.T.

Tuan Yang di-Pertua, saya kebanyakannya setuju, kebanyakannya tetapi ada perkara-perkara yang saya tidak setuju dengan pendapat-pendapat dan amalan-amalan yang dilaksanakan oleh Yang Amat Berbahagia Tun Dr. Mahathir bn Mohamad. Umpamanya, kalau kita melihat, saya katakan tadi saya setuju dengan cadangan-cadangan, setuju dengan pendapat-pendapat, tetapi beliau apabila menyentuh tentang Islam, bila menyentuh tentang agama, sukar bagi orang PAS, sukar bagi penyokong PAS,

sukar bagi saya, menerima idea-idea yang keluar daripada mulut Yang Amat Berbahagia Tun Dr. Mahathir Mohamad sebab beliau menggunakan logik akal semata-mata.

Agama bukan logik akal. Agama bukan logik untuk dianalisis menggunakan kekuatan akal manusia. Mesti ada sandaran-sandaran Al-Quran, mesti ada sandaran-sandaran sunah, mesti ada sandaran-sandaran *qias* dan *ijmak* dalam kita mengemukakan beberapa perkara sama ada perkara itu mengenai *body* Islam itu atau perkara mengenai amalan atau perkara mengenai hukum-hakam yang perlu dipertimbangkan bukan dengan kekuatan logik akal tetapi kekuatan daripada wahyu Allah S.W.T.

Inilah saya rasa kelemahan yang begitu ketara, yang sangat ketara dan kalau perkara ini diteruskan oleh generasi yang akan datang, Tuan Yang di-Pertua, akhirnya kita melihat agama itu dalam teropong sekular, melihat agama itu dalam teropong kaca mata Barat yang tidak dapat mengerti erti keimanan, erti ketakwaan, erti kehebatan keihisanan yang Allah mahukan kita sebagai manusia mewarisi, meletakkan sikap itu dalam hati, jiwa dan benak hati kita.

Tuan Yang di-Pertua, saya merasakan Yang Amat Berbahagia Tun Dr. Mahathir Mohamad adalah manusia yang paling pandai merebut peluang. Peluang yang direbutnya di peringkat negeri, peluang yang direbutnya di peringkat negara, peluang yang direbutnya di peringkat *regional*, peluang yang direbutnya di peringkat antarabangsa, di antaranya telah meletakkan status negara kita ini sebagaimana yang kita nikmati sekarang ini.

Tetapi saya hendak menyebutkan, Tuan Yang di-Pertua, beberapa peluang keemasan yang patut diambil, digunakan dalam masa 22 tahun menjadi Perdana Menteri, tetapi atas beberapa sebab, peluang itu tidak digunakan dengan sebaik-baiknya. Peluang untuk memartabatkan nilai-nilai kemanusiaan hak asasi manusia, disebutkan bacaan saya semalam, Tuan Yang di-Pertua, beberapa ruang dalam akhbar dan beberapa ruang dalam *internet*, menyebutkan zaman Dato' Musa Hitam digandingkan dengan zaman Dr. Mahathir, ketika itu adalah zaman yang paling hebat dalam urusan hak asasi manusia tetapi zaman yang ada sekarang, yang kita hidup hari ini, Tuan Yang di-Pertua, sebagai pembangkang, sebagai Ahli Parlimen, kita tidak dapat bergerak dalam negeri ini, bergerak sebagai manusia yang dimartabatkan kita sebagai wakil-wakil daripada rakyat.... [Disampuk]

Kita tidak boleh ke sekolah, tidak boleh jumpa PIBG, tidak boleh jumpa Guru Besar, tidak boleh jumpa Pengetua, hatta tidak boleh guna padang sekolah pun untuk kita menjalankan apa yang dinamakan aktiviti sukan, tujuh orang sebelah dalam pasukan bola.... [Disampuk] Inilah yang merupakan perkara-perkara yang merupakan perkara asasi.

Tadi, Yang Amat Berhormat menyebutkan visinya, cadangannya, fikirnya tentang bagaimana kita hendak mentadbir negara ini. Saya tadi mengungkapkan pelbagai kata-kata yang baik untuk memerangi rasuah habis-habisan dan saya ingin melihat, Tuan Yang di-Pertua, sudah genap dua tahun, salah satu rasuah yang telah dilaporkan, hampir 20 kes rasuah Menteri Besar Selangor, apa jadi sekarang ini.

Kita tidak dengar daripada mulut bekas Yang Amat Berhormat dan Yang Amat Berhormat sekarang ini. Inilah merupakan di antara ciri-ciri yang telah terhakis dalam masyarakat kita. Penghakistan ini, Tuan Yang di-Pertua, adalah merupakan satu cermin bagaimana kita mengendali dan menguruskan negara ini, terutama dalam konteks mengekalkan hak manusia yang termaktub dalam Perlembagaan, bukan sahaja di dunia, bahkan Perlembagaan negara kita.

Yang kedua Tuan Yang di-Pertua, kegagalan beliau merebut peluang keemasan selama 22 tahun untuk meletakkan nilai-nilai keadilan. Saya sangat terguris hati, Tuan Yang di-Pertua, bila kita menghantarkan perwakilan untuk bertemu dengan Yang Amat Berbahagia Tun Dr. Mahathir Mohamad, untuk minta tolong, berilah kebenaran supaya bekas Timbalan Menteri, Dato' Seri Anwar Ibrahim boleh mendapatkan rawatan di luar negara.... [Disampuk]

Tidak ada dalam peruntukan penjara yang menyebabkan dia tidak boleh dihantar ke luar negara. Atas dasar kemanusiaan, Tuan Yang di-Pertua tetapi Tuan Yang di-Pertua, layanan yang diberikan bukan sahaja layanan yang mesra, layanan yang boleh berfikir,

yang boleh menggunakan kekuatan akal tetapi ditolak mentah-mentah begitu, Tuan Yang di-Pertua. Di mana nilai manusia, di mana nilai keimanan, di mana nilai ketakwaan, di mana nilai kehampiran kita, sebagaimana negara ini dikatakan negara beragama yang dimahukan tadi oleh kita punya Perdana Menteri yang baru, Tuan Yang di-Pertua.

Saya dapat memahami bagaimana Perdana Menteri tadi menitikkan air mata, bahkan air mata ini saya terlalu yakin, saya kenal sedikit lebih kurang Perdana Menteri kita. Air mata yang dilimpahkan tadi, Tuan Yang di-Pertua, rasa saya berpadanan yang disebutkan dalam Hadis Nabi Muhammad s.a.w [Membaca sepotong hadis Nabi] "Mereka yang menyendiri mengingati Allah S.W.T sehingga mengalir air mata" Saya harap ini air mata ketakwaan, keinsanan yang mendalam timbul daripada hati kita tetapi inilah sebenarnya yang saya... [Dewan riuh dengan sorakan dan sahutan Ahli-ahli Yang Berhormat]

Yang ketiga, Tuan Yang di-Pertua, tentang kegagalan selama 22 tahun merebut peluang membanteras rasuah, sekali lagi saya hendak sebut, membanteras rasuah. Rasuah menjadi-jadi. Dalam tulisan-tulisan yang kita baca, Tuan Yang di-Pertua, di antara sebab mengapa FDI menurun di Malaysia ini adalah kerana masalah *good governance* dalam negara kita. Saya tidak tahu itu *true* atau tidak, kita tengok sahaja benar atau tidak benar. Sukatan seluruh dunia ingin memartabatkan *good governance*, ingin memberi makna kepada *good governance* tetapi *good governance* di Malaysia ini telah dirobek-robekkan. Robeknya tidak lain dan tidak bukan, mereka yang berada di kemuncak kuasa.

Kemudian, Tuan Yang di-Pertua, dalam masa 22 tahun juga beliau agak gagal, bukan gagal, agak gagal meletakkan erti keamanan yang sebenarnya. Mana boleh gadis-gadis sekarang boleh keluar pergi *shopping*, pergi turun ke bawah hendak ambil kereta misalnya. Terhadap apa yang terjadi kepada gadis, kepada wanita yang dibunuh akibat daripada keadaan pengertian keamanan.... [Disorak] Kita tidak boleh lagi keluar pergi Bukit Bintang Plaza begitu sahaja, tidak boleh lagi keluar ke mana-mana memikirkkan tentang perkara-perkara yang sedang berlaku dalam masyarakat kerana tafsiran, keamanan, kebebasan, kehebatan itu tidak diberikan makna dalam kehidupan kita.... [Disorak]

Tidak guna, Tuan Yang di-Pertua, tidak guna kita meletakkan *income* yang tinggi di negara Asia ini, tidak guna kita memiliki segala-galanya apa yang kita namakan sebagai alat-alat untuk mengukur kepada kejayaan kita kalau sebenarnya inti apa yang dinamakan keamanan itu tidak wujud dalam negara kita ini.

Tuan Yang di-Pertua, yang berikutnya saya ingin mengatakan kalau dapat dalam masa 22 tahun itu sepatutnya Yang Berbahagia Tun Dr. Mahathir Mohamad telah pun membebaskan pengaruh politik dalam mengendalikan khazanah negara. Saya harap kepada Perdana Menteri yang baru, saya harap sebagaimana yang disebutkan kepada kita tadi seakan-akan ucapan Abu Bakar Siddiq sewaktu menerima jawatan warisan daripada Rasulullah s.a.w.

Tuan Yang di-Pertua, saya juga ingin menyebutkan peluang untuk menghidupkan kehidupan bersandarkan agama menyebabkan peluang itu tidak diambil. Matinya, layunya, lesunya kehidupan bersandarkan agama di Malaysia ini. Masjid layu, lesu, madrasah layu, lesu... [Disorak] surau layu, lesu. Ini yang berlaku, Tuan Yang di-Pertua, sekarang berlaku di Ampang. Masjid Fatimah Az-Zahrah yang diambil oleh kerajaan negeri, mereka datang potong *padlock*, datang untuk menggantikan ahli jawatankuasa yang kita tahu ahli jawatankuasa itu terdiri dari orang-orang profesional yang telah sekian lama mentadbirkan masjid itu dan masjid itu adalah makmur, aman dengan program-program yang diminati oleh rakyat tetapi JAIS telah menggunakan kuasanya bagi memastikan dan mengalihkan masjid tersebut dan ditadbirkan oleh manusia-manusia yang *mediocre* dalam hal pengendalian masjid tersebut. ...

**Tuan Yang di-Pertua:** Yang Berhormat, sudah habiskah Yang Berhormat? Kita hendak sambung fasal sudah lama sangat dengan ucapan sekarang ini Yang Berhormat.

**Dato' Dr. Hasan bin Haji Mohamed Ali:** Sedikit. Saya juga ingin menyebutkan ....

**Tuan Yang di-Pertua:** Ya.

**Dato' Dr. Hasan bin Haji Mohamed Ali:** Yang Berbahagia Tun Dr. Mahathir Mohamad dalam mimpinya, dalam jaganya, dalam kepalanya musuh yang pertama, yang utama, yang mesti dimatikan ialah PAS.... [Disorak] Di New York bercakap fasal PAS, di England, di London bercakap fasal PAS, di Tokyo bercakap fasal PAS, dan PAS mengendalikan dua negeri, mentadbirkan dua negeri di Kelantan dan Terengganu. Saya hendak beritahu Yang Amat Berhormat, apa rasionalnya Yang Amat Berhormat, Yang Berhormat dan teman-teman mesti menjatuhkan Kerajaan PAS di Terengganu dan Kelantan?... [Disorak]

Apa rasionalnya, apa logiknya kedua-dua negeri yang telah ditadbirkan oleh PAS yang sepatutnya dibangunkan, yang sepatutnya disokong, yang sepatutnya dibangunkan bersama tetapi telah dijadikan sebagai *punching bag*. Telah dijadikan sebagai alat bagi UMNO, Kerajaan Barisan Nasional untuk membunuh pembangunan kedua-dua negeri ini...

**Tuan Yang di-Pertua:** Ya Yang Berhormat.

**Dato' Dr. Hasan bin Haji Mohamed Ali:** Akhirnya, Tuan Yang di-Pertua, saya ingin menyebutkan kita mengukur manusia kebanyakannya dengan ukuran yang agak *lopsided*, kadang-kadang ukuran kita itu *myopic*, dengan izin, Tuan Yang di-Pertua, kerana kita ukur manusia ini waktu mereka hidup tetapi ukuran yang sebenarnya yang dikatakan oleh para ulama ialah mengukurnya waktu mereka kembali bertemu dengan Allah S.W.T.

Tuan Yang di-Pertua, saya ingin mengambil contoh Almarhum Ketua Pembangkang, Dato' Fadzil Md. Noor meninggal dunia. Walaupun peninggalan dunianya, gambarannya di *blackout* oleh TV, oleh majalah, oleh surat khabar dan sebagainya... [Disorak] Saya hendak menyebut di Darul Ulum waktu menyembahyangkannya, di belakang imam, 100,000 orang menyembahyangkannya. Selepas keluar dari Hospital Universiti Kebangsaan, Tuan Yang di-Pertua, dibawa ke satu surau iaitu Surau Ar-Rahimah di Bandar Tun Razak, empat kali disembahyangkan, empat imam. Tiap-tiap satu imam bermakmum 2,000 orang, empat kali, 8,000 orang.

Apa yang saya hendak sebutkan, inilah dia manusia yang paling tidak menjadikan gambaran-gambaran kepada kehidupan terutamanya kehidupan yang terakhir bila kita bertemu dengan Allah S.W.T. Inilah sebenarnya pengiktirafan, inilah sebenarnya apa yang dikatakan bahawa pengiktirafan sebagai rakyat negara ini kepada seorang pemimpin. Saya mengharapkan, saya sangat-sangat mengharapkan, pengiktirafan yang sama akan diberikan kepada Yang Berbahagia Tun Dr. Mahathir Mohamad.

Tuan Yang di-Pertua, akhirnya saya hanya mengingatkan bahawa dalam ucapan sebagai orang yang jauh lebih muda agaknya daripada Yang Berbahagia Tun Dr. Mahathir Mohamad, kalau saya dapat memberikan sedikit, bukan pendapat atau bukan untuk memberi nasihat, tetapi satu cetusan sahaja daripada pendapat saya, kalau-kalau beliau boleh, dapat mengundurkan diri daripada cergas dalam politik sebab beliau mengatakan dia akan cergas terus dalam politik UMNO terutama mempertahankan dalam pilihan raya yang ke sebelas yang akan datang.... [Disorak]

Saya bimbang, Tuan Yang di-Pertua, saya bimbang dengan pujian-pujian yang melangit yang kita beri, dengan pengiktirafan-pengiktirafan termasuk saya mengiktirafnya, Tuan Yang di-Pertua, saya takut imej bekas Perdana Menteri akan terjejas. Saya takut yang selama ini sokongan dan dukungan rakyat daripada pelbagai pihak kepada beliau akan turut terhakis, Tuan Yang di-Pertua. Sebab itu kita mendoakan kepada Allah S.W.T supaya beliau, isterinya dan keluarganya sentiasa dalam cucuran rahmat Allah S.W.T ..

**Tuan Yang di-Pertua:** Ya, cukuplah.

**Dato' Dr. Hasan bin Haji Mohamed Ali:** Kita mengharapkan Perdana Menteri yang menggantikannya hari ini, Tuan Yang di-Pertua, mencerminkan kembali buat refleksi yang sangat dalam; memandang ke hadapan, memandang ke belakang, ke kiri dan ke kanan untuk melihat di mana kekurangan-kekurangannya dan kekurangan itu sudah pun sebenarnya disenaraikan satu per satu. Kita berdoa kepada Allah S.W.T segala yang terbaik akan berlaku kepada negara Malaysia yang kita cintai ini. Sekian, Tuan Yang di-Pertua, terima kasih.

**Tuan Yang di-Pertua:** Ya, Kota Samarahan.

12.29 tgh.

**Tan Sri Datuk Patinggi Abdul Taib Mahmud [Kota Samarahan]:** Tuan Yang di-Pertua, saya ingin menyokong usul yang telah dikemukakan oleh Perdana Menteri baru kita iaitu Ahli Yang Berhormat bagi Kepala Batas.

Sebelum saya berucap seterusnya, saya ingin memberi setinggi-tinggi tahniah kepada beliau atas pelantikan beliau sebagai Perdana Menteri kita yang kelima.... [*Tepuk*] Saya juga ingin mengucapkan setinggi-tinggi tahniah kepada beliau kerana telah pun mengambil langkah yang paling awal sebagai seorang Perdana Menteri dengan mengemukakan usul terima kasih dan mengenang jasa bakti Perdana Menteri kita yang baru bersara iaitu Yang Amat Berbahagia Tun Dr. Mahathir Mohamad. Ini mempunyai suatu makna yang dalam sekali kerana ia menggambarkan kematangan politik yang telah pun kita dapat bina sekurang-kurangnya di dalam Barisan Nasional di Malaysia ini.

Usul ini menunjukkan bahawa tiap-tiap Perdana Menteri yang mengambil alih adalah cukup menyedari bahawa beliau membina atas asas yang telah pun disediakan oleh Perdana Menteri sebelumnya. Dengan kata lain dalam Barisan Nasional kita sudah mengambil sebagai perkara biasa suatu konsep kesinambungan menjadi suatu cara perjuangan kita. Oleh sebab itu maka kita bertuah di Malaysia ini kerana mempunyai satu bentuk politik yang dapat menunjukkan bagaimana pemimpin yang sudah puas berusaha dapat penghargaan dan yang menyambut tanggungjawab daripada beliau juga menghargai jasa dan bakti yang sudah lepas.

Oleh sebab itu maka usul ini merupakan suatu usul *historic* ataupun bersejarah di dalam Dewan ini. Siapa yang tidak tahu di Malaysia ini dengan jasa-jasa dan bakti Yang Amat Berbahagia Tun Dr. Mahathir Mohamad? Anak kecil pun dapat tahu segala jasa yang beliau telah taburkan kepada negara kita. Sebenarnya beliau kalau dapat difikirkan sedalam-dalamnya adalah pembina Malaysia yang moden. Apakala beliau mula-mula menjadi Perdana Menteri, bentuk ekonomi kita dan cara hidup rakyat kita jauh berlainan daripada apa yang kita nikmati hari ini.

Kita sudah menjadi sebuah negara industri iaitu yang memberi banyak peluang pekerjaan dan banyak jenis pekerjaan, iaitu memberi peluang kepada anak-anak kita menuntut ilmu pengetahuan dan dengan ilmu pengetahuan pelbagai itu dapat upahan yang cukup lumayan dalam beberapa bentuk pekerjaan yang telah muncul kerana ekonomi kita telah pun berjaya diperluaskan asasnya oleh Yang Amat Berbahagia Tun Dr. Mahathir Mohamad sebagai Perdana Menteri yang telah pun berusaha hampir satu generasi.

Oleh sebab itu *diversification program*, dengan izin, *diversification of the economy* oleh Tun Dr. Mahathir, negara ini telah pun bertukar corak, bertukar struktur lain daripada apa yang beliau warisi daripada Allahyarham Tun Hussein Onn. Daripada negara yang bergantung sangat kepada pertanian negara kita sekarang ini sudah mempunyai banyak bentuk kegiatan-kegiatan lain dan bentuk perkhidmatan-perkhidmatan yang dahulunya tiak pernah ada disaksikan dalam Malaysia ini.

Dalam pertengahan tahun 1980an sudah nampak ekonomi Malaysia bertukar iaitu Malaysia tidak lagi bergantung sangat kepada sektor awam bagi cara untuk membangunkan negara kita. Mulai daripada masa itu pihak swasta telah pun diberikan peranan yang semakin hari semakin besar. Sehingga hari ini kita semua nampak nyata pihak swasta yang menandakan pertumbuhan ekonomi Malaysia ini. Ini bererti bahawa kita telah dapat membangunkan negara kita dengan sistem yang berbagai-bagai rupa iaitu sistem yang tidak terkait atau bergantung dengan *regulation* lagi bahkan memberikan lebih banyak peluang bagi inisiatif-inisiatif yang boleh mempercepat cara-cara kita menjalankan pekerjaan.

Inilah perubahan yang telah pun menyuruh ekonomi Malaysia ini subur. Kalau di Sarawak ekonomi yang subur ini telah pun dapat membawa perubahan yang lebih nyata lagi kerana bila Sarawak mula masuk ke dalam Malaysia dan pada masa Tun Dr. Mahathir Mohamad menjadi menteri, Sarawak merupakan sebuah daripada negara yang agak mundur sekali. Infrastrukturnya tidak cukup, bentuk ekonominya bergantung sangat kepada minyak dan kayu balak sebagai sumber besar. Yang lain tidak mendapat pembangunan. Dengan ada dasar ekonomi yang begitu baik, yang dibina oleh bekas Perdana Menteri kita

itu, maka Sarawak telah pun bertukar menjadi negara yang cukup maju sama seperti negara-negara yang sudah maju di Semenanjung ini.

Anak-anak Sarawak memanglah banyak mempunyai sebab untuk mengucapkan terima kasih- kepada Yang Amat Berbahagia Tun Dr Mahathir Mohamad. Tun Dr. Mahathir Mohamad telah pun memberikan perhatian yang *constant* dengan izin, kepada negeri Sarawak. Tiap-tiap tahun ada sahaja beliau datang untuk memerhatikan rupa keadaan pembangunan di sana. Tiap-tiap kali beliau datang dan berjumpa dengan pemimpin-pemimpin di Sarawak ada sahaja *ideas* baru yang beliau taburkan sehingga kita sentiasa mendapat ilham yang banyak daripada beliau dan dapat menukarkan dasar-dasar di negeri Sarawak untuk membolehkan Sarawak lebih *diversified*, dengan izin, dalam bentuk ekonominya. Oleh sebab itu maka Yang Amat Berbahagia Tun Dr. Mahathir Mohamad memanglah dalam kenangan rakyat Sarawak sampai sekarang ini dan kita memanglah akan merindukan beliau juga seperti rakyat di Semenanjung ini.

Tun Dr. Mahathir Mohamad bukan sahaja berhenti dengan membina ekonomi yang baru dan bentuk masyarakat baru di Malaysia ini. Beliau mempunyai wawasan yang lebih jauh. Dalam sekurang-kurangnya 10 tahun ini beliau telah pun meletakkan asas bagi membolehkan masyarakat Malaysia ini untuk menjadi k-komuniti kerana beliau nampak dalam *globalized world* yang kita hadapi ini bentuk pekerjaan akan bertukar, persaingan di peringkat dunia akan bertambah hebat dan ekonomi kita akan bertukar begitu cepat mengikut rupa kuasa pasaran dunia. Semua pertukaran ini mesti dicapai dan ia bergantung kepada persediaan yang boleh kita buat untuk memperlengkapkan rakyat Malaysia dengan ilmu pengetahuan yang cukup khususnya di dalam bidang sains dan teknologi.

Dalam kaitan ini kita nampak Yang Amat Berbahagia Tun Dr. Mahathir Mohamad telah pun mempunyai pandangan yang lebih jauh dan mempunyai satu pendekatan yang praktikal dan telah pun cuba untuk menggalakkan IT menjadi sebahagian daripada cara-cara kita bekerja di Malaysia ini sedikit demi sedikit, hingga pada satu ketika kita akan mendapat sama taraf dengan negara yang maju. Saya percaya persiapan telah di buat oleh Kerajaan Pusat dan kerajaan negeri untuk memperlengkapkan rakyat Malaysia menjadi k-komuniti tentu sekali adalah persiapan yang sangat penting sekali dan ia akan menentukan kebolehan kita untuk mencapai wawasan 2020.

Saya percaya keyakinan rakyat Malaysia sekarang ini untuk berubah menjadi lebih *versatile* dengan izin, dalam persaingan di peringkat dunia sudah pun begitu tinggi kerana persiapan dalam bidang pendidikan telah pun cukup baik walaupun cabaran-cabaran untuk mempertingkatkan persiapan dalam bidang pendidikan ini mesti dipertingkatkan lebih hebat lagi pada masa akan datang. Rakyat Malaysia sudah mempunyai keyakinan tinggi kerana kita berasa bangga sekali di mana-mana kita pergi khususnya di dalam negara yang membangun rakyat Malaysia di pandang tinggi oleh rakyat lain.

Ini menyebabkan kita merasa berhutang budi kepada Yang Amat Berbahagia Tun Dr. Mahathir kerana memimpin kita ke arah tempat yang dihormati oleh dunia. Beliau telah pun menjalankan peranan sebagai pemimpin di dunia ketiga dengan cukup baik dan baru-baru ini di dunia Islam, beliau pun telah dikenalkan sebagai seorang pemimpin yang tunggal dan berupa seorang yang patut menjadi pejuang Islam walaupun selepas beliau bersara sebagai Perdana Menteri. Ramai sahabat-sahabat saya di negeri Arab telah pun bersuara sedemikian.

Dengan latar belakang demikian, saya percaya masa hadapan kita adalah masa hadapan yang penuh dengan harapan yang baik dan janji yang cukup penuh dan terserahlah kepada pemerintahan yang akan datang untuk mencapai semuanya dan menukar harapan ini menjadi realiti. Saya sendiri percaya bahawa Yang Amat Berhormat Perdana Menteri baru, yang ada cukup luas pengalaman untuk dapat meneruskan kepimpinan cemerlang yang telah pun dinikmati oleh Malaysia dan dalam semua usaha beliau untuk membawa Malaysia terus kepada peranan yang cemerlang di dalam negeri dan di luar negeri, sekurang-kurangnya kita di Sarawak berjanji untuk memberi sokongan sepenuh-penuhnya pada masa akan datang. Terima kasih.

**Tuan Yang di-Pertua:** Ya, ya, saya akan cuba hendak menghabiskan usul ini sebelum, pada pagi ini jugalah. Selepas itu saya Yang Berhormat bagi Parit Sulong dan

saya mintalah Parit Sulong janganlah berucap panjang sangat. Kemudian saya minta Yang Berhormat bagi Sarikei, selepas itu saya minta penggulungan ya. Ya, Parit Sulong.

#### 12.42 tgh.

**Datuk Ruhanie bin Haji Ahmad [Parit Sulong]:** Terima kasih Tuan Yang di-Pertua. Seluruh dunia menyaksikan bagaimana peralihan kuasa di Malaysia telah disempurnakan pada Jumaat lalu secara demokratik, secara aman dan penuh tatasusila. Peristiwa tersebut memantapkan kematangan politik di negara ini, sebuah negara membangun yang disegani oleh sebilangan besar komuniti antarabangsa. Peristiwa tersebut, Tuan Yang di-Pertua, telah disaksikan oleh sebilangan besar rakyat jelata Malaysia dengan adunan perasaan duka dan gembira. Rakyat jelata berduka kerana Perdana Menteri Malaysia Keempat, iaitu Ahli Parlimen bagi Kubang Pasu, telah meninggalkan persada kepimpinan tanah air. Mereka pula gembira kerana Ahli Parlimen bagi Kepala Batas yang kini menyandang jawatan Perdana Menteri Malaysia Kelima, adalah juga seorang tokoh yang berhemah mulia, cukup teruji, tegas, matang dan luas pengalamannya.

Tuan Yang di-Pertua, Kelab Penyokong Kerajaan atau pun BBC mengiringi persaraan Ahli Parlimen bagi Kubang Pasu dengan jutaan terima kasih dan rasa terhutang budi yang amat sangat di atas seluruh budi, jasa, bakti, perjuangan dan pengorbanan beliau kepada bangsa Malaysia dan negara Malaysia. Pada waktu yang sama, BBC juga mengalu-alukan pelantikan Ahli Parlimen bagi Kepala Batas selaku Perdana Menteri Kelima, dengan ikrar janji setia yang unggul dan jitu serta dengan keyakinan yang melangit tingginya bahawa tanah air tercinta ini akan jadi lebih cemerlang, semakin gemilang, sentiasa aman dan tambah sejahtera di hari-hari mendatang.

Tuan Yang di-Pertua, gaya kepimpinan, falsafah perjuangan, bentuk pengorbanan, corak pemikiran, curahan rasa dan taburan budi serta limpahan bakti Ahli Parlimen bagi Kubang Pasu, selaku Perdana Menteri Malaysia Keempat, telah dibicarakan secara meluas oleh banyak pihak di seluruh dunia, dari dahulu hingga ke hari ini. Seseengah sorotan itu dijelmakan dalam kritikan semberono dan fitnah.

Bagaimana pun sebilangan besar umat dunia pula telah mengabadikan segala-galanya mengenai Ahli Parlimen bagi Kubang Pasu dalam bentuk apresiasi, sanjungan dan buku-buku yang menjadi sumber inspirasi, sumber pemikiran serta sumber ilmu kepada manusia sejagat. Ahli Parlimen bagi Kubang Pasu sendiri pun telah banyak mendokumentasikan seluruh karya pemikiran beliau terhadap pelbagai perkara dalam ratusan ucapan, kertas kerja, makalah dan buku.

Sebahagian dari ucapan, kertas kerja, makalah dan buku tersebut adalah mengenai pembangunan ekonomi, ketahanan nasional dan kesejahteraan siasah tanah air. Sebahagiannya pula mengenai pembangunan ilmu, pembangunan sains dan teknologi khususnya teknologi maklumat dan bioteknologi, mengenai demokrasi hak asasi manusia, keadilan dan kesaksamaan sejagat, mengenai globalisasi dan kesamarataan, mengenai pemupukan hubungan sewilayah dan seantero dunia, perdagangan antarabangsa dan kesaksamaan di antara negara maju dan negara membangun, mengenai hubungan pintar di kalangan negara kecil, miskin dan membangun, mengenai nilai-nilai ketimuran, mengenai usaha memperkasa semula martabat Islam dan mengenai keunggulan Islam dalam konteks kemufakatan dan keamanan universal.

Seluruh kebijaksanaan, wawasan, gagasan dan daya usaha yang terpancar dari gaya kepimpinan, falsafah perjuangan, bentuk pengorbanan, pemikiran jasa, budi dan limpahan bakti Ahli Parlimen bagi Kubang Pasu yang telah diabadikan dalam seluruh bentuk ini pasti akan menjadi khazanah yang tidak ternilai manfaatnya kepada perkembangan dan pembentukan sejarah tamadun negara bangsa Malaysia moden. Seluruhnya juga pasti akan menjadi sumber inspirasi kepada masyarakat internasional di dalam usaha memunculkan satu dunia yang lebih saksama, lebih aman dan lebih sejahtera di hari-hari muka.

Oleh itu, Tuan Yang di-Pertua, berdasarkan hakikat dan realiti ini, dengan takzimnya saya bagi pihak BBC mencadangkan semoga Yang Amat Berhormat Perdana Menteri Kelima sedia menjuarai serta memperjuangkan kewujudan satu Yayasan

Kepimpinan Malaysia dengan izin, Malaysian Leadership Foundation dalam tempoh waktu beliau menerajui kepimpinan negara ini. Yayasan ini sewajarnya menaja, merangsang serta menggalakkan seluruh sarjana ilmuwan, intelektual, pemimpin dari pelbagai sektor dan bidang pengkhususan termasuklah bidang keagamaan, siasah dan korporat dari seluruh dunia untuk mengkaji kesemua falsafah kepimpinan Perdana Menteri Malaysia, dari zaman Al-Marhum Tunku Abdul Rahman Putera, Allahyarham Tun Abdul Razak Hussein dan Allahyarham Tun Hussien Onn hinggalah ke zaman kepimpinan Tun Dr. Mahathir Mohamad, dalam konteks dunia mutakhir yang penuh pancaroba.

Mudah-mudahan Tuan Yang di-Pertua, *global outreach* menerusi yayasan ini akan menjadikan seluruh falsafah kepimpinan kesemua Perdana Menteri Malaysia dijadikan sumber kajian perbandingan dunia, dijadikan sumber pemodenan dan pembinaan tamadun di negara-negara membangun, dijadikan sumber menyasarkan ideologi dan agama lain dengan keunggulan Islam dan dijadikan sumber kewujudan susunan dunia mutakhir yang benar-benar aman, saksama dan sejahtera kepada seluruh umat manusia di serata jagat.

Menerusi matlamat seperti ini Tuan Yang di-Pertua, saya pasti Yang Amat Berhormat Perdana Menteri Malaysia Kelima yang sesungguhnya mewarisi darah perjuangan ulama Islam yang disegani, berpengalaman luas di bidang pembangunan generasi dan juga berpengalaman luas di bidang hubungan serta siasah antarabangsa pasti akan berjaya melonjakkan lagi nama baik Malaysia dan peranan positif Malaysia di persada dunia. Saya yakin inilah di antara pendekatan terpuji yang akan turut disokong dan sama-sama didukung oleh barisan rakyat Malaysia yang sedang berusaha dan berjuang menjadikan bangsa Malaysia sebagai *global players* dengan izin, yang berwibawa di dalam pelbagai bidang perdagangan, keusahawanan, kemanusiaan dan juga keilmuan. Dengan semangat *Malaysia Boleh* dan dengan taufik serta hidayah dari Allah yang maha berkuasa, insya-Allah penubuhan Yayasan Kepimpinan Malaysia ini akan menjadi satu realiti dalam waktu yang terdekat ini.

Tuan Yang di-Pertua, BBC juga yakin bahawa rakyat jelata Malaysia, termasuk Ahli-Ahli Parlimen, terutamanya keluarga BBC, akan menghayati, menginsafi dan mengamalkan prinsip-prinsip falsafah kepimpinan Perdana Menteri Kelima, iaitu prinsip amanah, jujur, cekap dan adil yang telah dihuraikan di Dewan yang mulia sebentar tadi. Mudah-mudahan seluruh prinsip dan falsafah ini akan memunculkan satu landskap kepimpinan yang benar-benar bebas dari amalan rasuah dan terbebas dari segala amalan negatif yang boleh menjejaskan kemerdekaan serta kedaulatan negara yang tercinta.

Akhir kata, Tuan Yang di-Pertua, izinkan saya mendedikasikan serangkap pantun berikut dari BBC seluruh rakyat jelata Parit Sulong yang saya wakili, khas untuk Ahli Parlimen Kubang Pasu yang baru bersara dan juga keluarga BBC.

*Kuala Sedili meniti awan,  
Kuala Johor indah perkasa,  
Impian putera dari kayangan,  
Mulia sekali budimu tuan,  
Sentiasa luhur sepanjang masa,  
Saban ketika jadi kenangan.... [Tepuk]*

Ahli BBC dan saya sendiri juga mengikrarkan serangkap pantun kepada Yang Amat Berhormat Perdana Menteri Kelima.

*Waktu mesta menyinari pagi,  
Awan merona gemala cahaya,  
Pancaran maya silih berulang,  
Restu dipinta dari Illahi,  
Tuan menerima segala hidayah  
Jadikan Malaysia lebih gemilang.*

Tuan Yang di-Pertua, dengan itu saya menyokong.... [Tepuk]

**Tuan Yang di-Pertua:** Ahli Yang Berhormat, ramai yang bangun hendak berucap. Saya sangat dukacita tidak dapat menunaikan permohonan-permohonan kesemuanya. Kalau sekiranya saya menunaikan permohonan-permohonan semuanya, kita akan

memakan masa satu hari untuk usul ini sahaja. Jadi, ada satu lagi usul di sebelah petang. Selain daripada itu, kita banyak lagi urusan-urusan yang hendak diteruskan.

Oleh yang demikian, saya minta maaf. Saya minta sekarang ini Yang Berhormat bagi Sarikei berucap. Janganlah panjang sangat ya, sebab kita hendak tutupkan usul ini pada pagi ini juga. Ya.

**Dato' Seri Law Hieng Ding:** Ya, baik.

**12.52 tgh.**

**Menteri Sains, Teknologi dan Alam Sekitar [Dato' Seri Law Hieng Ding]:** Tuan Yang di-Pertua, terima kasih. Saya bangun bagi pihak Parti Rakyat Bersatu Sarawak atau (SUPP) untuk menyokong usul Yang Amat Berhormat Perdana Menteri supaya Dewan yang mulia ini merakamkan penghargaan yang tidak terhingga kepada perjuangan, pengorbanan, budi jasa dan bakti beliau.

Tuan Yang di-Pertua, kejayaan Yang Berhormat Tun Dr Mahathir Mohamad, Ahli Parlimen Kubang Pasu sebagai Perdana Menteri Malaysia keempat, bukan sahaja dibanggakan rakyat Malaysia malah dikagumi seluruh dunia. Di bawah pimpinan beliau, nama Malaysia kini tidak asing lagi kepada masyarakat dunia, jalur gemilang kini berkibar di puncak Gunung Everest dan Benua Antartika, semangat *Malaysia Boleh* kini bersemadi di jiwa rakyat Malaysia.

Tuan Yang di-Pertua, Yang Berhormat Tun Dr Mahathir Mohamad adalah seorang anak Malaysia yang terbilang, bukan sahaja di Malaysia tetapi di peringkat antarabangsa. Kejayaan serta sumbangan beliau sebagai Perdana Menteri Malaysia yang keempat akan menjadi sejarah kebanggaan generasi kini dan yang akan datang. Semangat perjuangan yang tidak pernah luntur tetap menjadi inspirasi seluruh rakyat. Cinta beliau kepada negara dan bangsa yang sedalam lautan luas dan sumbangan serta penghormatan yang setinggi gunung akan tetap menjadi satu pengajaran dan kenangan manis rakyat Malaysia turun-temurun.

Tuan Yang di-Pertua, Yang Berhormat Tun Dr Mahathir Mohamad adalah seorang pemimpin yang berjiwa rakyat. Izinkan saya bercerita sedikit sebagai penjelasan. Waktu pejabat Yang Berhormat Tun sering kali dihabiskan bersama rakyat dan tetamu-tetamu dari dalam dan juga dari luar negara. Beliau sering kali menasihatkan supaya ahli Kabinet turut memberi masa untuk berjumpa rakyat untuk mengetahui apa juga masalah yang mereka hadapi. Yang Berhormat Tun menjadikan kenderaan beliau sebagai pejabat sampingan. Urusan surat-menyurat diuruskan satu persatu selepas waktu pejabat sehingga waktu malam.

Pada suatu ketika semasa Yang Berhormat Tun memandu kereta Kancil beliau, datang sebuah bas mini yang memotong dan terus berhenti di hadapan kereta beliau, Yang Berhormat Tun sabar menunggu. Apabila bas tersebut bergerak semula kepulan asap hitam mengelapkan pemandangan di hadapan. Sejurus itu, saya dihubungi untuk mengambil tindakan bagi mengatasi masalah asap hitam dari kenderaan secara keseluruhan dan bukan untuk menangkap bas mini yang terbabit.

Seperkara lagi, semasa Yang Berhormat Tun bersiar-siar di pasar raya KLCC, Yang Berhormat Tun teringin berhenti untuk secawan kopi. Oleh kerana tiada meja yang kosong, Yang Berhormat Tun terus menarik kerusi dan duduk bersama semeja dengan pelanggan lain. Itulah amalan kepimpinan berjiwa rakyat dan contoh pengurusan secara *hands-on*, dengan izin, yang diamalkan oleh Yang Amat Berhormat Perdana Menteri Malaysia yang keempat.

Tuan Yang di-Pertua, sebelum saya meneruskan ucapan menyokong Usul Terima Kasih kepada Yang Berhormat Tun Dr. Mahathir Mohamad, izinkan saya mengambil kesempatan ini untuk parti SUPP memberi sokongan padu yang tidak berbelah bagi serta menyanjung tinggi pelantikan Yang Amat Berhormat Dato' Seri Abdullah bin Haji Ahmad Badawi sebagai Perdana Menteri baru untuk menerajui Kerajaan Barisan Nasional dalam memerintah negara yang kita semua sayangi.

Parti SUPP berikrar akan memberikan kesetiaan, komitmen, sumbangan dan bekerja keras dalam melaksanakan amanah serta tanggungjawab yang akan diberikan di bawah kepimpinan Dato' Seri Perdana Menteri.

Walaupun Yang Berhormat Tun Dr. Mahathir bin Mohamad telah bersara, namun kita amat bertuah kerana mendapat seorang pengganti iaitu Yang Amat Berhormat Dato' Seri Abdullah bin Haji Ahmad Badawi, Ahli Parlimen Kepala Batas. Seorang pemimpin yang setanding, berwibawa, berpengalaman luas dalam pentadbiran kerajaan dan hubungan antarabangsa serta mempunyai, dengan izin, *a lot of hidden talent*, untuk menerajui negara.

Yang Amat Berhormat Dato' Seri adalah pemimpin yang paling layak dan telah mendapat sokongan penuh dari semua lapisan rakyat termasuk parti-parti yang tidak bersependangan dengan Barisan Nasional.

Tuan Yang di-Pertua, dengan sokongan padu rakyat, khususnya Yang Amat Berbahagia Datin Seri Endon dan keluarga, SUPP yakin penuh, Yang Amat Berhormat Dato' Seri akan dapat menghadapi segala cabaran sebagai Perdana Menteri Kelima dengan cemerlang.

Tuan Yang di-Pertua, izinkan saya membaca satu rangkap pantun untuk Yang Amat Berhormat Dato' Seri Perdana Menteri yang berbunyi .....

**Tuan Yang di-Pertua:** Yang Berhormat, tunggu sekejap ya.

**Datuk Seri Law Hieng Ding:** Ya.

**Tuan Yang di-Pertua:** Jikalau sekiranya Yang Berhormat membaca pantun itu akan melebihi jam 1.00 petang ya. Oleh yang demikian, saya dengan ini mengikut Peraturan Mesyuarat 12(3) memanjangkan Mesyuarat selama 15 minit lagi untuk menghabiskan Usul ini. Ya, sila baca.

**Datuk Seri Law Hieng Ding:** Okey. Pantunnya berbunyi sedemikian:

*Indah sungguh pohon cemara,  
Tumbuh melata di dalam hutan,  
Kepada Yang Amat Berhormat harapan negara,  
Pasir sebutir jadikan intan.... [Tepuk]*

Tuan Yang di-Pertua, sedikit lagi, saya ya .....

**Tuan Yang di-Pertua:** Okeylah.

**Datuk Seri Law Hieng Ding:** Integrasi nasional merupakan agenda penting Kerajaan Pusat Barisan Nasional sejak penubuhannya Malaysia. Yang Berhormat Tun Dr. Mahathir telah berjaya melahirkan perasaan kemalaysiaan dan keharmonian di kalangan rakyat, tidak kira bangsa atau agama di bawah kepimpinan Yang Berhormat Tun Dr. Mahathir Mohamad, negeri Sarawak walaupun terpisah oleh Lautan China Selatan telah menikmati pembangunan infrastruktur serta ekonomi yang seiring dengan negeri-negeri di Semenanjung.

Semua ini telah menyumbang kepada toleransi serta perpaduan rakyat yang lebih mantap dan melahirkan perasaan kekitaan yang menjadi tunjang kestabilan politik serta kekuatan ekonomi negara. SUPP berdoa agar Yang Berhormat Tun dan Yang Berbahagia Tun Dr. Siti Hasmah dan keluarga akan terus sentiasa dalam keadaan sihat, berbahagia dan akan terus menyumbang idea-idea bernas demi rakyat dan negara.

Tuan Yang di-Pertua, saya akhiri ucapan saya dengan serangkap pantun bagi mengenang jasa serta pengorbanan Yang Berhormat Tun Dr. Mahathir bin Mohamad sebagai Perdana Menteri Malaysia yang keempat dan Yang Berbahagia Tun Dr. Siti Hasmah binti Mohd. Ali kepada negara dan bangsa, berbunyi begini:

*Waktu malam memasang pelita,  
Pelita kencana indera pura,  
Tuanlah wira kebanggaan kita,  
Menjaga maruah kedaulatan negara... [Tepuk]*

Sekian. Saya menyokong.

**Tuan Yang di-Pertua:** Yang Amat Berhormat Perdana Menteri menjawab. Ya.

1.02 ptg.

**Perdana Menteri [Dato' Seri Abdullah bin Haji Ahmad Badawi]:** Tuan Yang di-Pertua, saya ingin mengucapkan berbilang-bilang terima kasih kepada Ahli-ahli Yang Berhormat yang telah mengambil bahagian dalam membahaskan Usul yang telah saya bantah iaitu Usul untuk merakamkan penghargaan kepada bekas Perdana Menteri iaitu Ahli Parlimen Kubang Pasu atas jasa-jasanya dan sumbangannya kepada pembangunan negara dan bangsa.

Saya telah mencatat pandangan-pandangan yang telah diberikan oleh Ahli-ahli Yang Berhormat yang mengambil bahagian, kesemuanya lapan orang Ahli Yang Berhormat bagi Pontian, Ahli Yang Berhormat bagi Sungai Siput, Ahli Yang Berhormat bagi Kepong, Ahli Yang Berhormat bagi Kinabalu, Ahli Yang Berhormat bagi Parit Buntar, Ahli Yang Berhormat bagi Samarahan, Ahli Yang Berhormat bagi Parit Sulung dan Ahli Yang Berhormat bagi Sarikei.

Saya daripada perbahasan yang telah berjalan sekian lama, setelah saya mencadangkan Usul itu, saya ucap terima kasih sekali lagi kepada semua yang mengambil bahagian di atas pandangan-pandangan yang telah diberikan dan khususnya pandangan-pandangan yang telah pun berupa sokongan kepada Usul yang telah saya kemukakan. Pandangan-pandangan yang melahirkan juga rasa penghargaan Ahli Yang Berhormat yang telah bercakap tentang pengorbanan, tentang kepimpinan, tentang jasa-jasa yang telah pun diberikan oleh Ahli Parlimen Kubang Pasu iaitu bekas Perdana Menteri kita, Tun Dr. Mahathir bin Mohamad. Juga yang telah saya ambil ingatan juga tentang beberapa teguran-teguran dan penilaian-penilaian yang telah pun diberikan, semuanya itu juga adalah perkara-perkara yang patut juga diberi perhatian.

Dalam apa juga tindakan-tindakan yang akan kita ambil nanti khususnya yang ada hubung kait dengan pembangunan negara kita dan pendekatan-pendekatan yang selama ini telah dilaksanakan.

Saya juga mengucapkan terima kasih kepada Ahli Yang Berhormat atas ucapan tahniah mereka yang telah diberikan kepada saya, serta juga beberapa peringatan-peringatan yang telah pun disuarakan oleh Ahli Yang Berhormat tentang perkara-perkara yang dianggap penting, yang dianggap boleh dilaksanakan oleh saya nanti dan oleh pentadbiran.

Saya menghargainya dan mengucapkan terima kasih, semuanya Tun Dr. Mahathir Mohamad sendiri telah pun menjadi satu contoh dan teladan kepada kita dalam banyak hal yang berkaitan dengan kepimpinan dan usaha-usaha yang telah dilaksanakan dengan penuh dedikasi, komitmen untuk menjayakan pentadbiran dan pembangunan negara kita. Beliau telah pun memberi keyakinan kepada kita, bahawa kita memang boleh, rakyat Malaysia boleh tetapi untuk memastikan apa yang kita kata boleh itu, akhirnya menjadi kenyataan kita perlulah dengan itu, memberi segala tumpuan kepada apa yang hendak kita capai bagi masa depan bangsa dan negara.

Saya ucap terima kasih lagi sekali kepada semua Ahli Yang Berhormat yang telah pun mengambil peluang, yang telah pun mengambil bahagian dan membincangkan usul-usul yang telah saya bantah dengan sokongan yang telah diberikan. Terima kasih....  
[Tepuk]

**Tuan Yang di-Pertua:** Ya. Ahli-ahli Yang Berhormat, sekarang saya kemukakan masalah bagi diputuskan. Masalahnya ialah bahawa Usul Yang Amat Berhormat Perdana Menteri itu hendaklah dipersetujui.

Usul dikemuka bagi diputuskan, dan disetujui.

Usul dipersetujui.... [Tepuk]

**Tuan Yang di-Pertua:** Ahli-ahli Yang Berhormat, sebelum saya menanggungkan Mesyuarat, saya ada satu pengumuman yang hendak dibuat. Untuk makluman Ahli-ahli

Yang Berhormat, Usul Yang Berhormat bagi Shah Alam yang telah dinaikkan kepada urusan yang ke-2 dalam Aturan Urusan Mesyuarat pada hari ini ialah dengan permintaan dan persetujuan kerajaan di bawah Peraturan Mesyuarat 15(1) dengan dianggap usul itu sebagai satu usul dari pihak kerajaan bagi mendahului lain-lain urusan yang tertera di dalam urusan Mesyuarat dan sebagai urusan yang kedua dalam Aturan Urusan Mesyuarat pada hari ini.

Ahli-ahli Yang Berhormat, Mesyuarat ditangguhkan hingga jam 2.30 petang.

***Mesyuarat dtempohkan pada pukul 1.06 petang.***

***Mesyuarat disambung semula pada pukul 2.30 petang.***

[Timbalan Yang di-Pertua (Datuk Lim Si Cheng) ***mempengerusikan Mesyuarat***]

### USUL

#### **MENGALU-ALUKAN DAN MENYOKONG PELANTIKAN DAN KEPEMIMPINAN YAB DATO' SERI ABDULLAH BIN HAJI AHMAD BADAWI AHLI PARLIMEN BAGI KEPALA BATAS SEBAGAI PERDANA MENTERI MALAYSIA YANG KELIMA**

**Timbalan Yang di-Pertua [Datuk Lim Si Cheng]:** Yang Berhormat, sila.

**2.32 ptg.**

**Dato' Ir. Mohd. Zin bin Mohamed [Shah Alam]:** Bismillahir Rahmanir Rahim. Assalamualaikum Warahmatullahi Taala Wabarakatuh dan Salam Sejahtera.

Tuan Yang di-Pertua, terlebih dahulu saya suka merakamkan ucapan jutaan terima kasih kerana diberikan keizinan untuk membawa satu Usul di bawah Peraturan Mesyuarat Dewan Rakyat 27(3), Dewan ini mengambil ketetapan berikut:

**Bahawasanya** Dewan ini mengiktiraf dan mengucapkan setinggi terima kasih terhadap segala jasa dan bakti Yang Berhormat Ahli Parlimen bagi Kubang Pasu dalam konteks menerajui kepemimpinan kerajaan dan negara Malaysia ketika menjadi Perdana Menteri selama 22 tahun, selain merestui keputusan beliau untuk mengundurkan diri dan melepaskan jawatan Perdana Menteri;

**Bahawasanya** Dewan ini mengalu-alukan dan menyanjung tinggi pelantikan Yang Amat Berhormat Ahli Parlimen bagi Kepala Batas sebagai pengganti Yang Berhormat bagi Kubang Pasu sebagai Perdana Menteri Malaysia yang baru;

**Menyedari** bahawasanya pelantikan ini akan membawa kepada kesinambungan dasar dan proses pembangunan negara, khususnya dalam bidang-bidang ekonomi, pendidikan serta sosial bagi mewujudkan bangsa Malaysia yang berdaya saing, jati diri tinggi, cintakan negara serta keprihatinan bercirikan adat resam ketimuran serta mengamalkan ajaran dan amalan pelbagai agama;

**Menyedari** pelantikan ini akan menerus dan mempertingkatkan usaha pembangunan Malaysia menjadi negara maju bagi mencapai matlamat Wawasan 2020;

**Menyedari** pelantikan ini akan memperkasa lagi usaha kerajaan dan rakyat bagi menyerlah dan menjunjung Malaysia sebagai sebuah negara Islam yang progresif dan dinamik yang diiktiraf dan dihormati dunia;

**Bahawasanya** pelantikan ini akan menyerlah lagi kepemimpinan dan menonjolkan keupayaan Yang Amat Berhormat Ahli Parlimen bagi Kepala Batas sebagai pemimpin tertinggi negara dengan ciri dan gaya kepemimpinan yang tersohor dan dihormati;

**Bahawasanya** pelantikan ini akan membawa kepada perpaduan dan keharmonian rakyat Malaysia yang semakin jitu melalui dasar-dasar integrasi nasional selain mampu meningkatkan usaha membentuk ciri-ciri keluarga bahagia dan menyumbang kepada pembangunan negara;

**Dengan ini**, semua Ahli Dewan Rakyat mengambil ketetapan dan berikrar memberikan janji-janji dan komitmen yang jitu dalam melaksanakan amanah serta tanggungjawab selaku Ahli Dewan Rakyat;

**Dengan ini**, semua Ahli Dewan Rakyat memperkasa keyakinan dan perpaduan dalam permuafakatan dan kesetiaan yang tidak berbelah-bagi terhadap Yang Amat Berhormat Ahli Parlimen bagi Kepala Batas selaku Perdana Menteri Malaysia; dan

**Dengan ini**, bahawasanya Dewan ini berdiri teguh sambil menyokong sepenuhnya pelantikan dan kepemimpinan Yang Amat Berhormat Ahli Parlimen bagi Kepala Batas selaku Perdana Menteri Malaysia yang kelima.... [Tepuk]

Tuan Yang di-Pertua, pepatah Melayu ada mengatakan, "*Benih yang baik jika jatuh ke laut akan menjadi pulau*" dan "*Hanya jauhari sahaja yang kenal manikam*".

Dua pepatah ini saya ingin gambarkan mengenai Perdana Menteri Malaysia kita yang kelima. Pepatah pertama menggambarkan betapa banyak ujian yang terpaksa dijalani, bagaimanapun berkat kesabaran dan kesediaan untuk memberikan yang terbaik untuk orang Melayu dan rakyat Malaysia akhirnya ditakdirkan oleh Allah S.W.T. ke persada Perdana Menteri juga duduknya.

Pepatah kedua menggambarkan bagaimana Perdana Menteri sebelumnya mengetahui antara pemimpin yang ramai dalam UMNO itu hanya sebutir permata, itulah yang mempunyai segala kelebihan.

Saya amat yakin bahawa Perdana Menteri yang amat kita kasihi, Yang Amat Berhormat Dato' Seri Abdullah bin Haji Ahmad Badawi, atau panggilan mesranya 'Pak Lah', dilantik bukanlah kerana terdesak seperti yang ditohmah oleh sesetengah orang, sebaliknya saya amat yakin ia dibuat dalam tempoh penilaian yang lama, apa lagi Yang Amat Berhormat Perdana Menteri adalah anggota Kabinet pertama bekas Perdana Menteri keempat Yang Berhormat Tun Dr. Mahathir Mohamad.

Dalam Kabinet pertama Dr. Mahathir yang diumumkan pada 18 Julai 1981, Yang Amat Berhormat Dato' Seri Abdullah dilantik sebagai Menteri di Jabatan Perdana Menteri dan selama 22 tahun sehinggalah sebagai Timbalan Perdana Menteri dan Menteri Dalam Negeri.

Sebelum bercuti sabbatical Yang Amat Berhormat Dato' Seri Abdullah pernah memegang jawatan Menteri Pelajaran dan Menteri Pertahanan. Apabila kembali daripada bercuti, beliau menjadi Menteri Luar selama sembilan tahun iaitu antara 1991 dan 1999, beliau dianggap sebagai Menteri Luar paling menyerlah dan dinamik....

**Menteri Luar Negeri [Datuk Seri Syed Hamid bin Syed Jaafar Albar]:....**  
[Mengangguk-anggukkan kepala] [Ketawa]

**Dato' Ir. Mohd. Zin bin Mohamed:** Saya ingat Menteri Luar Negeri yang di belakang itu pun bersetuju dengan saya....

**Seorang Ahli:** Bersetuju.

**Dato' Ir. Mohd. Zin bin Mohamed:** Boleh dikatakan asas pembentukan dasar luar Malaysia yang dipraktikkan ketika ini, banyak dipengaruhi oleh perkembangan luar negara, antara 1991 hinggalah yang terakhir Sidang Kemuncak Pertubuhan Persidangan Islam atau OIC baru-baru ini.

Di persada antarabangsa, kebolehan beliau tidak boleh dipertikaikan lagi kerana peranan dan pengalamannya menjalin hubungan dengan pemimpin luar begitu menyerlah dan sangat dihormati.

Tuan Yang di-Pertua, saya ingin merujuk satu riwayat sahabat Nabi Muhammad s.a.w. iaitu Abu Zahr Al-Kifari yang bertanyakan Nabi Muhammad s.a.w. mengapa Nabi tidak memberikan suatu jawatan yang penting kepadanya pada zaman Baginda s.a.w. Nabi lantas memberikan jawapan, apabila dilantik seseorang untuk sesuatu tugas yang bukan ahlinya, maka nantilah saat kehancurannya.

Jawapan di atas diberikan dengan maksud bahawa Nabi tahu, tugas itu tidak sesuai untuk Abu Zahr dan tidak terpikul olehnya.

Tuan Yang di-Pertua, jika ada sesetengah pemimpin berbangga kerana daripada keturunan pemimpin negara, tokoh politik, tokoh perniagaan, tokoh pendidik atau sebagainya, Perdana Menteri kita ini datang daripada keluarga ulama dan politik yang berpengaruh di Pulau Pinang. Bapa Yang Amat Berhormat Perdana Menteri, Ahmad Badawi, adalah bekas mufti pertama Pulau Pinang. Manakala datuknya, Abdullah Fahim adalah ulama terkenal dan seorang daripada pengasas UMNO yang memainkan peranan penting dalam menetapkan tarikh kemerdekaan negara pada 31 Ogos 1957. Jadi tidak hairanlah kalau sekali lagi boleh saya gunakan pepatah Melayu yang berbunyi "*Ke mana lagi tumpahnya kuah, kalau tidak ke nasi*" serta "*Bapa borek, anak rintik*".

Apatah lagi Perdana Menteri kita ini memiliki Ijazah dalam bidang Pengajian Islam dari Universiti Malaya. Saya berkeyakinan penuh bahawa Malaysia akan selamat di bawah kepimpinan Yang Amat Berhormat Perdana Menteri berasaskan latar belakang sedemikian. Sebagai pemimpin sebuah kerajaan yang berani menegaskan bahawa Malaysia sebuah negara Islam dan tidak berdolak-dalik, saya berkeyakinan penuh kepimpinan baru ini tahu ke mana akan dibawa negara ini. Adalah menjadi harapan seluruh rakyat bahawa Islam yang diamalkan di negara ini akan terus menekankan unsur-unsur murni selain menjaga kepentingan bukan Islam termasuk meletakkan wanita dan warga emas di tempat sewajarnya.

Dalam konteks ini saya cukup yakin amat sukar bagi sesiapa juga untuk mempersoalkan keupayaan Perdana Menteri kita kerana pada dasarnya sifat-sifat ukhawah dan amanah ada padanya. Dengan ciri-ciri peribadi yang bersifat benar, tabligh dan bijaksana yang ada padanya amatlah jelas Barisan Nasional tidak silap memilih Yang Amat Berhormat Dato' Seri Abdullah bin Haji Ahmad Badawi untuk menjadi Perdana Menteri... *[Disorak]*. Seperti saya katakan tadi, Perdana Menteri yang kita kasihi pernah menjadi Menteri Pelajaran. Kefahaman beliau mengenai pentingnya mengejar ilmu begitu terserlah dan tidak pernah luput hingga sekarang. Saya ingin merujuk ucapan beliau di Masjid Pongsu Seribu, Kepala Batas pada 24 November 2002 di mana menurut Yang Amat Berhormat Dato' Seri Abdullah bin Haji Ahmad Badawi, umat Islam perlu menyedari kekuatan ilmu pengetahuan yang bukan sahaja mampu membantu meningkatkan ekonomi mereka malahan ekonomi seluruh umat Islam lain. Hanya melalui kekuatan ekonomi sahaja umat Islam akan dipandang tinggi oleh masyarakat lain serta memberi kekuatan kepada mereka agar kedudukan mereka sukar digugat.

Selain itu beliau berkata umat Islam juga perlu meneruskan tradisi bermuafakat, bekerjasama, berbilang, bermuhasabah serta tegur-menegur dalam semangat persaudaraan. Amatlah jelas Perdana Menteri kita cukup menginsafi bahawa walaupun kita dikurniakan kekayaan serta maju dalam bidang ekonomi, mereka seharusnya mengamalkan sikap rendah diri dan hidup secara berbaik-baik sesama mereka. Dengan kata lain, setiap rakyat tidak boleh hidup secara bersendirian kerana Islam mengajar mereka supaya hidup berbaik-baik sesama insan di samping menyuruh mereka memberi keutamaan kepada kebaikan hidup di dunia dan di akhirat.

Kita amat berharap Perdana Menteri akan melihat masalah pendidikan khususnya bumiputera ke akar umbi dan bersatu padu untuk mencari jalan bagi menyelesaikan masalah pendidikan di kalangan anak-anak yang kurang cemerlang. Yang penting ialah ilmu yang banyak diperlukan digunakan untuk kebaikan dan kebajikan bersama kerana jika tidak dikongsi bersama, ilmu bagaikan harta yang hanya akan berlegar di kalangan beberapa tangan yang akhirnya yang kaya akan terus kaya dan yang miskin akan menjadi beban kepada pemerintah.

Tuan Yang di-Pertua, saya yang mewakili rakan-rakan dalam Dewan Rakyat yang mulia ini ingin merakamkan keyakinan penuh terhadap Perdana Menteri untuk membawa kita semua kepada suatu kehidupan yang aman dan bersatu padu di kalangan rakyat semua kaum di negara ini. Sebagai pemimpin yang sudah tahan diuji dan memahami sepak terajang politik, saya yakin Yang Amat Berhormat Dato' Seri Abdullah Haji Ahmad Badawi mampu dan ikhlas melaksanakan tanggungjawabnya. Sebenarnya masih banyak yang boleh kita semua lakukan tidak kira sama ada kita daripada pihak kerajaan ataupun pembangkang. Semua daripada kita mempunyai kekuatan untuk menjadikan Malaysia negara maju dan makmur selain dihormati di mata dunia.

Saya percaya sifat mesra keterbukaan dan sanggup menerima pandangan orang lain akan menjayakan lagi usaha membawa Malaysia ke persada dunia dalam pelbagai bidang. Dengan kata lain, kita semua perlu bekerjasama dan bersatu hati dalam melaksanakan tugas kita demi memajukan bangsa dan negara. Kerana itu, berilah sokongan padu kepada kepimpinan baru ini sebagai titik baru bagi kita semua untuk bergerak ke destinasi baru Malaysia yang aman, makmur dan sejahtera. Saya cukup yakin, Dato' Seri Abdullah bin Haji Ahmad Badawi sentiasa mengingati firman Allah yang berbunyi "*Wahai manusia, sesungguhnya aku jadikan kamu daripada kalangan lelaki dan wanita dan aku jadikan daripada kamu berpuak-puak dan berbangsa-bangsa untuk kamu saling kenal mengenali. Sesungguhnya yang paling mulia antara kamu ialah yang paling bertakwa antara kamu. Sesungguhnya Allah maha mengetahui dan maha mengerti*".

Tun Yang di-Pertua,

**Timbalan Yang di-Pertua [Datuk Lim Si Cheng]:** Yang Berhormat, Tun belum masuk lagi.

**Dato' Ir. Mohd. Zin bin Mohamed:** Minta maaf, Tuan Yang di-Pertua. Sedikit hari lagi nanti naik pangkat.... [Ketawa] Lain kali.

Tuan Yang di-Pertua, kefahaman Perdana Menteri dalam konteks masyarakat majmuk di negara ini begitu jelas dan mendalam. Malah tidak pernah lari daripada firman Allah tadi yang menekankan betapa kepelbagaian bangsa dan agama di Malaysia dan di dunia ini bertujuan supaya kita saling mengenali dan mengasihani, bukan bermusuhan ataupun berkonflik. Apa yang berlaku kini ialah perubahan kepimpinan. Bukan satu perubahan rejim ataupun pemerintah. Dengan kata lain, perubahan terpaksa dilakukan dan tidak semestinya perubahan kepimpinan akan menyebabkan perubahan dasar dan pendekatan pembangunan kita dalam masyarakat majmuk seperti Malaysia.

Tuan Yang di-Pertua, setiap air bah, sudah pasti pantai akan berubah. Namun hasrat dan iltizam kita semua tetapi satu dan padu iaitu kita semua bergerak sebagai satu kekuatan, satu aspirasi, satu wawasan dan satu negara untuk menjadikan Malaysia berwibawa dan menjadi kebanggaan rakyat semua. Kita di Dewan Rakyat yang mulia ini sudah pasti ada perbezaan pendapat dan pendekatan. Namun tidakkah wajar bagi kita semua walaupun kita melalui lorong yang berbeza tetapi memandangkan hasrat, cita-cita dan matlamat adalah sama dan seiring sejalan, perbezaan dan perselisihan kita ubati serta bergerak dalam semangat tinggi yang meletakkan kepentingan agama, bangsa dan negara mengatasi segala-galanya.

Tuan Yang di-Pertua, perubahan kepimpinan tidak bermakna perubahan kepada dasar. Kalau ada perubahan pun, ia adalah pendekatan. Tidaklah logik untuk kita mengatakan tidak ada perubahan langsung. "*Lain padang lainlah belalang, lain dulu lainlah sekarang*". Itu adalah lumrah dunia. Namun kerajaan yang dipimpin oleh Perdana Menteri kita pastinya akan menjamin dasar-dasar yang baik terus dilaksanakan sementara yang perlu kepada penyesuaian, dilakukan secara yang berkesan. Kita masih ingat bagaimana Dasar Ekonomi Baru khususnya berkaitan menyusun semula masyarakat dilaksanakan. Kita juga tahu bagaimana pendekatan terhadap pendidikan untuk bumiputera. Ia dilakukan untuk kebaikan dan bukanlah ia terhenti di situ selama-lamanya.

Saya yakin dalam konteks pendekatan pendidikan, tidak kiralah untuk bumiputera atau bukan bumiputera, Perdana Menteri mampu untuk menilai semula pencapaian sejauh ini. Pun begitulah juga dalam soal kecapaian keseluruhan Dasar Ekonomi Baru. Dalam konteks ekuiti dan ekonomi bumiputera, saya penuh yakin dalam konteks kecapaian ini

pada ketika mahu melaksanakan dan menjayakan Wawasan 2020, Yang Amat Berhormat Dato' Seri Abdullah bin Haji Ahmad Badawi mempunyai misi dan visinya sendiri.

Kita berdoa dan berharap supaya setiap pembangunan dilakukan secara yang terbaik, adil dan saksama untuk semua rakyat. Amatlah penting bagi pembangunan negara di mana hasil dan nikmatnya dirasakan oleh seluruh rakyat jelata. Bukan seseorang, sekumpulan atau kumpulan sasaran tertentu sahaja. Semua bentuk pembangunan adalah untuk rakyat jelata sebagai membalas jasa mereka kerana menyokong kita membentuk kerajaan. Satu lagi kekuatan Perdana Menteri adalah memahami dan mempunyai keazaman dan iltizam politik, dengan izin, *political will* untuk menggunakan Sistem Ekonomi Islam tanpa menunggu satu sistem yang sempurna dibentuk.

Beliau pernah mengatakan bahawa Sistem Kewangan dan perdagangan Islam itu boleh diperbetulkan apabila diguna pakai memandangkan apa yang terpenting ialah memastikan ia dapat dilancarkan secepat mungkin. Menurut beliau, sekarang adalah masanya untuk kita memulakan Sistem Kewangan dan Perdagangan Islam kerana kita sebenarnya tidak perlu menunggu satu sistem yang sempurna diwujudkan sebelum bermula. Jika kita tidak mulakan sekarang, kita akan terus berdebat yang mana satu yang betul jadi. Lebih baik kita sempurnakanlah sepanjang ia digunakan. Kalau kita tidak perkenalkan, kita tidak akan tahu apa kelebihan, kelemahan dan faedahnya.

Ucapan yang beliau sampaikan di dalam Forum Perniagaan Pertubuhan Persidangan Islam atau OIC di Hotel Marriot Putrajaya baru-baru ini. Bersandarkan kepada kefahaman Perdana Menteri kita yang mendalam bahawa berlatarbelakangkan ketidakadilan proses globalisasi yang boleh menyebabkan kegawatan dalam ekonomi dunia, sistem kewangan dan perdagangan Islam boleh menyumbang untuk menjadikan dunia lebih seimbang dan saksama. Lagipun sistem ekonomi Islam melarang peniaga menekan orang lain serta menggalakkan kerjasama berdasarkan perkongsian risiko dan untung.

Dengan kata lain, berasaskan kepada keyakinan Perdana Menteri bahawa sistem ekonomi Islam lebih berkesan dari segi pengagihan kekayaan dan menggalakkan pertumbuhan ekonomi berdaya tahan serta adil, kita menunggu dan tidak sabar untuk melihat pendekatan beliau dalam melaksanakan dan menjayakan dasar-dasar berkenaan. Keberanian ini perlu disokong oleh semua pihak kerana tidak ada sebabnya orang Islam tidak menggunakan instrumen kewangan dan perdagangan Islam kerana ia boleh membawa kebaikan kepada ummah serta dunia secara keseluruhannya. Saya berkeyakinan penuh sistem perdagangan dan kewangan Islam akan menyumbang kepada dunia yang lebih seimbang dan adil berbanding sistem kewangan konvensional.

Tuan Yang di-Pertua, kerjasama padu di kalangan 10 anggota ASEAN bagi menjayakan Dasar Keamanan Serantau dan menjamin terlaksananya Kawasan Perdagangan Bebas ASEAN selain mewujudkan ASEAN Economic Community sudah pasti menjadi keutamaan dasar luar kita melalui kepimpinan Yang Amat Berhormat Dato' Seri Abdullah bin Haji Ahmad Badawi. Dengan memegang jawatan Pengerusi kepada dua pertubuhan besar dunia iaitu Pergerakan Negara-negara Berkecuali atau NAM yang dianggotai oleh 119 negara anggota dan Pertubuhan Persidangan Islam iaitu OIC yang disertai oleh 57 buah negara, suara Perdana Menteri bukan sahaja suara yang akan didengari oleh 22 juta rakyat Malaysia tetapi oleh lebih 2.5 bilion penduduk melalui NAM dan 1.3 bilion penduduk di negara Islam.

Suara ini adalah suara yang akan memperjuangkan supaya budaya konflik dan peperangan digantikan kepada keamanan berdasarkan kepada pemahaman, toleransi dan saling melengkapi. Suara ini juga yang akan mengkritik Majlis Keselamatan Pertubuhan Bangsa-Bangsa Bersatu atau PBB jika masih banyak keputusan besar pertubuhan antarabangsa itu dibuat bukan berdasarkan kepada kriteria objektif sebaliknya kepentingan kuasa besar dunia. Persoalan utama yang akan ditekankan ialah NAM dan OIC tidak boleh dibiarkan dilihat sebagai banyak bercakap dan kurang bertindak.

Bagi kuasa besar, mereka mengharapkan negara kecil berpecah belah dan bercelaru di mana tujuannya adalah satu iaitu dapat terus menguasai kita. Kerana itu sekretariat di Kuala Lumpur yang dipertanggungjawabkan mewujudkan mekanisme bagi

melaksanakan sepenuhnya hasil sidang kemuncak NAM dan OIC perlu dijadikan *showcase* dengan melaksanakan tugas dengan baik demi kepentingan negara membangun selain menjaga nama baik Malaysia termasuklah Perdana Menteri yang kita kasihi.

Tuan Yang di-Pertua, saya amat yakin kita semua dalam Dewan yang mulia ini tidak mempunyai sebarang keraguan dan ingin menegaskan sepenuh keyakinan terhadap kepimpinan Perdana Menteri Kelima ini sambil berharap semua Ahli Parlimen menyokong kepimpinan beliau. Sebelum ini pun beliau membuktikan sebanyak dua kali yang beliau mampu menjalankan tugas. Pertama ialah menjalankan tugas sebagai Perdana Menteri dan Menteri Kewangan antara 2 dan 28 Februari 2002. Kemudian sekali lagi pada 6 Mac hingga 4 Mei lalu, memangku jawatan Perdana Menteri dan Menteri Kewangan selama dua bulan. Selain dari itu, kedudukan Yang Amat Berhormat Dato' Seri Abdullah bin Haji Ahmad Badawi dalam parti tidak perlu dipertikaikan dan siapa yang akan beliau pilih untuk membantunya sebagai orang nombor dua juga adalah hak beliau untuk menentukan.

Sebelum saya mengakhiri ucapan, Tuan Yang di-Pertua, izinkan saya mengungkap sedikit mengenai peribadi Perdana Menteri yang kita kasihi.

Yang Amat Berhormat Dato' Seri Abdullah mempunyai perawakan yang lembut, tidak macam saya dengan Datuk Ahmad Zahid bin Hamidi... *[Ketawa]* Tetapi dalam kelembutan itulah sebenarnya kekuatan beliau. Perdana Menteri tidak mencipta atau sengaja membabitkan diri untuk menonjol melalui kontroversi. Beliau bukan jenis yang menganjurkan tunjuk perasaan. Bukan jenis yang suka melobi atau menguji pengaruh.

Sebagai orang nombor dua selama ini, beliau membuktikan bahawa sifat menurut perintah dan *subservient* lebih penting. Beliau tidak menekankan kepada glamor dan populariti seperti orang nombor dua sebelum ini. Yang Amat Berhormat Perdana Menteri adalah pemimpin yang sederhana tetapi melalui kesederhanaan itulah yang terpancar pengaruhnya yang sukar untuk ditandingi. Selain itu, sebagai penjelasan untuk rakan-rakan bukan Islam, sifat-sifat keislaman yang tinggi pada Perdana Menteri akan mendatangkan kebaikan kepada kita semua. Tidak perlu kita khuatir bahawa kepimpinan Islam mungkin akan menyulitkan yang bukan Islam.

Tuan Yang di-Pertua, kita sudah berpengalaman di mana 22 tahun yang lalu, kita dipimpin oleh seorang Perdana Menteri yang digelar ultra Melayu. Akan tetapi apa yang berlaku selepas itu, bukan Melayu tetap mendapat tempat dalam politik, ekonomi dan profesional di Malaysia. Hakikatnya Perdana Menteri kita ini sifatnya *Islamic* dan inilah kekuatan yang sewajarnya kita banggakan kerana sifat-sifat keislaman yang ada pada diri Perdana Menteri akan menjadikan negara ini lebih makmur kerana Islam mengajar kita supaya saling bertoleransi dan hidup secara harmoni demi Malaysia yang aman dan sejahtera.

Tuan Yang di-Pertua, akhirnya saya mewakili rakan-rakan di Dewan Rakyat ini ingin mengucapkan selamat berbakti, selamat berjuang kepada negara sebagai orang nombor satu dalam kerajaan. Di bahunyalah diletakkan harapan orang Melayu dan bangsa Malaysia seluruhnya. Insya-Allah...*[Tepuk]* Tuan Yang di-Pertua, saya mohon mencadangkan ... *[Tepuk]*

**Beberapa Ahli:** *[Bangun]*

**Timbalan Yang di-Pertua [Datuk Lim Si Cheng]:** Yang Berhormat bagi Rasah. Yang Berhormat hendak sokong, ya?

**2.51 ptg.**

**Dato Goh Siow Huat [Rasah]:** Ya. Terima kasih Tuan Yang di-Pertua. Saya mengucapkan terima kasih kerana dibenarkan mengambil bahagian dalam usul sokongan pelantikan Yang Amat Berhormat Ahli Parlimen bagi Kepala Batas, Dato' Seri Abdullah bin Haji Ahmad Badawi sebagai Perdana Menteri Malaysia Kelima.

Tuan Yang di-Pertua, 31 Oktober 2003 adalah hari bersejarah Malaysia. Kita dapat lihat Perdana Menteri Malaysia Keempat, Yang Berhormat Ahli Parlimen bagi Kubang Pasu, Tun Dr. Mahathir bin Mohamad berjaya menyerah kuasa dengan penuh sempurna dan paling terancang. Di sini saya juga ingin mengucapkan jutaan terima kasih kepada

Yang Berhormat Ahli Parlimen bagi Kubang Pasu selaku Perdana Menteri Malaysia Keempat yang telah bertugas selama 22 tahun dan telah membawa era kemajuan kepada negara kita Malaysia.

Tuan Yang di-Pertua, saya selaku ahli BBC, juga bagi pihak Parti MCA, amat mengalu-alukan Yang Amat Berhormat Ahli Parlimen bagi Kepala Batas, Yang Amat Berhormat Dato' Seri Abdullah bin Haji Ahmad Badawi mengambil alih kuasa dan jawatan sebagai Perdana Menteri Malaysia yang baru. Upacara penyerahan kuasa ini telah dapat disaksikan oleh seluruh rakyat jelata melalui siaran TV dan radio. Siaran langsung ini bukan sahaja di negara kita tetapi juga ke seluruh dunia. Penyerahan kuasa ini telah mendapat komen yang baik dari negara-negara asing seperti perutusan tahniah dari negara China, rakaman penghargaan dari Singapura, pujian dari negara India dan lain-lain. Saya ucapkan tahniah dan syabas kepada Yang Amat Berhormat Ahli Parlimen bagi Kepala Batas selaku Perdana Menteri Malaysia Kelima. Saya percaya seluruh rakyat Malaysia pasti mengalu-alukan dan menyanjung tinggi pelantikan Yang Amat Berhormat Ahli Parlimen bagi Kepala Batas, Dato' Seri Abdullah bin Haji Ahmad Badawi sebagai Perdana Menteri Malaysia yang baru, pimpinan era generasi baru.

Tuan Yang di-Pertua, sebagaimana yang kita sedia maklum, Yang Amat Berhormat Perdana Menteri adalah seorang pemimpin negara yang penuh berpengalaman, berpotensi, cekap dan bijaksana. Yang Amat Berhormat Perdana Menteri lebih dikenali sebagai seorang pemimpin yang tenang, mesra dan berhati-hati dalam setiap tindakannya. Tuan Yang di-Pertua, satu kelebihan Yang Amat Berhormat Perdana Menteri ialah perwatakannya yang sentiasa ceria, ramah terhadap sesiapa sahaja, penyabar dan jarang marah sehingga kakitangan yang sudah lama bekerja dengannya dilayan seperti ahli keluarga sendiri.

Sejak dilantik sebagai Timbalan Perdana Menteri pada 8 Januari 1999, Yang Amat Berhormat Perdana Menteri terus bertugas dengan rajin dan menjalankan tugas dengan penuh amanah serta menjelajah ke seluruh negara untuk bermesra dan rapat dengan rakyat jelata. Pengalaman menjadi Timbalan Perdana Menteri selama lima tahun ini sudah pasti cukup membantunya menjalankan tugas terbaru ini untuk terus berusaha ke arah mencemerlangkan rakyat Malaysia.

Tuan Yang di-Pertua, Yang Amat Berhormat Perdana Menteri juga pernah memegang portfolio penting dalam Kabinet Malaysia seperti memegang jawatan Menteri Pendidikan dan Menteri Luar Negeri. Antara perkara yang menjadi keutamaan ketika menjadi Menteri Pendidikan ialah memastikan pendidikan menjadi adab untuk memupuk perpaduan di kalangan rakyat berbilang, kaum, agama dan budaya. Beliau sentiasa mengingatkan rakyat khususnya generasi muda perlu berusaha bersungguh-sungguh untuk merapatkan jurang perkauman yang amat penting untuk menjamin perpaduan negara.

Tuan Yang di-Pertua, Yang Amat Berhormat Perdana Menteri telah menjadi Menteri Luar Negeri paling lama iaitu selama sembilan tahun. Semasa memegang jawatan Menteri Luar Negeri beliau telah memainkan peranan yang amat berkesan untuk memantapkan hubungan Malaysia dengan dunia luar. Pengalaman diplomatik di Kementerian Luar Negeri sudah pasti akan membantu beliau berurusan di arena antarabangsa.

Tuan Yang di-Pertua, oleh itu kita mesti mempunyai keyakinan penuh dan memberi sokongan 100% kepada Yang Amat Berhormat Perdana Menteri Malaysia kelima untuk merealisasikan visi *Malaysia Boleh*. Saya percaya Malaysia dapat terus cemerlang di bawah pimpinan Yang Amat Berhormat sebagaimana yang telah dicapai di bawah kepimpinan terdahulu.

Tuan Yang di-Pertua, berdasarkan pengalaman luas dan ketokohan Perdana Menteri saya percaya dengan harapan daripada rakyat Malaysia, Yang Amat Berhormat Perdana Menteri mesti dapat meneruskan kelancaran dasar kerajaan untuk kejayaan program pembangunan ekonomi dan sosial dan juga kestabilan negara.

Saya sekali lagi memberi sokongan sepenuhnya di atas pelantikan Yang Amat Berhormat Ahli Parlimen bagi Kepala Batas sebagai Perdana Menteri Malaysia kelima bagi

meneruskan kepimpinan yang kukuh dan berinspirasi, rakyat Malaysia dapat terus menikmati kejayaan, kesejahteraan dan keharmonian yang berkekalan.

Mengambil kesempatan ini, saya ucapkan 'Selamat Maju Jaya' kepada Yang Amat Berhormat Perdana Menteri yang mengambil alih kepimpinan negara ke arah mencapai matlamat Wawasan 2020. Saya menyokong usul pelantikan ini.

*[Ramai Ahli bangun untuk berucap]*

**Timbalan Yang di-Pertua [Datuk Lim Si Cheng]:** Yang Berhormat semua minta duduk. Duduk semua.... *[Dewan riuh] [Ketawa]* Ahli-ahli Yang Berhormat masalahnya ialah usul Yang Berhormat bagi Shah Alam sekarang ini terbuka untuk dibahaskan. Subang.

### 3.04 ptg.

**Tan Sri Dato' Dr. K. S. Nijhar [Subang]:** Terima kasih Tuan Yang di-Pertua kerana memberi saya peluang untuk berucap atas usul menyokong pelantikan Yang Amat Berhormat Ahli Parlimen bagi Kepala Batas sebagai Perdana Menteri Malaysia yang kelima.

Apabila saya dipilih menjadi Ahli Parlimen bagi Subang, saya tidak pernah menduga bahawa saya akan diberi penghormatan yang begitu tinggi iaitu memberi ucapan alu-aluan pelantikan Yang Amat Berhormat Perdana Menteri baru.... *[Tepuk]* Sejak beberapa hari yang lepas rakyat Malaysia daripada pelosok negara menghayati suatu detik sejarah dalam arena politik negara. Detik bersejarah yang mana Yang Amat Berhormat bagi Kepala Batas menerajui pucuk pimpinan negara sebagai Perdana Menteri, hari yang penuh bermakna bagi seluruh rakyat dalam negara kita.

Di sini saya ingin merakamkan setinggi-tinggi penghargaan saya kepada Yang Amat Berbahagia Kubang Pasu kerana telah memilih seorang pemimpin yang benar-benar berjiwa rakyat sebagai pengganti beliau. Saya ingin mengucapkan setinggi-tinggi tahniah kepada Yang Amat Berhormat bagi Kepala Batas atas pelantikan bersejarah ini. Pelantikan Perdana Menteri baru telah melalui satu proses peralihan kuasa yang begitu licin, rapi dan aman.

Inilah yang menjadikan peralihan kuasa tersebut begitu unik di negara ini. Seluruh rakyat di Malaysia daripada berbilang kaum menerima pelantikan ini dengan begitu baik. Penerimaan pelantikan ini, jelas menunjukkan kesungguhan rakyat Malaysia menerima seorang pemimpin yang boleh membawa kesinambungan dalam keharmonian dan perpaduan yang teguh dan jitu di antara rakyat Malaysia.

Perkara yang paling penting ialah rakyat Malaysia, rakyat jelata berpendapat mereka boleh percaya terhadap kepimpinan baru ini. Saya juga percaya dengan sepenuh hati Yang Amat Berhormat Perdana Menteri dapat melaksanakan tugas beliau dengan baik sekali. Ini kerana saya amat bertuah mengenali Yang Amat Berhormat bagi Kepala Batas sejak beliau menuntut di Universiti Malaya.

Persahabatan kami bertambah rapat apabila kami menjadi jiran kemudian. Keluarga kami menjadi begitu rapat dan anak-anak kami sentiasa bermain bersama. Berdasarkan pengalaman inilah yang membolehkan saya menceritakan sedikit sebanyak mengenai personaliti Yang Amat Berhormat sebagai seorang insan dan juga sebagai seorang pemimpin.

Sebagai seorang insan, Yang Amat Berhormat merupakan seorang ayah yang begitu penyayang dan mengambil berat tentang kebajikan anak-anak beliau. Beliau juga adalah seorang jiran yang benar-benar peramah dan bersifat sederhana. Saya masih ingat lagi setiap kali ada tetamu di rumah beliau, beliau sendiri yang akan menghidangkan minuman. Sifat rendah diri, berbudi bahasa dan bersopan santun ini merupakan sifat yang memang tersemam dalam diri Yang Amat Berhormat bagi Kepala Batas sejak dahulu lagi.

Sifat-sifat ini amat ketara pada masa beliau menghadapi ujian-ujian politik yang begitu tidak menentu, beliau hampir kehilangan segala-galanya dalam politik. Namun demikian beliau tidak pernah menyalahkan sesiapa. Beliau hanya menerima segala dugaan dan cabaran ini sebagai takdir Tuhan.

Ciri kekuatan yang amat menyerlah dalam diri beliau ialah beliau akan sentiasa mencuba tanpa menyerah kalah dan beliau akan sentiasa bersabar menghadapi cabaran. Begitulah semangat Yang Amat Berhormat Perdana Menteri baru kita. Ciri-ciri di atas telah memberikan satu keunikan kepada Yang Amat Berhormat Perdana Menteri.

Sebagai seorang pemimpin, beliau mudah didampingi. Beliau sangat disenangi di kalangan pemimpin-pemimpin parti politik. Beliau juga amat digemari di kalangan kakitangan kerajaan dan yang paling mustahak beliau amat mesra di kalangan rakyat yang berbilang kaum dan berbilang agama.

Ini membolehkan semasa peralihan kuasa berlangsung, seluruh rakyat Malaysia dapat menerima dan percaya dengan sepenuh hati iaitu Yang Amat Berhormat bagi Kepala Batas akan menjadi Perdana Menteri baru. Kepercayaan rakyat Malaysia ini telah menjana sokongan padu terhadap kepimpinan Yang Amat Berhormat Perdana Menteri baru.

Yang Berhormat bagi Kubang Pasu telah meletakkan Malaysia dalam landasan yang betul dalam menuju kecemerlangan. Kini saya percaya Yang Amat Berhormat bagi Kepala Batas akan meneruskan perjalanan ini ke arah kecemerlangan tersebut. Perjalanan yang akan membawa Malaysia lebih kemakmuran dan kejayaan berbanding dengan negara-negara lain menjelang tahun 2020.

Yang Amat Berhormat Perdana Menteri akan membawa pembangunan fizikal yang berterusan dan di samping itu memberi penekanan kepada aspek kualiti kehidupan. Berdasarkan kepada pengetahuan saya, saya percaya dengan sepenuh hati bahawa kepimpinan Yang Amat Berhormat Perdana Menteri baru akan terus memberi keutamaan dan perhatian khusus kepada aspek kualiti kehidupan.

Beliau akan memberi keutamaan dalam memperbaiki kualiti udara yang kita guna. Beliau akan memberi keutamaan terhadap kualiti air yang kita minum. Beliau akan memberi perhatian terhadap alam sekitar yang kita guna. Saya juga berharap beliau akan memberi penekanan kepada para pemandu mengenai etika penggunaan jalan raya. Justeru itu, saya percaya beliau akan memberi penekanan kepada semua kualiti ini dalam kehidupan seharian kita.

Selain daripada itu, Yang Amat Berhormat Perdana Menteri baru akan memberi pengkhususan kepada *maintenance culture*, dengan izin, seperti yang dinyatakan oleh beliau tidak lama dahulu. Beliau akan memberi perhatian kepada aspek penyelenggaraan infrastruktur dan prasarana yang sedia ada. Dalam konteks ini, Yang Amat Berhormat, saya berharap dan saya percaya rakyat Malaysia akan berbangga sekiranya Yang Amat Berhormat memberi satu sinar baru kepada negara.

Bayangkanlah Yang Amat Berhormat, betapa cantiknya negara ini akan kelihatan jika lapisan cat baru dicat pada setiap bangunan, jalan raya ditarkan semula dan kebersihan sentiasa dijaga. Saya pasti perkembangan ini akan memberi lebih kebanggaan kepada rakyat Malaysia.

Sebagai Ahli Parlimen yang juga memegang jawatan Naib Presiden Parti MIC, salah satu parti komponen utama dalam Barisan Nasional, saya bagi pihak Presiden MIC, ahli-ahli MIC dan juga bagi kaum India di negara ini, melafazkan sokongan penuh dan padu kami atas kepimpinan baru Yang Amat Berhormat Perdana Menteri baru.

Untuk makluman Ahli-ahli Yang Berhormat di Dewan yang mulia ini, jumlah penduduk masyarakat India dalam negara ini ialah seramai 1.75 juta orang. Daripada jumlah ini, 750,000 penduduk India adalah di bawah umur untuk layak mengundi. Justeru itu, bilangan rakyat India yang layak mengundi adalah seramai 1 juta orang. Daripada 1 juta orang ini, hampir 800,000 orang atau 80% adalah pengundi berdaftar dan hampir 90% daripada 800,000 orang India yang berdaftar adalah ahli-ahli MIC, pasangan mereka atau keluarga terdekat mereka.

Tambahan daripada ini, MIC juga sedang giat menjalankan usaha-usaha untuk mendaftarkan bilangan rakyat India yang belum berdaftar. Maka, apabila saya bercakap bagi pihak Presiden dan parti, saya juga bercakap bagi pihak rakyat India dalam negara ini. Dan sebagai wakil daripada kaum India yang diberi peluang untuk berucap dalam usul ini, saya melafazkan sokongan sepenuh hati kami kepada kepimpinan Yang Amat Berhormat

bagi Kepala Batas sebagai Perdana Menteri Malaysia yang kelima.... [*Tepuk*] Kami memberi keyakinan bahawa kami akan sentiasa berpegang kepada kata-kata, berat sama dipikul, ringan sama dijinjing.

Akhir sekali, Tuan Yang di-Pertua, saya berdoa kepada Tuhan Yang Maha Esa agar Yang Amat Berhormat Perdana Menteri dan keluarga sentiasa berada dalam keadaan sihat dan sejahtera dan sentiasa berpegang teguh kepada nilai-nilai murni serta prinsip-prinsip diri beliau dalam menjalankan tugas beliau.

Dengan ini, saya sekali lagi memberi sokongan penuh kepada usul pelantikan Yang Amat Berhormat bagi Kepala Batas menjadi Yang Amat Berhormat Perdana Menteri Malaysia yang kelima. Sekian, terima kasih.

**Timbalan Yang di-Pertua [Datuk Lim Si Cheng]:** Untuk makluman Ahli-ahli Yang Berhormat, sudah 25 Ahli Yang Berhormat hantar nota kepada saya. Jadi, saya minta maaf, saya terpaksa menjalankan tugas saya mengikut Peraturan Mesyuarat 35(2), tidak payah hantar surat lagi.... [*Ketawa*] Kota Melaka.

**Beberapa Ahli:** [*Menyampuk*]

### 3.14 ptg.

**Tuan Kerk Kim Hock [Kota Melaka]:** Tuan Yang di-Pertua, terlebih dahulu saya ingin mengucapkan syabas dan tahniah kepada Dato' Seri Abdullah bin Haji Ahmad Badawi di atas pelantikan beliau sebagai Perdana Menteri Malaysia yang kelima.

Dalam beberapa minggu yang lepas, negara telah memperlihatkan keluhan perasaan rakyat melalui media dan laman web terhadap persaraan Tun Dr. Mahathir bin Mohamad yang berkhidmat sebagai Perdana Menteri yang terlama.

Dalam perkhidmatannya selama 22 tahun, Tun Dr. Mahathir bin Mohamad tentunya telah membawa banyak pencapaian dan kejayaan yang memberikan beliau banyak pujian dan penghormatan yang sepatutnya beliau terima.

Kepada pengkritiknya yang selalunya mempunyai keprihatinan atau peka terhadap pengorbanan unsur-unsur demokrasi dan kegagalan yang mengikut kejayaannya, harapan sekarang ditujukan terhadap penggantinya yang mempunyai cara kepimpinan yang alternatif dan berbeza.

Bagi kami sebagai ahli legislatif dan pemimpin politik yang bukan sahaja perlu melihat apa yang berlaku sekarang tetapi memahami apa yang perlu dibuat untuk masa hadapan. Kami perlu bertanya sama ada apa yang kami lihat dan miliki pada hari ini merupakan asas yang cukup kukuh dan ciri-ciri yang mencukupi untuk membawa negara ke tingkat yang lebih tinggi. Adakah beliau meninggalkan sebuah negara yang inovatif, kompetitif dan rakyat Malaysia yang bersatu padu dan lebih berkeyakinan dan percaya bahawa kami sedang menuju masa depan yang lebih cerah.

Oleh kerana usaha yang dibawa di dalam Dewan yang mulia ini ialah untuk mendapatkan kepercayaan dan keyakinan Dewan terhadap Perdana Menteri baru, saya tidak akan menyentuh dengan lebih panjang mengenai kejayaan dan kegagalan Tun Dr. Mahathir. Memadailah saya mengatakan bahawa kami perlu menghargai sumbangan positif dan kejayaannya tetapi pada masa yang sama, kami tidak boleh mengendahkan kesilapan dan kegagalannya. Saya ingin mengambil peluang ini untuk mengucapkan Selamat Bersara kepada beliau.

Pada 27 Januari 1976, semasa membahaskan usul kepercayaan terhadap Dato' Hussein Onn sebagai Perdana Menteri Malaysia yang ketiga di Dewan Rakyat, bekas Ahli Parlimen Kota Melaka, Lim Kit Siang telah menyatakan bahawa unsur kepercayaan tersebut adalah luar biasa dalam membahaskan kes beliau.

Bekas Ahli Parlimen Kota Melaka tersebut telah berkata, dengan izin, "*Clause 43 of the Constitution provides that Yang di-Pertuan Agong shall appoint as Prime Minister a Member of the Dewan Rakyat or in his judgement is likely to command the confidence of the majority of the Members of that House and who shall continue as Prime Minister until he seizes command the confidence of the majority in the Dewan Rakyat.*"

Lim Kit Siang menyatakan lebih lanjut bahawa, dengan izin, "*Dato' Hussein Onn was appointed Prime Minister following the death of Tun Razak and as the Head of the Barisan Nasional which controls a two third majority in the House, the quiescence of him not having confidence of the Dewan Rakyat does not arise.*"

Jadi, usul kepercayaan yang dibawa di dalam Dewan pada hari ini adalah sebenarnya tidak perlu, memandangkan persoalan bahawa Perdana Menteri yang kelima tidak mendapat kepercayaan dan keyakinan Dewan Rakyat tidak timbul kerana Barisan Nasional menguasai majoriti yang besar di dalam Dewan ini.

Ini juga menarik perhatian, memperlihatkan bahawa usul ini telah dicadangkan oleh Ahli Parlimen bagi Shah Alam di bawah Peraturan Mesyuarat 27(3) yang menerangkan seperti berikut, dengan izin, "*Except as provided in Standing Order 43 and in paragraph (5) oleh Standing Order 86, not less than fourteen days' notice of any motion shall be given unless it is in the name of a Minister, in which case seven days' notice or, if Tuan Yang di-Pertua is satisfied upon representation to him by a Minister that the public interest requires that a motion should be debated as soon as possible, one day's notice shall be sufficient.*"

Bukankah ia sesuatu yang luar biasa bahawa usul ini perlu dibawa ke dalam Parlimen dengan notis yang kurang daripada 14 hari dan di atas sebab bahawa seorang menteri telah memberikan representasi kepada Tuan Yang di-Pertua bahawa kepentingan awam memerlukan usul tersebut didebatkan secepat mungkin walaupun tarikh persaraan Tun Dr. Mahathir bin Mohamad telah ditentukan 16 bulan yang lalu.

Selain daripada persoalan siapa yang sepatutnya dilantik sebagai Timbalan Perdana Menteri yang baru, dua persoalan yang utama seterusnya yang rakyat Malaysia ingin mengetahui daripada Perdana Menteri yang baru ialah pertama, bilakah pilihan raya umum yang akan datang akan diadakan? Yang kedua, apakah perubahan yang bakal dilaksanakan oleh beliau selepas menjadi eksekutif tertinggi negara?

Tanpa keraguan, Dato' Seri Abdullah bin Haji Ahmad Badawi memiliki kelayakan dan kualiti untuk menjadi Perdana Menteri. Imej "*Mr. Clean*" dan "*Mr. Nice*" beliau telah memenangkan pujian dan sanjungan rakyat terhadap beliau. Namun, banyak cabaran dan tugas yang menanti beliau.

Pada hari ini, saya hanya akan menggariskan lima cabaran yang utama yang beliau mesti memberikan prioriti yang utama dan perhatian yang serius. Cabaran pertama, memastikan perpaduan nasional dan keamanan.

Tun Dr. Mahathir Mohamad semasa memperkenalkan Konsep Wawasan 2020 pernah mengatakan bahawa cabaran yang paling penting di antara sembilan cabaran yang perlu ditempuhi sebelum Malaysia boleh menjadi sebuah negara yang maju dalam erti kata yang sebenarnya ialah untuk mewujudkan sebuah negara Malaysia yang bersatu padu. Keamanan dan muhibah telah sentiasa wujud di negara yang bertuah ini, namun kita tidaklah jujur sekiranya kita tidak mengaku bahawa ia masih satu lagi perjalanan yang jauh sebelum kita boleh menyatakan bahawa Malaysia telah menjadi sebuah negara bersatu padu yang sebenarnya.

Kami masih jauh daripada membentuk suatu identiti bersama dalam identiti bangsa Malaysia. Perdana Menteri dalam melaksanakan dasar-dasar dan polisi-polisi kerajaan sama ada melibatkan politik, pendidikan, ekonomi, kebudayaan dan agama mestilah mengambil kira hakikat bahawa Malaysia adalah sebuah negara yang berbilang kaum, berbilang agama dan berbilang kebudayaan. Perdana Menteri perlulah sedar bahawa perpaduan nasional yang tulen dan wujud selama-lamanya hanya boleh dicapai melalui pembinaan konsensus antara kaum dan melaksanakan dasar-dasar yang adil dan saksama. Semasa kita menuju ke hadapan, kita mesti sentiasa menitikberatkan asas pembinaan negara, perpaduan dalam Perlembagaan atau *unity in diversity*.

Perdana Menteri bukan sahaja harus mendengar dan memahami tetapi beliau hendaklah menerima aspirasi dan harapan yang munasabah oleh semua kaum dan bukan membuat keputusan berdasarkan konsensus Barisan Nasional semata-mata. Beliau haruslah sentiasa menyedari bahawa beliau adalah Perdana Menteri negara kita dan bukannya Perdana Menteri Barisan Nasional ataupun Parti UMNO.

Cabaran yang kedua ialah memberi kepimpinan dan membawa dasar-dasar untuk menepati keperluan dan cabaran-cabaran semasa. Seseorang pemimpin tidak kira bagaimana kebolehan, dedikasinya atau keikhlasannya tidak boleh menjadi efektif dan berjaya sekiranya beliau tidak boleh berubah mengikut aliran masa. Dalam menghadapi era globalisasi yang menekankan meritokrasi dan daya saing, saya menyeru Perdana Menteri untuk memulakan dasar-dasar yang baru dan berani terutama sekali dasar-dasar pendidikan untuk memastikan rakyat Malaysia dapat bersaing dengan dunia luar.

Polisi pendidikan tidak harus memisahkan rakyat dan pendidikan berkualiti untuk sekolah rendah, sekolah menengah, pendidikan bahasa ibunda dan universiti hendaklah dijadikan agenda pendidikan utama. Banyak masalah yang berpanjangan yang dihadapi oleh sekolah rendah jenis kebangsaan seperti kekurangan sekolah dan guru terlatih serta peruntukan pembangunan yang tidak mencukupi hendaklah diselesaikan dengan segera.

Cabaran yang ketiga ialah dengan menunjukkan komitmen yang tulen terhadap konsep demokrasi dan sebelum saya mengakhiri ucapan saya, saya ucapkan tahniah dan syabas kepada Yang Amat Berhormat Perdana Menteri oleh kerana telah membuat satu ucapan yang merupakan satu permulaan yang baik pada pagi ini.

Malaysia telah membayar harga yang tinggi dari segi demokrasi pada masa yang lalu. Jadi ia adalah sangat penting dan perlu bahawa Perdana Menteri mesti mengambil langkah-langkah yang efektif dan wajar untuk mengembalikan keyakinan orang awam terhadap institusi demokrasi dan agensi-agensi penguat kuasa negara sama ada dalam kehakiman Suruhanjaya Pilihan Raya, polis, Badan Pencegah Rasuah dan sebagainya. Kerajaan hendaklah membuktikan komitmen penuh dan ikhlas terhadap demokrasi dengan menerima prinsip-prinsip demokrasi sejagat. Kerajaan perlu mengkaji semula dan memansuhkan semua undang-undang yang melanggar prinsip dan semangat demokrasi yang asas.

Demokrasi berparlimen mestilah diperkukuhkan dan doktrin bahawa Parlimen adalah teragung mestilah dihormati. Parlimen tidak boleh dijadikan sebagai cop getah atau *rubber stamp* untuk pihak eksekutif. Kerajaan mestilah beroperasi dalam suasana dan keadaan yang mementingkan *accountability*, ketelusan dan kedaulatan undang-undang. Nepotisme, *cronyism*, dan korupsi atau rasuah yang telah merugikan negara dengan terlalu banyak perlulah diperangi dengan habis-habisan.

Cabaran yang keempat ialah untuk memperkenalkan dan menyemai nilai-nilai asas dan memerangi penyakit-penyakit sosial yang serius. Perdana Menteri negara yang keempat memulakan pentadbirannya 22 tahun yang lalu dengan cogan kata "Amanah, Bersih dan Cekap". Hari ini cogan kata beliau telah lama dilupakan. Pada masa sekarang, orang yang terlibat dalam amalan rasuah adalah semakin muda dari segi umur. Kita juga melihat semakin ramai orang yang percaya bahawa sekiranya mereka tidak boleh menewaskan amalan rasuah, adalah lebih baik mereka juga terlibat dalam amalan tersebut. Nampaknya juga orang kini memikirkan setiap kontrak kerajaan sebagai Skim Cepat Kaya yang boleh atau mesti diperoleh melalui amalan rasuah atau mempunyai hubungan politik. Terdapat lebih banyak kes penipuan dan memperdayakan orang lain pada masa kini sama ada oleh individu mahupun sindiket. Mangsanya terdiri daripada orang awam dan juga tidak ketinggalan agensi-agensi kerajaan.

Oleh yang demikian, Perdana Menteri mestilah menyemai nilai-nilai asas kejujuran, integriti dan kebertanggungjawaban. Yang penting sekali, beliau mesti juga menghapuskan sumber atau sebab-sebab yang menghakis nilai-nilai asas ini. Terdapat laporan harian mengenai kejadian-kejadian jenayah seperti rompakan, pembunuhan, rogol dan keganasan. Perdana Menteri mesti memperkenalkan dasar-dasar yang berkesan yang boleh memberikan rakyat Malaysia perasaan yang selamat bukan sahaja di rumah mereka tetapi juga di perhentian-perhentian bas atau di tempat-tempat letak kereta atau di atas jalan. Jenayah dan kekerasan mestilah dicegah dengan efektif dan segera. Kerajaan mestilah memberikan perhatian dan berusaha untuk membebaskan sekolah-sekolah daripada gengsterisme dan ketidakdisiplinan supaya ibu bapa tidak perlu bimbang untuk menghantar anak-anak mereka di mana-mana sekolah.

Cabaran yang kelima untuk Perdana Menteri ialah untuk menghormati, memperkukuh dan memelihara asas sekular Perlembagaan Islam selama 46 tahun dalam Perlembagaan Persatuan. Sebuah negara Islam di Malaysia tidak mengira apa modulnya melanggar kontrak sosial yang dipersetujui oleh semua komuniti utama di negara kita semasa mencapai kemerdekaan pada tahun 1957 dan Perjanjian Malaysia pada tahun 1963. Oleh yang demikian, Perdana Menteri mestilah berpegang teguh terhadap sumbangan terbesar Perdana Menteri yang pertama, Tunku Abdul Rahman iaitu prinsip asas Perlembagaan Merdeka 1957 bahawa Malaysia ialah sebuah negara yang demokratik, sekular, berbilang kaum dan toleran dengan Islam sebagai agama rasmi tetapi Malaysia bukan sebuah negara Islam.

Dua hari yang lepas, Tuan Yang di-Pertua, Perdana Menteri Malaysia menyeru agar rakyat Malaysia bekerja bukan untuk beliau tetapi bekerjasama dengan beliau untuk negara kita. Saya ingin mengambil kesempatan ini pada hari ini untuk menyatakan di sini bahawa DAP bersedia bekerjasama dengan beliau untuk menangani cabaran-cabaran yang saya nyatakan tadi kerana kami dipilih menjadi wakil rakyat untuk menjadikan Malaysia sebuah negara yang lebih baik dan lebih saksama untuk semua rakyat.

Beliau boleh diberi jaminan akan mendapat sokongan penuh kami dalam perubahan politik dan dasar yang bertujuan untuk memperkukuhkan sistem demokrasi, menjadikan rakyat lebih bersatu padu dan menjadikan negara kita lebih makmur, adil dan saksama.

Tuan Yang di-Pertua, saya akan mengakhiri dengan satu mesej peribadi. Saya tertarik dan kagum dengan sajak yang dihasilkan oleh Yang Amat Berhormat Perdana Menteri yang bertajuk, *A Peace Within*. Sajak ini menunjukkan dan membayangkan pemikiran, prinsip dan falsafah peribadi beliau. Terdapat kata-kata bijaksana yang berbunyi dengan izin: *"Nearly all men can withstand tests of adversities. To test a person's real character, give him power"*. Dengan izin, *"Power corrupts, absolute power corrupts, but many people have passed the test of power just because they can act according to the right principles and live through to their conscience"*.

Saya telah berkata tadi bahawa pada pagi ini Yang Amat Berhormat Perdana Menteri telah membuat ucapan yang baik yang saya tahu ia juga telah mendapat sambutan baik daripada pemberita dan saya akan mengakhiri dengan mengatakan, dengan izin, *may God grant you the political strength to act according to your principles and live up to your true conscience.. [Tepuk]*

**Tuan Pengerusi [Datuk Lim Si Cheng]:** Gua Musang.

**3.30 ptg.**

**Tengku Tan Sri Razaleigh Hamzah [Gua Musang]:** Tuan Yang di-Pertua, saya bangun untuk bersama-sama mengambil bahagian dalam menimbang dan menyokong usul undi percaya terhadap Perdana Menteri kita yang kelima. Saya terlebih dahulu suka mengambil kesempatan ini untuk menyampaikan ucapan setinggi-tinggi tahniah kepada Ahli Parlimen bagi Kepala Batas atas pelantikan beliau sebagai Perdana Menteri kita dan meletakkan sepenuh harapan kepada kepimpinannya, semoga kita menjadi lebih berjaya di masa hadapan, insya-Allah.

Saya berdoa mudah-mudahan beliau dan pentadbiran barunya diberi petunjuk untuk mengatasi apa jua masalah dalam membina negara yang lebih maju, makmur dan diredai Allah S.W.T. Saya percaya negara kita akan terus menjadi tempat terbaik untuk kita diami. Apa yang kita nikmati dan banggakan hari ini ialah kerana adanya asas kukuh yang ditinggalkan oleh mereka sebelum kita. Kita tidak menjadi komunis kerana kejayaan orang terdahulu menolak ideologi itu dengan apa jua cara sekalipun, kita berjaya mengatasi konfrontasi dengan jiran dan mengukuhkan konsep negara Malaysia di atas persepakanan kita dengan saudara kita dari Malaysia Timur.

Kita terima kepahitan perpisahan dengan Singapura atas keyakinan majoriti kita bahawa itulah cara yang terbaik untuk keutuhan orang Melayu dan kestabilan negara kita. Kita mampu menangani gelombang krisis kewangan tahun 1997 tanpa pertumpahan darah

seperti di negara jiran kita, kerana adanya Dasar Ekonomi Baru yang berjaya menenggelamkan api kecemburuan kaum di kalangan kita.

Semua asas tadi dibina menerusi kesungguhan politik pemimpin-pemimpin terdahulu. Ia dapat dilaksanakan melalui dan kesediaan beberapa pihak yang sanggup menyetepikan kepentingan mereka demi kepentingan negara kita yang tercinta.

Dengan ikhlas saya turut menaruh harapan agar perpaduan dan kesatuan sepatutnya menjadi agenda utama pentadbiran baru kita. Perpaduan dan kesatuan ini mesti menjangkau perpaduan puak tertentu, perpaduan parti politik tertentu atau perpaduan kaum tertentu... [Tepuk] Perpaduan hakiki mesti merangkumi seluruh rakyat negara ini atas nama bangsa Malaysia yang bersatu padu. Ia mungkin dilihat mustahil tetapi kalau kita ikhlas dan ada kesungguhan politik, kita boleh melakukannya. Dahulu kita pernah melakukannya, saya yakin kita boleh melakukannya sekali lagi.

Sebelum ini kita telah bekerja keras untuk menyediakan yang terbaik untuk rakyat kita. Kita berusaha menghapuskan kemiskinan, buta huruf dan kejahilan masyarakat. Kita membina infrastruktur negara, masjid, madrasah, sekolah, universiti, hospital, klinik, jalan raya, bekalan elektrik dan air bersih seberapa yang terbaik untuk rakyat kita. Kita telah cuba menghapuskan jurang perbezaan di kalangan kita. Sebahagian besar persoalan ini sudah digariskan dalam Laporan Kajian Separuh Penggal Rancangan Malaysia Kelapan yang baru dibentangkan di Dewan yang mulia ini. Setinggi-tinggi penghargaan mesti diberikan terutamanya kepada semua kakitangan kerajaan, tentera, polis, guru, doktor dan pekerja kesihatan yang terlibat dalam membina negara dan memelihara kesejahteraan kita semua.

Sebagai negara yang membangun, kita pula sentiasa berada di persimpangan untuk memilih keutamaan dalam memenuhi kehendak kita yang tidak terbatas, sedangkan sumber yang kita miliki sangat terbatas. Setiap pilihan yang kita buat ada kosnya, yang paling ditakuti ialah kos kemarahan rakyat sekiranya mereka rasa terpinggir. Kemarahan ini boleh memecahbelahkan kita. Tahun 1990 kita gagal mencapai matlamat Dasar Ekonomi Baru untuk membolehkan bumiputera memiliki 30% ekuiti saham di negara kita. Kini 13 tahun sudah berlalu, tahap pencapaian tahun 1990 masih tidak berubah. Kini kita menyebut tahun 2010 pula sebagai tarikh baru untuk mencapai sasaran tersebut.

Ini bermakna kita hanya ada 7 tahun untuk menebus kegagalan 13 tahun ini. Saya berharap di bawah pentadbiran baru, Dasar Ekonomi Baru perlu diberi penegasan semula dan tidak ada tarikh baru lagi selepas tahun 2010. Mari kita angkat darjat semua mereka yang ketinggalan tanpa mengira kaum...[Tepuk] Saya percaya sekiranya berjaya, kaum bumiputera turut beruntung kerana mereka lah yang paling banyak ketinggalan. Oleh itu saya percaya isu subsidi, biasiswa, tongkat dan apa jua bantuan dan galakan yang menjadikan Dasar Ekonomi Baru begitu berjaya di peringkat awal pelaksanaannya dahulu mesti diperhebat kembali sebelum peraturan WTO dikuatkuasakan.

Masa tidak menyebelahi kita tetapi tanpa berbuat demikian, kita akan melihat jurang perbezaan di kalangan kita bertambah besar. Jurang ini akan bertambah parah apabila desakan zaman sains, teknologi maklumat dan k-ekonomi memerlukan pelaburan besar setiap keluarga untuk mengejar mereka yang lebih berkemampuan. Kalau tidak, yang miskin akan terus corot kebelakangan. Kalau yang corot itu Melayu maka bahana kecemburuan kaum tidak mustahil akan berulang kembali.

Kemajuan sains dan teknologi maklumat negara-negara maju pula bukan sahaja menguasai kita dari segi ekonomi dan perdagangan tetapi turut diterjemahkan melalui kehendak mereka menguasai geopolitik dunia. Di sini kekayaan dan kekuatan ekonomi tidak boleh dipisahkan dengan isu keselamatan dan diplomatik. Lebih-lebih lagi kita pula sering dilihat, gemar mengherdik harimau buas. Saya percaya kita sudah ada rancangan tersendiri untuk mengendalikan taring dan kuku harimau yang kita herdik itu. Mungkin kita boleh bertindak seperti nyamuk yang mengganggu gajah kerana gajah sukar memijak nyamuk. Namun saya percaya di bawah pentadbiran baru, kita tidak mahu menjadi nyamuk selama-lamanya. Kita mahu menjadi besar dan mampu bersaing dengan sesiapa sahaja.

Cabaran AFTA dan WTO berada di depan kita. Akibat sebenarnya belum kita ketahui tetapi secara kasar kita sudah boleh membuat perkiraan sendiri. Apakah barangan

kita cukup berdaya saing? Apakah ia mempunyai pasaran yang istimewa dengan izin, *market niche*? Apakah teknologi pertanian kita cukup untuk menghasilkan makanan kita sendiri yang lebih murah daripada yang dihasilkan oleh orang lain. Apakah tanpa subsidi dan bantuan, pak tani dan nelayan kita selamat dan bersedia mengharungi kehidupannya sendiri?

Apakah budaya dan cara hidup kita tercabar di bawah dasar langit terbuka? Apakah sikap orang kita masih di takuk lama atau cukup terlatih dalam menghadapi cabaran global ini? Apakah sistem pendidikan kita mampu menghambat kepantasan sistem pendidikan negara-negara maju tanpa meminggirkan sebahagian orang kita sendiri? Apakah anak muda kita sudah diberi tempat dan pendedahan yang wajar untuk bersaing dengan orang lain dari negara-negara lain? Apakah tenaga kerja kita berkemampuan menangani corak aliran tenaga kerja tanpa sempadan? Sebagai negara yang menerajui kepimpinan pergerakan negara-negara berkecuali dan negara-negara Islam pula, apakah kita bebas dari tindak balas dan ancaman geopolitik kuasa-kuasa besar?

Saya yakin cabaran global lebih mudah diatasi sekiranya kita ada kekuatan domestik. Di kalangan kita mungkin ramai yang berbeza pendapat tetapi sekiranya perbezaan ini diuruskan dengan baik, perbezaan boleh membawa rahmat.... [*Beberapa Ahli bertepuk*] Lagipun asas negara kita dibina ialah untuk menguruskan perbezaan ini kerana sememangnya negara kita mengandungi pelbagai komponen yang sangat berbeza. Semua ini diuruskan melalui kontrak sosial yang menjadi asas Perlembagaan kita. Setiap komponen ini dijamin hak masing-masing. Sebarang usaha mengganggu hak yang dijamin akan merosakkan keseimbangan yang menjadi tunggak kestabilan kita hari ini.

Sebarang pertelingkahan sepatutnya diuruskan melalui sistem demokrasi yang kita miliki hari ini. Kita ada sistem perseimbangan kuasa yang lebih unik daripada negara lain. Kita ada Raja Berperlembagaan yang menjadi payung untuk semua. Kita ada sistem kehakiman yang sepatutnya bebas dari campur tangan politik... [*Tepuk*] Dan mampu melahirkan hakim-hakim yang berwibawa agar keadilan sebenar terjamin untuk semua rakyat.

Kita ada Dewan yang mulia ini untuk menggubal undang-undang. Kita ada sistem pentadbiran yang amat kompleks dan mengandungi prosedur yang ketat. Ia bukan sekadar untuk melaksanakan dasar yang kita putuskan di sini tetapi juga untuk memastikan setiap sen wang rakyat dipertanggungjawabkan.... [*Tepuk*] Bahkan apabila kita ada prosedur tender terbuka bagi projek-projek kerajaan, ia bertujuan untuk memastikan projek itu dilaksanakan secara kos-efektif dan telus di kaca mata rakyat. Semuanya ini sudah menjadi asas sistem berkerajaan kita sejak merdeka dahulu lagi. Inilah yang perlu kita pelihara dan baik pulih sekiranya ia rosak.

Kita tidak perlu buat Perlembagaan baru atau sistem pentadbiran baru seperti di negara jiran setelah rasuah dan penyalahgunaan kuasa menghancurkan ekonomi mereka beberapa tahun dahulu. Lagipun hari ini mereka sudah menyedari bahawa Perlembagaan dan peraturan sahaja tidak berguna sekiranya ia tidak dapat menukar niat dan tabiat buruk orang yang berkuasa, terutamanya mereka yang mengejar kuasa untuk mencari kekayaan peribadi.... [*Tepuk*]

Sebab itulah saya berharap sebarang persepsi bahawa di Malaysia masih banyak amalan rasuah dan penyalahgunaan kuasa akan dilenyapkan oleh pentadbiran baru ini. Kuatkuasakanlah segala peraturan dan undang-undang yang sedia ada. Saya percaya rakyat turut berharap pentadbiran baru ini akan merupakan satu pasukan yang terdiri dari mereka yang berupaya tinggi dan bersih dari sebarang persepsi negatif.

Saya yakin kewibawaan kerajaan amat penting dalam usaha meyakinkan dan menyatukan semua pihak ketika menghadapi cabaran global yang lebih besar kelak. Kerajaan yang diredai Allah ialah kerajaan yang melaksanakan amanah dan tanggungjawabnya. Amanah ini diberikan Allah melalui rakyat, usul di Dewan yang mulia ini adalah simbol bahawa kuasa di negara kita hanya sah sekiranya disahkan oleh majoriti mereka yang dipilih oleh majoriti rakyat di negara ini. Ini juga bermakna pemimpin adalah milik rakyat, bukan milik keluarga atau sahabat-handai tertentu...

**Beberapa Ahli:** Ya!!!

**Tengku Tan Sri Razaleigh bin Hamzah:** ...maka kepada semua rakyatlah kita mesti bertanggungjawab melaksanakan amanah. Gunakan kesempatan ini untuk mengukuhkan sistem berkerajaan yang baik, yang tidak hanya berpusat kepada mana-mana individu yang berkuasa. Pemimpin boleh datang dan pergi, sistem yang baik akan terus diwarisi zaman berzaman.

Dewan yang mulia ini sering menjadi arena untuk kita berdebat, namun kehidupan sebenar bukan sekadar untuk menang debat. Kehidupan ialah bagaimana kita bekerjasama membina kehidupan terbaik bagi semua orang... *[Tepuk]*

Semoga pada detik bersejarah ini semua pihak termasuk penyokong kerajaan dan pembangkang dapat berlapang dada dan fikiran untuk mencari jalan yang terbaik, bagi kehidupan terbaik rakyat negara yang tercinta ini. Mari kita sama-sama berdoa semoga Allah mengukuhkan iman kita, persaudaraan kita dan menjauhi bangsa kita daripada kemungkaran politik dan ekonomi, mudah-mudahan kita sentiasa beroleh kemenangan. Saya mohon menyokong.

**Timbalan Yang di-Pertua [Datuk Lim Si Cheng]:** Yan.

**3.47 ptg.**

**Tuan Nasharudin bin Mat Isa [Yan]:** Terima kasih Tuan Yang di-Pertua. Saya bangun mewakili Parti PAS dan rakan-rakan pembangkang yang lain. Pertamanya mengalu-alukan dan merakamkan ucapan tahniah di atas pelantikan Yang Amat Berhormat Dato' Seri Abdullah bin Haji Ahmad Badawi, sebagai Perdana Menteri Malaysia yang kelima dan juga menyokong ucapan Yang Berhormat Gua Musang.

Menyadari dan mewakili harapan rakyat adalah diharapkan agar pelantikan ini akan dapat melakukan perubahan kepada beberapa isu besar yang melanda negara sepanjang 22 tahun yang lepas. Selama 22 tahun Tun Dr. Mahathir telah memerintah negara yang tercinta ini sebagai Perdana Menteri yang keempat. Semenjak 1981 sehingga tanggal 31 Oktober 2003, negara telah melalui beberapa proses perubahan yang menguntungkan rakyat dan negara. Namun dengan kemajuan infrastruktur peningkatan golongan korporat dan jutawan termasuk di kalangan bumiputera yang kita nikmati tidak kurang juga beberapa keaiban yang tercatat dalam liputan sejarah negara.

Peristiwa Mamali yang mengorbankan nyawa isu kronisma yang menular, persempadanan semula kawasan pilihan raya, penghakiman terhadap mantan Timbalan Perdana Menteri dan deretan isu besar yang masih belum terjawab. Justeru itu bebanan yang bakal dipikul oleh Yang Amat Berhormat Dato Seri Abdullah bin Haji Ahmad Badawi adalah amat berat dan memerlukan kebijaksanaan dan lebih dari itu, petunjuk dari Allah S.W.T. selaku seorang Muslim.

Kita ingin mengingatkan semua Ahli Dewan yang mulia pada hari ini khususnya bahawa seiring dengan sokongan rakyat terhadap lantikan Yang Amat Berhormat Perdana Menteri terkandung juga harapan dan tuntutan rakyat agar Perdana Menteri kelima kali ini benar-benar menjadi Perdana Menteri rakyat Malaysia dan bukan sahaja Ketua Kerajaan dan Ketua UMNO.

Sejarah mengajar kita untuk menyingkap kesilapan lampau dan mengubah diri ke arah masa depan yang lebih terjamin. Yang Amat Berhormat Perdana Menteri yang dipilih melalui undian rakyat dalam pilihan raya umum sebenarnya memikul beban amanah yang amat berat dan sentiasa diperhatikan oleh semua manusia, malaikat, jin, alam seterusnya dan pastinya pencipta diri manusia itu sendiri yakni Allah S.W.T.

Oleh sebab dalam Islam kepimpinan itu adalah satu amanah dan ukhuwah, saya berpesan kepada diri saya, kepada Yang Amat Berhormat Perdana Menteri yang baru dan pada seluruh mereka yang berada di dalam Dewan ini dengan hadis Nabi S.A.W ada yang menyebut.... *[Membacakan sepotong Hadis berbahasa Arab]* Sudah tentunya Yang Amat Berhormat Perdana Menteri tahu terjemahannya dalam bahasa Malaysia.

Harapan daripada rakyat bolehlah dirangkumkan kepada beberapa isu yang ingin saya sebutkan di sini lingkaran sejarahnya ataupun lakaran sejarahnya. Pertama, harapan yang kita wakilkan kepada wakil-wakil rakyat di sini khasnya kami di sebelah sini.

Yang pertama, pemulihan amalan demokrasi. Penghakisan amalan demokrasi telah berlaku dengan ketara sejak dua dasawarsa yang lalu. Musuh politik kepada parti pemerintah telah mengalami tekanan yang hebat. Ramai pemimpin parti politik meringkuk dalam tahanan dan sejarah Malaysia moden juga telah menyaksikan Timbalan Perdana Menteri turut dipecat dan disumbat ke dalam penjara. Undang-undang *draconian* ISA dijadikan senjata kerajaan untuk menghalalkan kezaliman dan pencabulan demokrasi.

Kebebasan bersuara mengikut Perlembagaan Negara telah disempitkan melalui pelbagai akta dan ruang kebebasan hanya wujud di dalam lingkungan untuk mempertahankan dan memperkuatkan parti pemerintah sahaja. Media cetak dan elektronik dikawal sepenuhnya oleh kerajaan, berita-berita dari rakyat yang tidak sehaluan dengan pemerintah disekat dan tidak disiarkan, malah parti-parti politik yang mempunyai kebenaran menyebarkan berita kepada ahli-ahli juga melalui tapisan peraturan dan undang-undang yang ketat.

Bagi negara yang diperintah oleh parti yang tidak sama dengan Kerajaan Pusat, kerajaan ini tidak menikmati layanan yang sama dalam menggunakan media elektronik untuk menyalurkan berita kepada rakyat dan penubuhan stesen radio sendiri ditolak. Kerajaan sentiasa menafikan peranan pembangkang di dalam sistem demokrasi di negara kita, walaupun kerajaan sedar kepentingan pembangkang seperti mana yang telah disebut oleh bekas Perdana Menteri beberapa hari sebelum beliau bersara, terus menyerang parti-parti pembangkang, kononnya pembangkang tidak dapat berfungsi dan hanya melemparkan fitnah semata-mata.

Sistem kehakiman negara masih terikat kepada telunjuk kerajaan dan terdapat banyak contoh institusi ini dikawal dan hakim serta pegawai-pegawai kanan terikat dan tidak dapat melaksanakan tugas secara profesional dalam kes-kes yang kerajaan berkepentingan. Perlembagaan Negara membenarkan rakyat terlibat dalam proses menubuhkan kerajaan dan mengiktiraf parti-parti yang menang untuk menubuhkan kerajaan dan kerajaan negeri yang ada sebenarnya menjadi sebahagian daripada Persekutuan Malaysia.

Malangnya, bagi negeri-negeri yang diperintah oleh kerajaan yang tidak sehaluan politik dan Kerajaan Pusat dan rakyat telah memilih bentuk pemerintahan yang dibenarkan oleh Perlembagaan Persekutuan terpaksa menerima hakikat mereka disisihkan dari segi ekonomi, sosial dan mendapat layanan kelas tiga dari Kerajaan Pusat. Bukan setakat itu sahaja, malah pemimpin Kerajaan Pusat sentiasa mengganggu perjalanan kerajaan negeri dengan menubuhkan beberapa institusi pentadbiran, dengan alasan mahu turut melaksanakan pembangunan, sedangkan peruntukan yang disediakan boleh disalurkan terus kepada kerajaan yang sah pilihan rakyat dan dana ini dibelanjakan mengikut sistem arahan bersepadu dari garis panduan dan pemantauan Kerajaan Pusat dan lebih-lebih lagi dasar-dasar lain terus berkuat kuasa termasuk cukai terus dipungut oleh Kerajaan Pusat.

Tepat sekali dasar diskriminasi ini jelas mencabuli Perlembagaan Persekutuan, dan Kerajaan Pusat sanggup meminda peraturan sebaik sahaja kerajaan yang dipilih rakyat tidak sehaluan dengan Pusat. Impak yang nyata ialah apabila bayaran royalti kepada Kerajaan Terengganu ditamatkan malah lebih malang lagi wang tersebut diagihkan melalui jentera Kerajaan Pusat semata-mata untuk kepentingan parti Kerajaan Pusat sahaja. Pencabulan hak asasi terus dilakukan di zaman mantan Perdana Menteri Keempat dan berita-berita mengenai layanan pasukan keselamatan terhadap tertuduh mencapai tahap kebimbangan dan ramai tahanan mati dalam lokap polis dan rakyat yang terbunuh semasa operasi polis masih menjadi misteri.

Yang keduanya, suara rakyat adalah yang berkaitan dengan budaya rasuah dan masalah sosial. Imej negara turut terjejas teruk di peringkat antarabangsa dengan amalan rasuah yang turut melibatkan Menteri-menteri Kabinet, namun tidak ada pendakwaan terhadap mereka yang kebal dan mendapat pengampunan percuma dari mantan Perdana Menteri. Budaya ini telah meresapi hingga ke dalam masyarakat dan menjadi darah daging kepada pengamal-pengamal dan penguat kuasa undang-undang. Hanya segelintir sahaja yang didakwa, yang lain terus bebas, sebahagiannya pula mendapat naungan daripada pemerintah sendiri dan BPR tidak dapat menjejak mereka.

Kes PERWAJA, agihan saham, aduan rasuah, salah guna seks bekas Ketua Menteri, kes bekas Gabenor Bank Negara, banyak lagi kes masih dibiarkan tidak didakwa. Gejala sosial yang berlaku dalam masyarakat amat membimbangkan dewasa ini. Bermula masalah dadah, seks bebas di kalangan belia, sumbang muhrim, penghakisan nilai moral, budaya samseng di kalangan penuntut sekolah dan institusi pengajian tinggi dan peningkatan kes jenayah.

Yang ketiga, sensitiviti terhadap pendidikan Islam telah menimbulkan bantahan luar terhadap pemerintah, mantan Perdana Menteri telah melakukan kesalahan yang tidak dapat dimaafkan apabila menggunakan media perdana terus menyerang Sekolah Agama Rakyat, sambil menghina dan memperlekehkan setelah mengumumkan pemberhentian bantuan per kapita terhadap sekolah-sekolah ini.

Menginsafi kepincangan penghakisan dan pencabulan demokrasi, amalan rasuah dan penghinaan sistem pendidikan Islam, maka saya mengambil kesempatan ini untuk mendesak Yang Amat Berhormat Perdana Menteri yang baru melakukan:

- (i) memulihkan amalan demokrasi yang telah dicabul semasa pemerintahan 22 tahun mantan Perdana Menteri yang lalu;
- (ii) menghapuskan ISA dan membebaskan semua tahanan ISA dan membicarakan mereka di mahkamah terbuka;
- (iii) membicarakan semula mantan Timbalan Perdana Menteri, Dato' Seri Anwar Ibrahim; .... [*Tepuk*]
- (iv) membenarkan parti-parti politik diberi lesen untuk mempunyai akhbar sendiri dan mempunyai lesen untuk menjalankan operasi TV dan radio; .... [*Tepuk*]
- (v) kerajaan mesti munasabah supaya menyedari kepentingan pembangkang dan tidak lagi menindas, menzalimi serta memfitnah parti-parti pembangkang; .... [*Tepuk*]
- (vi) mengadakan reformasi dalam sistem kehakiman supaya telus dan institusi ini diberikan kebebasan untuk tidak ada campur tangan kerajaan;
- (vii) mengiktiraf kerajaan yang dipilih oleh rakyat yang dipilih oleh rakyat dan memastikan mereka mendapat layanan yang sama di sisi Perlembagaan dan kerajaan ini semestinya diberi peruntukan pembangunan sama dengan negeri-negeri yang lain. Dalam kes ini, kaji semula terhadap isu royalti minyak di Terengganu hendaklah dilakukan secepat mungkin;
- (viii) membicarakan di mahkamah pegawai-pegawai keselamatan yang menyalahgunakan kuasa dalam kes orang awam terbunuh dalam tahanan polis dan mati ditembak dalam operasi polis;
- (ix) membuka kes-kes yang melibatkan rasuah di kalangan ahli-ahli politik dan pegawai-pegawai kanan kerajaan;
- (x) mengambil langkah yang berkesan bagi menangani gejala sosial; dan yang terakhir
- (xi) memberi perhatian segera terhadap pendidikan Islam terutama sekolah agama rakyat dan menyediakan peruntukan yang mencukupi serta memberi autonomi kepada mereka dalam menentukan sistem yang dilaksanakan mengikut kehendak kurikulum Pendidikan Islam.

Akhirnya, Tuan Yang di-Pertua, tidak ada seruan yang lebih mulia yang PAS sampaikan dengan penuh kesedaran kepada Perdana Menteri Kelima, Yang Amat Berhormat Dato' Seri Abdullah bin Haji Ahmad Badawi, selain daripada kembali kepada

Islam setelusnya. Islamlah yang akan menyelamatkan kita semua. Masalahnya ialah tafsiran istilah Islam itu yang disempitkan oleh pemimpin yang lampau, walaupun pemimpin keempat pernah menyebut slogan "*Kembali Kepada Islam*", semasa berceramah di Oxford, malangnya konsep ad-din yang dilafazkan itu tidak difahami sepenuhnya, apabila pemimpin Kerajaan Islam dunia dapat melihat dengan mata kepala mereka sendiri semasa persidangan OIC di ibu kota, bagaimana Islam diamalkan di Malaysia.

PAS menerusi Ahli Dewan Rakyatnya dan juga Ahli Dewan Undangannya di negeri-negeri, akan sentiasa menjunjung amanah yang dipikul tanpa takut kepada kuasa manusia sementara. Rakyat tidak mungkin akan ditipu selama-lamanya, oleh itu, sokongan rakyat kepada Perdana Menteri yang kelima juga disertai syarat dan penuh harapan agar tuntutan rakyat dipenuhi.

Keadilan diwujudkan dalam erti kata yang sebenarnya, hak rakyat dikembalikan, undang-undang yang zalim dihapuskan, kekayaan negara sama diagihkan, mereka yang bersalah dan *corrupt* mesti diadili secukupnya dan pemerintahan dilaksanakan tanpa takut celaan manusia yang suka mencela.

Dengan itu kami meletakkan harapan dan berdoa agar Yang Amat Berhormat Perdana Menteri Kelima ini jauh lebih berjaya daripada empat Perdana Menteri yang lalu, insya-Allah.

**Beberapa Ahli:** [*Bangun*]

**Timbalan Yang di-Pertua [Datuk Lim Si Cheng]:** Ahli-ahli Yang Berhormat, saya fahamlah memang ada ramai lagi ingin berucap. Akan tetapi, oleh sebab kita memang mengharapkan supaya Usul ini dapat diselesaikan sebelum pukul 4.30 petang, maka saya hanya dapat memberikan dua atau lebih-lebih tiga Ahli Yang Berhormat untuk berucap. Dengan ini saya beri peluang kepada Teluk Intan.

**4.01 ptg.**

**Tuan Mah Siew Keong [Teluk Intan]:** Tuan Yang di-Pertua, terima kasih kerana memberi peluang kepada saya mengambil bahagian.

Bagi pihak parti Gerakan, saya mengucapkan setinggi-tinggi tahniah kepada Yang Berhormat Dato' Seri Abdullah Haji Ahmad Badawi atas pelantikan Yang Amat Berhormat sebagai Perdana Menteri yang kelima.

Parti Gerakan mempunyai keyakinan penuh dan akan terus memberi sokongan padu kepada Yang Amat Berhormat sebagai Perdana Menteri untuk memperkukuhkan lagi kemakmuran ekonomi negara, memperkukuhkan perpaduan kaum dan memperkukuhkan keamanan negara serta membawa kesejahteraan hidup rakyat jelata berbilang kaum dalam arus pembangunan global yang mencabar ini.

Tuan Yang di-Pertua, sistem perkongsian kuasa Barisan Nasional. Negara Malaysia memerlukan keamanan dan kestabilan dan ini tidak mungkin dicapai melainkan rakyat berbilang kaum dapat mengadakan hubungan yang baik di antara satu sama lain. Dalam hubungan ini, Yang Amat Berhormat Ahli Parlimen Kepala Batas telah mengatakan bahawa perpaduan kaum dan kerjasama yang terus wujud di kalangan masyarakat negara ini adalah begitu penting sekali.

Rakyat berbilang kaum bersyukur pembangunan dan keamanan hasil daripada kebijaksanaan formula perkongsian kuasa antara parti komponen Barisan Nasional. Oleh itu, formula ini perlu diteruskan bagi mengekalkan kestabilan politik, ekonomi dan sosial untuk dinikmati oleh generasi akan datang.

Saya yakin Yang Amat Berhormat Ahli Parlimen Kepala Batas akan meneruskan dasar serta formula sedia ada walaupun menggunakan gaya tersendiri. Dengan cara ini rakyat akan terus memberi sokongan padu kepada Barisan Nasional. Pembangunan negara menyebabkan kek ekonomi hari ini membesar dan keadaan ini memberi peluang kepada semua kaum menikmati kemakmuran negara. *All races should be given a chance to share this bigger economic cake fairly and harmoniously*, dengan izin.

Saya harap juga formula perkongsian kuasa ini disemai di kalangan generasi muda termasuk kanak-kanak bagi memastikan ia diteruskan pada masa depan. Kita perlu berani supaya ia dibincangkan oleh murid-murid dan pelajar di universiti mahupun di sekolah rendah dan menengah. Di sini syabas kepada Kementerian Perpaduan Negara dan Pembangunan Masyarakat yang telah melancarkan kempen "Saya Anak Malaysia" di sekolah-sekolah. Saya hanya ada satu cadangan. Slogan, "*Saya Anak Malaysia*" berbunyi sedikit individualistik dan saya cadangkan supaya perkataan "Saya" ditukar kepada "Kita". *Kita Anak Malaysia* lebih ada *ummmph!* dan lebih menunjukkan hasrat kita untuk membentuk bangsa Malaysia...

**Beberapa Ahli:** Boleh, sokong, bersetuju terus.

**Tuan Mah Siew Keong:** Kami juga. Tuan Yang di-Pertua, usaha membina satu bangsa Malaysia tidak boleh dilakukan oleh Yang Amat Berhormat Perdana Menteri sahaja. Ia memerlukan kerjasama semua kaum. Yang Amat Berhormat selalu menegaskan bahawa rakyat memandang jauh ke depan untuk memastikan bukan sahaja pembangunan negara berterusan, malahan hubungan antara kaum terus dipererat.

Walaupun wujudnya perbezaan budaya, agama dan keturunan, matlamat rakyat negara ini sebenarnya adalah sama iaitu mahu mengekalkan hidup bersatu padu dan menerima negara ini sebagai tanah kelahiran kita. Oleh itu, sistem perkongsian kuasa Barisan Nasional dapat menjamin rancangan pembangunan yang menyeluruh kepada yang tua, yang muda, yang miskin, kepada yang beragama Islam, yang beragama Kristian, Buddhist, Hindu dan semua.

Seperti yang ditekankan oleh Yang Amat Berhormat Perdana Menteri pagi tadi, saya dengan ikhlas hati juga merayu kepada semua pihak supaya jangan pergunakan isu-isu sensitif yang dapat memecahbelahkan rakyat. Tuan Yang di-Pertua, dengan izin, *good things take years to build and even harder to maintain, let us not have present disagreements between politicians threaten the future of our children.*

Tuan Yang di-Pertua, satu bangsa Malaysia adalah wawasan Tun Dr. Mahathir, wawasan Dato' Seri Abdullah Haji Ahmad Badawi dan wawasan semua rakyat yang mencintai negara ini. Saya mengakhiri dengan menyeru rakyat jelata berbilang kaum tanpa mengira ideologi politik bersama-sama memberi sokongan dan mandat sepenuh kepada Yang Amat Berhormat Dato' Seri Abdullah Haji Ahmad Badawi, Perdana Menteri Malaysia yang kelima supaya negara terus aman dan makmur dan satu bangsa Malaysia akan menjadi realiti.

Tuan Yang di-Pertua, saya turut menyokong.

**Timbalan Yang di-Pertua [Datuk Lim Si Cheng]:** Batang Lupar.

**4.06 ptg.**

**Datuk Haji Wan Junaidi bin Tuanku Jaafar [Batang Lupar]:** Tuan Yang di-Pertua, terima kasih. Tuan Yang di-Pertua, izinkan saya berucap untuk menyokong Usul yang telah dibentangkan oleh Yang Berhormat Ahli Parlimen Shah Alam, Ketua Kelab Penyokong Kerajaan atas pelantikan Yang Amat Berhormat Dato' Seri Abdullah Haji Ahmad Badawi sebagai Perdana Menteri Malaysia yang kelima.

Kepada Yang Amat Berhormat Dato' Seri, saya bagi pihak saya sendiri dan masyarakat Malaysia di Sarawak, ingin mengucapkan tahniah dan syabas tidak terhingga, semoga Allah memelihara Yang Amat Berhormat Dato' Seri dan sekeluarga supaya Yang Amat Berhormat Dato' Seri terhindar dari fitnah dan keceleaan dunia dan akhirat dan memberi petunjuk kepada Dato' Seri dalam menjalankan tugas yang suci dan murni ini.

Tuan Yang di-Pertua, Malaysia dahulunya tidak dikenali sekarang telah menjadi dikenali masyarakat antara bangsa, Malaysia telah berada di ambang negara maju dengan berpandukan semangat *Malaysia Boleh*. Anak-anak telah berjaya menjelajah lautan tujuh teduh yang penuh cabaran, menakluki Gunung Everest yang mencakar langit, merenangi Selat Ingeris yang bergelora, merencah Kutub Utara dan Selatan dengan kesejukan yang membeku darah, mengelilingi dunia dengan basikal, motor dan kereta berhadapan dengan beribu cabaran.

Kita juga mempunyai bangunan kembar yang tertinggi di dunia menjolok awan, lapangan terbang yang terindah dan sofistikated, *Multimedia Super Corridor* yang mengagumkan, bandar bestari Putrajaya, Cyberjaya yang menarik pelabur luar dan dalam negara dan kereta nasional yang boleh dibanggakan.

Tahap kemiskinan telah menurun dari 50% pada tahun 1960 ke paras kurang dari 5% pada tahun 2003. Tahap kesihatan dan *healthcare*, dengan izin, mencapai tahap negara maju seperti England, Amerika, Jepun dengan kos yang jauh lebih rendah.

*Childcare* dan *fertility rate*, dengan izin, telah menurun ke paras 4% yang setanding dengan yang terbaik di dunia. Sistem pendidikan sama setahap dengan sebilangan yang terbaik di dunia maju, universiti dan institusi pengajian tinggi telah tumbuh sebagai cendawan, sekolah bestari ditubuhkan untuk mengasaskan masyarakat berilmu dan bijak, dengan itu tidak ada sebab anak-anak Malaysia tidak berpelajaran.

Infrastruktur dan kemudahan asas selain daripada Sarawak dan Sabah telah dibangunkan dan diisi untuk mencapai tahap yang setanding dengan tahap negara-negara maju. Wanita telah dimartabatkan setingginya dan diberikan kedudukan yang sewajarnya, peraturan yang serong kepada wanita yang diwarisi dari British dahulu telah banyak kita hakis. Walaupun nisbah dasar ekonomi baru belum tercapai tetapi kekayaan, kemajuan, kesenangan di kalangan anak-anak Melayu dan bumiputera telah nampak menyerlah.

Dahulu negara berasaskan pertanian, sekarang telah menjadi negara industri dan dagangan antarabangsa. Dahulu dikatakan jikalau tidak boleh buat jarum, mana boleh merdeka tetapi sekarang kita sudah menjadi negara pengekspor ke 17 terbesar di dunia. Kita menjadi negara pengeluar barangan elektrik, kereta, motor, *wafer sophisticated electronic gadget* dan perkhidmatan canggih. Kita telah menjadi negara pelancongan dan mempunyai industri yang kedua memberi sumbangan kepada negara. Minyak sawit telah memartabatkan industri perusahaan utama dan keluaran pertanian yang memecah pasaran dunia.

Dahulu kita adalah *the backwater and unknown* dengan izin, kini telah berada di persada dunia, setanding dengan negara yang besar, gagah perkasa dalam banyak bidang walaupun bukan pergolakan yang kita cari.

Tuan Yang di-Pertua, Yang Teramat Mulia Tunku Abdul Rahman Putra telah memerdekakan rakyat dan negara Malaysia dan mewujudkan asas perpaduan masyarakat majmuk. Yang Amat Berhormat Tun Abdul Razak telah memberi semangat juang dan hala tuju kepada negara. Yang Amat Berhormat Tun Hussien Onn telah memperhebat perjuangan tersebut.

Yang Amat Berbahagia Tun Dr. Mahathir Mohamad lah yang mencanai dan mencipta Wawasan 2020 sebagai wadah perjuangan membangkitkan pembangunan minda dan intelek rakyat Malaysia dan menyatupadukan semua kaum untuk mencapai wawasan tersebut.

Tuan Yang di-Pertua, zaman tiga Perdana Menteri yang pertama dari Yang Teramat Mulia Tunku hingga Tun Hussien, Melayu bersatu padu, gagah, berani dan kental. Fakta yang menggesa mendorong bangsa dan etnik lain menyertai perjuangan mereka. Perpaduan nasional ini telah menggerunkan Inggeris di peringkat awalnya. Cabaran 13 Mei tahun 1969 dapat diatasi dengan keberanian, perpaduan dan perjuangan tersebut. Kerajaan boleh melahirkan pembelaan khusus kepada masyarakat Melayu dan bumiputera dalam bentuk Dasar Ekonomi Baru. Walaupun Parti PAS telah wujud dari awal lagi tetapi perpaduan dan kekentalan masyarakat Melayu masih kukuh, politik yang *diversity* dan pergolakan politik tidak memberi kesan kepada perjuangan Melayu.

Inilah fakta sebenarnya kejayaan kerajaan untuk merentas rintangan dan mengatasi masalah kerana mentadbirkan kerajaan hingga ke pertengahan kerajaan kepimpinan Yang Amat Berbahagia Tun Dr. Mahathir bin Mohamad. Sokongan padu bangsanya, kematangan anak-anak mudanya, kekuatan mental dan moral anak bangsanya tetapi Tuan Yang di-Pertua, dalam kancah kegemilangan dan arus kemajuan yang kita menikmati sekarang, tanda retak mula terlihat. *Diversity* politik mula menular, agama dijadikan umpan dan dayah politik. Melayu mulai lupa perjuangan dan mula tidak lagi berterima kasih. Anak-anak

Melayu semakin leka, anak-anak Melayu di katakan menjadi pelepas, membunuh diri, berlumba motor di jalan raya, penjenayah, penagih dadah. Prestasi pendidikan anak-anak Melayu khususnya kaum lelaki di sekolah dan di Pusat Pengajian Tinggi belum mencapai tahap yang membanggakan. Sekolah-sekolah telah dijadikan medan perbalahan dan pergaduhan beramai-ramai.

Persaingan politik telah banyak menghakis perpaduan masyarakat terutama masyarakat Melayu. Kini keretakan mula dilihat. Ketahanan masyarakat mula lentur dan keutamaan bumiputera dan Melayu mula tercabar. Hakikatnya orang Melayu telah banyak berubah. Kemajuan, kejayaan, kekayaan telah melumpuhkan jiwa, melemahkan minda, menyelewengkan wawasan orang-orang Melayu. Saya bukan menuding jari kepada bangsa saya sendiri tetapi kenyataan mesti diterima jikalau kita benar-benar serius mencari penyelesaian.

Ibu bapa melupakan tanggungjawab mendidik dan membimbing anak-anak. Ada yang gagah dan menjadi wira pencari harta kekayaan, material tetapi melupakan anak-anak, pewaris yang berpotensi untuk membinasakan atau memperhebat kejayaan mereka. Anak-anak tidak lagi berterima kasih kepada ibu bapa dalam meneruskan perjuangan, impian dan matlamat ibu bapa untuk kemajuan bakal pewaris harta pusaka mereka dan kepimpinan negara yang tercinta ini. Cabaran semakin hebat bukan semakin reda. Anak-anak Melayu mesti kembali mengasaskan landasan perjuangan dan mengatasi cabaran ini. Negara yang indah dan permai ini, kita tidak ingin anak-anak Melayu menjadi seperti kaum Aborigine di Australia, Maori di New Zealand dan Red Indian di Amerika dan Kanada.

Tuan Yang di-Pertua, kejayaan dan kemegahan di tangan kita. Kelemahan dan keretakan juga di tangan kita. Yang Amat Berhormat Dato Seri Perdana Menteri yang telah dipertanggungjawabkan menghadapi dan mewarisi kedua-dua cabaran ini. Yang Amat Berhormat Tun Dr. Mahathir yang di peringkat awalnya, perpaduan dan kekentalan Melayu amat ketara. Yang diterima oleh Yang Amat Berhormat sekarang berlainan sedikit coraknya.

Tuan Yang di-Pertua, cabaran-cabaran bakal dihadapi Yang Amat Berhormat Dato Seri Abdullah bin Haji Ahmad Badawi amat besar dan kompleks. Perpaduan Melayu semakin rapuh, masyarakat Melayu menunjukkan kelemahan dalaman, bahkan cabaran Yang Amat Berhormat dalam soal perpaduan dan kemajuan negara tetapi juga *complexity* perhubungan antarabangsa.

Pertama, melaksanakan pentadbiran untuk menguruskan kemajuan dan kegemilangan yang sedia ada untuk melangkah lebih maju dalam semua segi. Kedua, untuk membangun anak bangsanya khususnya anak-anak Melayu yang pernah menjadi nadi dan jiwa perjuangan Malaysia dan tanah air ini supaya tidak kecundang dirempuh keretakan perpaduan, cabaran kelemahan pendidikan, kemelut sosial, kegilaan mengejar kemajuan dan kekayaan individu hingga lupa perjuangan bangsanya. Walau bagaimanapun, saya cukup yakin bahawa Yang Amat Berhormat Perdana Menteri bukan sahaja boleh mengatasi masalah ini tetapi berupaya membawa masyarakat dan rakyat Malaysia ke era yang lebih cemerlang lagi ke masa hadapan.

Yang Amat Berhormat Dato Seri, saya sebagai wakil Parti Pesaka Bumi Bersatu atau PBB bagi pihak parti kami dan semua rakyat Malaysia di Sarawak, saya ingin merakamkan ucapan tahniah dan syabas atas pelantikan Yang Amat Berhormat Dato Seri sebagai Perdana Menteri Malaysia yang kelima. Kami berjanji memberi sokongan padu dan jitu dan memberi perkhidmatan sepenuh jiwa dan tenaga untuk membolehkan Dato Seri melaksanakan program dan rancangan untuk mencemerlangkan kemajuan dan pembangunan negara ini. Kami rela menghadapi apa sahaja untuk mempertahankan kedaulatan Malaysia dan kerajaan pimpinan Yang Amat Berhormat Dato Seri. Kami rela berpatah sayap, bertongkat paruh untuk mempertahankan pimpinan kerajaan Yang Amat Berhormat Dato Seri... [Tepuk]

Insya-Allah di bawah kepimpinan Dato Seri dan *stewardship* Yang Amat Berhormat Dato Seri, saya cukup yakin, Malaysia akan maju dalam keadaan aman, makmur dan sejahtera. Dengan itu saya menyokong. Terima kasih.

**Timbalan Yang di-Pertua [Datuk Lim Si Cheng]:** Sebelum saya minta Yang Berhormat dari kawasan Shah Alam menjawab, saya ingin memberi peluang kepada seorang lagi daripada Sabah. Yang Berhormat bagi Bandau. Lepas Yang Berhormat Bandau, Yang Berhormat bagi Shah Alam boleh menjawab.

**4.18 ptg.**

**Datuk Dr. Maximus Johnity Ongkili [Bandau]:** Terima kasih Tuan Yang di-Pertua kerana memberi peluang kepada pihak kita mengambil bahagian dalam menyokong usul yang dibentangkan oleh Yang Berhormat bagi Shah Alam.

Saya berdiri Tuan Yang di-Pertua, menyampaikan ucapan sokongan penuh bagi pihak rakyat di kawasan Bandau dan Parti Bersatu Sabah serta rakyat Malaysia di negeri Sabah kepada usul yang dibentangkan oleh Yang Berhormat bagi Shah Alam tadi.

Tuan Yang di-Pertua, tarikh 31 Oktober 2003 yang lalu itu mencatatkan satu titik sejarah politik bukan sahaja di negara ini tetapi di rantau Asia bahkan di seluruh dunia. Penggantian kepimpinan negara di rantau negara-negara yang sedang membangun biasanya terjadi dalam keadaan politik tegang, perselisihan atau rusuhan kaum, pergeseran politik, perebutan kuasa, krisis keselamatan dan sebagainya tetapi di Malaysia, semua ciri-ciri ini adalah jauh daripada apa yang dinikmati oleh rakyat Malaysia bahkan tidak sama sekali dinikmati apabila terjadi peralihan kuasa, kepimpinan negara pada 31 Oktober 2003 iaitu tiga hari yang lalu. Inilah Malaysia yang berjaya, progresif, maju, matang dan mampu menjadi contoh kepada dunia dari segi pengurusan kepimpinan politik yang cemerlang dan matang. Peralihan kuasa yang dinikmati oleh rakyat Malaysia ini adalah satu lagi contoh bahawa Malaysia boleh dan rakyat Malaysia boleh, bahkan lebih boleh daripada banyak negara lain yang sudah membangun di dunia ini.

Tuan Yang di-Pertua, Malaysia amat bertuah kerana kepimpinan negara memiliki visi dan aspirasi serta tanggungjawab yang tertinggi dalam memastikan supaya kemajuan, posisi dan kepentingan Malaysia di peringkat antarabangsa terus terpelihara. Dalam soal ini, pemilihan pengganti Perdana Menteri selepas Yang Berhormat bagi Kubang Pasu, Tun Dr. Mahathir bin Mohamad adalah amat tepat sekali. Kita mengucapkan syabas dan tahniah kepada Yang Amat Berhormat Dato' Seri Abdullah bin Haji Ahmad Badawi yang telah dipilih, diasuh, diasah, dipersiapkan dan sekarang dipertanggungjawabkan memimpin negara Malaysia sebagai Perdana Menteri yang kelima.

Rakyat Malaysia cukup yakin bahawa Yang Amat Berhormat Kepala Batas sebagai Perdana Menteri akan terus memantapkan kejayaan Malaysia yang dicapai di bawah kepimpinan bekas Perdana Menteri, Yang Berhormat Tun Dr. Mahathir bin Mohamad. Bahkan kita yakin dan percaya, Yang Amat Berhormat Kepala Batas akan mencatatkan sejarah dengan izin, *will carve in service segment of history* dan *the national map of achievements and successes* dalam tempoh beliau akan memimpin negara ini sebagai Perdana Menteri.

Tuan Yang di-Pertua, Yang Amat Berhormat Kepala Batas sebagai Perdana Menteri mempunyai latar belakang yang kukuh, luas dan panjang lebar sebagai pentadbir kerajaan sebelum beliau menerajui dalam bidang kepimpinan politik. Dalam soal politik, pengalamannya luas dan pencapaian serta sumbangannya kepada negara sudah pun ketara. Dalam latar belakang ini, beliau amat sesuai memandu Malaysia dalam abad ke-21 dalam era globalisasi dunia tanpa sempadan, persekitaran yang didominasi oleh sains dan teknologi, beliau mempunyai keupayaan dan kebolehan mencetus pencapaian baru dalam bidang-bidang yang diterajui oleh Malaysia, mahupun secara ekonomi, sosial ataupun dalam bidang sains dan teknologi.

Tuan Yang di-Pertua, bagi rakyat di Sabah dan Sarawak, pihak kami sedia maklum bahawa latar belakang Yang Amat Berhormat Perdana Menteri sebagai Pegawai Pentadbir Kanan Kerajaan pada awal penubuhan Malaysia, telah dan tetap membolehkan beliau memberi perhatian yang khusus kepada keperluan pembangunan di kedua-dua negeri tersebut khasnya. Maka saya cukup yakin Yang Amat Berhormat Perdana Menteri akan memastikan kemajuan dan pembangunan yang lebih pesat akan terus dinikmati oleh rakyat Malaysia di negeri Sabah dan Sarawak khususnya.

Kita yakin Yang Amat Berhormat Perdana Menteri akan memastikan jurang pembangunan yang wujud antara Wilayah Semenanjung dan Wilayah Sabah dan Sarawak di seberang sana akan dapat dikurangkan dari semua segi khasnya dari segi keperluan infrastruktur asas termasuk jalan-jalan raya, bekalan air dan elektrik, infrastruktur pendidikan dan kesihatan serta keperluan keselamatan negara, khususnya dalam soal menyelesaikan masalah pendatang asing di negeri Sabah.

Tuan Yang di-Pertua, bagi pihak Parti Bersatu Sabah serta rakyat Malaysia di negeri Sabah, saya zahir dan catatkan sokongan yang total kepada Yang Amat Berhormat Perdana Menteri dengan jaminan pihak kami akan tetap berdiri teguh di bawah kepimpinan beliau serta bekerja keras memberi sumbangan kepada kejayaan agenda pembangunan Kerajaan Barisan Nasional yang beliau terajui. Bagi kami dalam Parti Bersatu Sabah Tuan Yang di-Pertua, kami catatkan di sini bahawa Yang Amat Berhormat Kepala Bataslah yang telah merintis jalan dan membantu supaya PBS kembali kepada *political mainstream* dengan izin, dua tahun yang lalu...

**Beberapa Ahli Pembangkang:** *[Menyampuk]*

**Datuk Dr. Maximus Johnity Ongkili:** Apa bising-bising? Saya lapan tahun di sana, tidak ada apa jadi juga....

**Beberapa Ahli:** *[Ketawa]*

**Datuk Dr. Maximus Johnity Ongkili:** ...Pada waktu sebelum itu, banyak usaha dan jambatan digunakan dalam soal memperbaharui perhubungan antara PBS dan Kerajaan Pusat. Semuanya gagal ataupun tidak boleh menembusinya. Hanya dengan usaha, panduan, sokongan dan visi jangka panjang Yang Amat Berhormat Kepala Batas, maka projek perpaduan dan kesatuan tersebut menembusi ke tahap kejayaan, di mana PBS sekarang berpeluang memberi sumbangan kepada perjuangan pembangunan dan pentadbiran negara Malaysia melalui Barisan Nasional.

Inilah satu lagi ciri kepintaran dan kejayaan beliau di arena pengurusan politik lahir daripada sikap keterbukaan, kesederhanaan serta sikap mengutamakan perpaduan rakyat yang diamalkan oleh Yang Amat Berhormat Kepala Batas. Saya yakin banyak lagi Yang Amat Berhormat Perdana Menteri akan capai dalam soal yang sama di masa yang akan datang. Dengan keyakinan yang tinggi bahawa Malaysia akan terus berjaya ke puncak tertinggi, gemilang di semua segi di bawah kepimpinan Yang Amat Berhormat, saya bagi pihak Ahli-ahli Parlimen yang lain dari Sabah dan rakyat Sabah keseluruhannya menyokong penuh setiap kepimpinan yang beliau usahakan sekarang hingga ke masa-masa akan datang. Dengan itu saya menyokong penuh usul yang dibentangkan.

**Timbalan Yang di-Pertua [Datuk Lim Si Cheng]:** Yang Berhormat bagi Shah Alam. Sila.

**4.26 ptg.**

**Dato' Ir. Mohd. Zin bin Mohamed [Shah Alam]:** Terima kasih Tuan Yang di-Pertua. Tadi Yang Berhormat sebut saya suruh jawab semua soalan. Saya tidak ada kementerian.... *[Ketawa]*

**Timbalan Yang di-Pertua [Datuk Lim Si Cheng]:** Yang Berhormat pembawa usul.

**Dato' Ir. Mohd. Zin bin Mohamed:** Ha, menjawab tadi kena betul-betul cakap tu... *[Ketawa]*. Cuma yang ada boleh bantu saya, sahabat sayalah, Ahli Parlimen bagi Bagan Datok... *[Ketawa]* *[Disampuk]* Dan yang lain-lain juga.

Tuan Yang di-Pertua, pertama, saya ingin merakamkan jutaan terima kasih dan setinggi penghargaan kepada Ahli-ahli Yang Berhormat bagi Rasah, Subang, Kota Melaka, Gua Musang, Yan, Teluk Intan, Batang Lupar dan akhir sekali Bandau. Saya yakin ramai dari kalangan rakan-rakan yang berusaha tetapi oleh kerana nampak Tuan Yang di-Pertua pun pada petang ini berpuasa, tidak sabar hendak balik juga... *[Ketawa]* Jadi mereka pun tidak dapat rebut peluang tetapi saya yakin tentu rakan-rakan di sini juga ingin terus dan mengambil bahagian. Saya lihat bahawa ada satu dimensi baru dalam suasana Dewan

yang mulia ini. Saya fikir oleh kerana kita berada dalam dengan izin, *new beginning, new era, new dimension, new undertaking.*

Macam contohlah, saya pun rasa bangga dengan Ahli Yang Berhormat bagi Gua Musang, nampaknya masih gagah lagi... [*Tepuk*] Pemikiran masih lagi bernas. Daripada Kota Melaka, saya ingat dia hendak anjakan paradigma sedikit tetapi masih lagi susah hendak beralih, dia takut hendak beralih kerana apa yang dibangkitkan bahawa tidak perlu hendak adakan usul undi percaya.

Pada hakikatnya, memang dalam peruntukan Perlembagaan tidak perlu diadakan tetapi daripada segi semangat dan dengan keprihatinan untuk kembali kepada rakyat, satu institusi yang tersohor dan tertinggi di dalam negara ini yang mengamalkan prinsip demokrasi sebagaimana juga yang dituntut oleh pihak pembangkang. Dan refleksi ini melambangkan betapa untuk kembali kepada institusi Parlimen dan rakyat untuk mendapat restu, itu adalah satu pemikiran yang jelas dan nyata daripada rakyat untuk rakyat.

Ini satu semangat yang harus kita pertahankan dan saya yakin bahawa iltizam inilah yang akan membawa kejayaan kepada bangsa, agama dan negara dan saya yakin bahawa sokongan daripada rakyat untuk rakyat dan tanggungjawab kita untuk memakmurkan rakyat adalah asas prinsip utama dalam cita rasa pemikiran Yang Amat Berhormat Ahli Parlimen bagi Kepala Batas yang menjadi Perdana Menteri kita yang kelima, yang kita kasihi.

**Datuk Haji Mohamad bin Haji Aziz:** [*Bangun*]

**Dato' Ir. Mohd. Zin bin Mohamed:** Tuan Yang di-Pertua, kenyataan-kenyataan Ahli Parlimen, saya dapat merasakan keseluruhan daripada mereka menunjukkan keyakinan kepada Yang Amat Berhormat Kepala Batas untuk menjadi ketua kepada kita....

**Datuk Haji Mohamad bin Haji Aziz:** [*Bangun*]

**Timbalan Yang di-Pertua [Datuk Lim Si Cheng]:** Yang Berhormat, Sri Gading bangun.

**Dato' Ir. Mohd. Zin bin Mohamed:** Boleh bagi untuk penjelasan kah, Tuan Yang di-Pertua?

**Timbalan Yang di-Pertua [Datuk Lim Si Cheng]:** Terpulang kepada Yang Berhormat.

**Dato' Ir. Mohd. Zin bin Mohamed:** Pasal nanti dia kemaruk hendak bercakap, saya kena bagi juga...

**Beberapa Ahli:** [*Ketawa*]

**Datuk Haji Mohamad bin Haji Aziz:** Terima kasih Tuan Yang di-Pertua dan terima kasih sahabat saya Yang Berhormat bagi Shah Alam yang ditugaskan membawa usul. Saya tidak berpeluang hendak membuat ucapan, namun saya ingin membuat pertanyaan, penjelasan dan saya yakin dan percaya sahabat saya Shah Alam lebih daripada mampu dan layak untuk menjawab.

Yang Amat Berhormat Perdana Menteri kita yang kelima ini telah bekerja dengan empat orang Perdana Menteri Malaysia yang hebat-hebat dan bagi saya, pengalaman beliau bersama dengan empat Perdana Menteri yang hebat, bak kata orang tua-tua, "*Kuah akan tumpah ke nasi*". Maknanya, kecemerlangan negara ini dapat kita jamin atas segala kematangan pengalaman yang luas yang ada pada Yang Amat Berhormat PM yang kelima ini.

Perdana Menteri kita yang kelima ini mempunyai sifat dan perwatakan yang memang sesuai dengan seorang pemimpin seperti tabah, sabar, bertolak ansur, bijaksana, gigih, rajin, amanah, beragama, bermaruah, penyayang, berani dan mempunyai kekuatan tersendiri sebagai keturunan pejuang bangsa, agama dan negara...

**Seorang Ahli:** Soalan?

**Datuk Haji Mohamad bin Haji Aziz:** Soalnya, soalnya. Saya ingin penjelasan dari Yang Berhormat bagi Shah Alam, sebaik sahaja disempurnakan Yang Amat Berhormat ini sebagai Perdana Menteri yang kelima, selepas mengangkat sumpah jawatan sebagai Perdana Menteri, saya ingin penjelasan dan apa firasat Yang Berhormat bagi Shah Alam atas empat perkara yang dilakukan oleh Yang Amat Berhormat Perdana Menteri yang kelima ini yang mempunyai satu makna yang amat besar. Empat perkara ini ialah:

- (i) kembali ke kampung halamannya berjumpa bonda beliau untuk memohon restu;
- (ii) berjumpa sanak saudara, sahabat handai, kaum kerabat, kenalan sekampung dan senegeri di Pulau Pinang;
- (iii) memberi batuan kepada petani, penternak RM32 juta mengatasi kesempitan petani yang dilanda oleh banjir; dan
- (iv) ungkapan yang penuh hikmat bagi saya apabila beliau berkata, "*Jangan bekerja untuk saya tetapi bekerjalah bersama-sama saya*".

Saya mohon penjelasan Yang Berhormat bagi Shah Alam. Terima kasih Tuan Yang di-Pertua.

**Tuan Jawah Anak Gerang:** Ho! Hebat.

**Dato' Ir. Mohd. Zin bin Mohamed:** Terima kasih. Terima kasih. Tuan Yang di-Pertua, Yang Berhormat bagi Sri Gading ini memang hebat. Saya kagum dengan pandangan beliau dan rasa saya tak terdaya hendak menjawab perkara yang dibangkitkan itu... [Ketawa]

Namun apa yang saya boleh rasakan kalau dengan izin, saya teringat dahulu, dalam buku Alex Haley iaitu *The Roots*, "*We must know our roots*". Asal usul kita dan saya yakin bahawa Yang Amat Berhormat yang telah pun di persada Perdana Menteri masih lagi mengingati asal usul beliau. Itu sebab balik jumpa bonda di kampung halaman, jumpa sanak saudara... [Tepuk] Jumpa petani, datang dalam Parlimen dalam tugas rasmi hari yang pertama berjumpa kepada wakil-wakil rakyat kerana kita ini semua wakil seluruh rakyat Malaysia yang dipilih secara demokrasi. Inilah melambangkan harapan dan cita-cita kita semua. Insya-Allah. saya rasa bahawa Yang Amat Berhormat Perdana Menteri akan mampu melaksanakan harapan dan cita-cita kita.

Jadi yang penting sebagaimana yang ditegaskan oleh semua kesimpulan yang saya boleh mengambil kira daripada maklum balas yang dibangkitkan oleh Ahli-ahli Parlimen sebentar tadi ialah tentang perpaduan dan kita rasa bahawa hormat menghormati dan penilaian semula dasar-dasar yang ada. Saya berkeyakinan bahawa semuanya akan diambil berat oleh Yang Amat Berhormat Perdana Menteri.

Pada saya, apa yang saya harapkan dan saya rasa semua di antara kita berdoa bahawa kita sedar untuk mewujudkan iklim dan suasana yang sedia ada dan apa yang ada pada hari ini bukanlah satu perkara yang mudah. Negara kita bukan dijadikan macam lampu Aladdin. Kita gosok sahaja dia akan jadi maju dan makmur. Perpaduan yang ada pada kita pun harus dibina dengan berbagai-bagai proses untuk menjadikan kita dan soal ini kita mesti pelihara.

Saya amat setuju bahawa kenyataan walaupun dalam kelembutan tetapi ketegasan Yang Amat Berhormat mengatakan bahawa soal sentimen perkauman, soal meletakkan keselamatan negara tidak ada kompromi dan kita tahu bahawa ini adalah satu asas pertimbangan utama untuk kita terus maju ke hadapan.

Tuan Yang di-Pertua, sebagaimana yang saya tegaskan tadi, saya tidak ada kementerian, saya tidak ada pegawai, cuma ada sahabat saya Yang Berhormat bagi Bagan Datok jadi kita bincang-bincang sedikit apalah nukilan yang hendak kita sampaikan kepada Yang Amat Berhormat Perdana Menteri, jadi saya dibantu oleh Yang Berhormat bagi Bagan Datok ini, jadi saya mohon izinlah untuk berkongsi dengan Tuan Yang di-Pertua dan Ahli-ahli Yang Berhormat.

Kalau di Timur Tengah, orang Badawi di sana memelihara unta. Badawi di sini dituduh satu ketika memelihara babi tetapi dengan senyum dan jiwa yang tenang, Yang Amat Berhormat bagi Kepala Batas tidak pernah menunjukkan sebarang rasa kebencian dan reaksi yang negatif. Jadi, telah menjadi ketentuan Allah S.W.T. jika kita menerima dengan reda segala fitnah dan tohmah sedangkan keikhlasan mengatasi matlamat politik, Allah S.W.T. sudah pasti akan memberikan barokah dan hidayah. Inilah yang kita harus pelajari dari Yang Amat Berhormat Perdana Menteri kita ini.... [Tepuk]

*Thank you Sir, we will salute you, Sir. one round of big applaud to Yang Amat Berhormat.... [Tepuk]* Terima kasih Tuan Yang di-Pertua. Saya selesai menggulung.... [Ketawa] [Dewan riuh]

**Timbalan Yang di-Pertua [Datuk Lim Si Cheng]:** Ahli-ahli Yang Berhormat, sekarang saya kemukakan masalah kepada Majlis bagi diputuskan.

Masalah dikemuka bagi diputuskan,

Usul disetujui.

### USUL

#### **KAJIAN SEPARUH PENGGAL RANCANGAN MALAYSIA KELAPAN (2001-2005)**

Aturan Urusan Mesyuarat dibacakan bagi menyambung semula perbahasan yang ditangguhkan atas Usul Kajian Separuh Penggal Rancangan Malaysia Kelapan (2001-2002). [30 Oktober 2003]

**Timbalan Yang di-Pertua [Datuk Lim Si Cheng]:** Saya meminta Yang Berhormat bagi Lipis untuk menyambung ucapan.

[Timbalan Yang di-Pertua [Dato' Haji Muhamad bin Abdullah] *mempengerusikan Mesyuarat*]

4.29 ptg.

**Dato' Haji Amihamzah bin Ahmad [Lipis]:** Tuan Yang di-Pertua, terima kasih kerana membenarkan saya meneruskan ucapan yang telah tertangguh pada 30 Oktober yang lepas. Dengan kebenaran Tuan Yang di-Pertua, ini bermakna saya berkesempatan berucap dalam dua era kepimpinan... [Dewan riuh] [Tepuk]

**Datuk Ruhanie bin Haji Ahmad:** Hebat! Hebat!

**Tuan Jawah Anak Gerang:** Hebat! Hebat!

**Timbalan Yang di-Pertua [Dato' Haji Muhamad bin Abdullah]:** Ya. Terus. Terus Yang Berhormat. Terus, terus.

**Dato' Haji Amihamzah bin Ahmad:** Satu kepimpinan Yang Amat Berbahagia Tun Dr. Ismail.....[Dewan riuh]

**Timbalan Yang di-Pertua [Dato' Haji Muhamad bin Abdullah]:** Ha. Ha. Ha.

**Dato' Haji Amihamzah bin Ahmad:** ...[Ketawa] [Dewan riuh] Minta maaf sebab ramai sangat ini, saya pun gemuruh.....

**Timbalan Yang di-Pertua [Dato' Haji Muhamad bin Abdullah]:** Teruskan Yang Berhormat.

**Dato' Haji Amihamzah bin Ahmad:** Era Yang Amat Berbahagia Tun Dr. Mahathir selaku Perdana Menteri Malaysia yang keempat dan era kepimpinan Yang Amat Berhormat Dato' Seri Abdullah bin Haji Ahmad Badawi, Perdana Menteri Malaysia yang kelima....

**Datuk Ruhanie bin Haji Ahmad:** Hebat!

**Dato' Haji Amihamzah bin Ahmad:** Mengimbuai kembali ucapan saya pada 30 Oktober yang lepas, saya telah menyatakan bahawa masih terdapat perbezaan antara

wilayah-wilayah terutamanya di kawasan luar bandar dan bandar yang mana pembangunan yang pesat dapat kita lihat di bandar dengan kemudahan-kemudahan yang tertentu tetapi kita masih lagi tidak mendapat kemudahan-kemudahan asas umpamanya di kawasan-kawasan luar bandar. Jadi dengan ini, melalui kajian semula Rancangan Malaysia Kelapan ini, saya berharaplah supaya kawasan-kawasan yang masih lagi tercicir umpamanya dari segi kemudahan asas dapat dipertingkatkan lagi.

Tuan Yang di-Pertua, pada 30 Oktober yang lepas, Yang Amat Berbahagia Tun Dr. Mahathir telah membentangkan Usul Kajian Separuh Penggal Rancangan Malaysia Kelapan dan selama lebih dua jam lamanya. Dalam ucapan yang padat ini, Yang Amat Berbahagia Tun menyatakan dengan tegas untuk mencapai pertumbuhan seimbang dan mapan dalam tempoh 2004 sehingga 2005 ini.

Pada saya, inilah sumbangan terbesar Yang Amat Berbahagia Tun Dr. Mahathir dengan matlamat untuk membina sebuah negara yang bersih, padu, adil, berdaya tahan dan berdaya saing. Betapa tidak, selama beliau memegang tampuk pemerintahan, tidak cukup dengan Al-Gore... [*Mencari-cari kertas di atas meja*] Ha sudah... Minta maaf Tuan Yang di-Pertua... [*Disampuk*]

Tuan Yang di-Pertua, "Tak tumbuh tak melata, tak sungguh, tak kata."....

**Seorang Ahli:** Orang tak kata.

**Dato' Haji Amihamzah bin Ahmad:** ....Orang tak kata. Seluruh rakyat yang pandai bersyukur dan berterima kasih, dengan rasa sedih melepaskan Yang Amat Berbahagia Tun Dr. Mahathir dengan linangan air mata dan sebak di dada. Semua lapisan masyarakat, tidak kira bangsa dan agama, mengizinkan Yang Berbahagia Tun Dr. Mahathir bersara daripada jawatannya.

Seluruh dunia mengakui bahawa Yang Berbahagia Tun Dr. Mahathir telah mengangkat martabat bangsa Malaysia ke satu taraf yang dihormati oleh dunia. *Malaysia Boleh* berkumandang di seluruh pelosok dunia, baik di Antartika ataupun di Artik, baik di Gunung Everest, di Selat Ingeris, di tengah Lautan Pasifik dan di mana-mana.

Selaku wakil rakyat Barisan Nasional di Dewan ini, saya bersama-sama dengan rakyat merelakan persaraan Yang Berbahagia Tun Dr. Mahathir. Biarlah beliau menjalani kehidupan yang masih ada ini dengan tenang bersama keluarganya yang telah banyak berkorban untuk kita semua.

Betapa tidak, selama beliau memegang tampuk pemerintahan, tidak cukup dengan Al-Gore, Estrada dan pihak pembangkang telah menabur jutaan fitnah, cacian, maki-hamun dan pelbagai penghinaan dilemparkan kepada beliau. Ada mereka yang telah mati dan tidak sempat lagi meminta maaf kepada beliau... [*Ketawa*] Insaflah wahai pembangkang! [*Disampuk*][*Ketawa*] Fatwa sesat kamu tidak membawa ke mana-mana.

Jangan menjadi golok kayu, ditetak tidak makan, dijual tidak laku. Apa gunanya gagal mengigal di hutan? Jangan jadi dedalu api, hingga di pohon kayu, hinggap di batang, mati batang.... [*Ketawa*] Hinggap di dahan, mati dahan, hinggap di ranting, patah ranting.

Tuan Yang di-Pertua, saya tidak dapat peluang untuk berucap berkenaan dengan usul terima kasih di atas perkhidmatan....

**Timbalan Yang di-Pertua [Dato' Haji Muhamad bin Abdullah]:** Ya.

**Dato' Haji Amihamzah bin Ahmad:** ...Tun Dr. Mahathir, jadi saya ambil masa sedikit ya.

**Timbalan Yang di-Pertua [Dato' Haji Muhamad bin Abdullah]:** Masa sudah tidak lama Yang Berhormat.

**Dato' Haji Amihamzah bin Ahmad:** Jadi...

**Timbalan Yang di-Pertua [Dato' Haji Muhamad bin Abdullah]:** Ada enam minit lagi.

**Dato' Haji Amihamzah bin Ahmad:** Enam minit ya, terima kasih Tuan Yang di-Pertua.

**Timbalan Yang di-Pertua [Dato' Haji Muhamad bin Abdullah]:** Ya.

**Dato' Haji Amihamzah bin Ahmad:** Tuan Yang di-Pertua, persaraan Yang Amat Berbahagia Tun Dr. Mahathir yang digantikan dengan Yang Amat Berhormat Dato' Seri Abdullah bin Haji Ahmad Badawi adalah satu proses peralihan yang tepat dan sesuai dengan masa dan mendapat sokongan daripada seluruh rakyat. Peralihan ini bolehlah dianggap sebagai pelengkap kepada susun atur perancangan untuk merealisasikan visi menjadikan Malaysia negara maju pada tahun 2020.

Baru sebentar tadi kita semua mendengar dari kesemua komponen parti dalam Barisan Nasional mempunyai keyakinan yang penuh di atas kebolehan Yang Amat Berhormat Dato' Seri Abdullah bin Haji Ahmad Badawi.

Tuan Yang di-Pertua, seperti kata sahabat saya tadi, benih yang baik jatuh ke laut menjadi pulau, jatuh ke darat menjadi bukit. Dilahirkan dan dibesarkan di dalam keluarga beragama dan politik, berpendidikan pengajian Islam dari Universiti Malaya, mempunyai pengalaman luas dalam pentadbiran awam sebagai Pegawai Tadbir dan Diplomatik, diberi kepercayaan menjadi Menteri Pelajaran, Menteri Pertahanan, Menteri Luar Negeri, Menteri Dalam Negeri dan Timbalan Perdana Menteri, sudah tentulah Yang Amat Berhormat Dato' Sri Abdullah sudah dipersiapkan dengan rapi untuk memikul tanggungjawab yang besar sebagai Perdana Menteri kita yang kelima ini. Pahit getir sebagai Menteri dan Ahli Parlimen biasa, sudah pasti membolehkan Perdana Menteri kita menguruskan *success* yang kita kecapai selama ini.

Tuan Yang di-Pertua, saya masih ingat lagi kepada ucapan Yang Amat Berhormat Perdana Menteri kita dahulu berkenaan dengan *Managing the Success* yang telah kita ketahui bahawa negara kita adalah negara yang terkemuka di antara negara yang membangun. Jadi soal *Managing the Success* ini adalah satu perkara yang amat penting dan bagi saya, memang kadang-kadang kita dapati bahawa setelah kita berjaya dalam satu-satu perkara itu, persoalan menguruskan kejayaan ini adalah satu perkara yang sukar bagi kita.

Saya dapati bahawa umpamanya di kawasan-kawasan luar bandar di mana kita telah mengadakan beberapa banyak projek untuk kawasan pertanian umpamanya, sehingga di musim buah durian ataupun buah-buahan lain, maka berlaku *glut* dalam *market* tetapi *this is the problem of success*. Maknanya kita telah berjaya menggalakkan petani menanam buah-buahan tetapi akhirnya buah-buahan itu menjadi tidak laku. Akibatnya, Tuan Yang di-Pertua, di tempat saya, saya tengok sudah ada petani-petani dan penanam-penanam yang sudah menebang pokok durian yang ditanam beratus-ratus ekar. Jadi, kalau *this is the answer to the success*, saya percaya ia tidak memberi banyak kebaikan bagi kita semua.

Dalam Kajian Separuh Penggal Rancangan Malaysia Kelapan ini, kita dapati bahawa *critical issue* masih lagi tidak dapat kita selesaikan. Jadi saya haraplah supaya perkara ini diberikan tumpuan yang khusus, pertamanya dari segi kekurangan doktor dan juga doktor pakar.

Kita dalam Dewan ini telah menyoal, mengapa pengambilan doktor-doktor memakan masa yang begitu lama tetapi jawapannya ialah sebulan kena *interview*, kemudian ada melibatkan Kementerian Kesihatan dan JPA baru ambil, jadi prosesnya memakan masa sehingga dua tahun.

Dalam soal-soal yang kritikal, isu yang kritikal, saya percaya proses yang biasa itu hendaklah kita ketepikan, *red tape*, birokrasi dan sebagainya. Apa sahaja berkaitan dengan perkara-perkara yang kritikal ini, maka hendaklah kita segerakan dan saya amat berbangga, umpamanya dalam krisis wabah J.E atau Nipah virus dahulu Timbalan Perdana Menteri ketika itu memangku jawatan Perdana Menteri telah menubuhkan satu operasi yang serta-merta untuk menangani masalah itu.

Jadi, kalau soal-soal seperti yang saya sebut tadi, soal seperti kekurangan doktor, dan kita juga dapati bahawa bekalan air juga merupakan satu perkara yang kritikal,

terutamanya kalau kita berjalan di mana-mana jalan raya sekarang ini, kalaulah sekiranya jalan raya duduk di dalam hutan, kita dapati bahawa air keluar daripada tanah. Sebenarnya ini bukanlah mata air tetapi oleh kerana paip yang pecah tetapi di merata-rata tempat, saya kalau berjalan umpamanya di tempat saya sampai dua, tiga tempat, di tengah jalan, kemudian saya tengok dalam longkang, air keluar daripada longkang yang begitu bersih dan saya dapati bahawa ini disebabkan oleh paip yang pecah.

Persoalannya kita dapati bahawa bekalan air selalu terputus dan sebagainya. Saya mengira bahawa ini adalah satu perkara yang kritikal yang perlu kita tangani dengan begitu cepat walaupun maknanya....

**Timbalan Yang di-Pertua [Dato' Haji Muhamad bin Abdullah]:** Masa Yang Berhormat sudah cukup, Yang Berhormat.

**Dato' Haji Amihamzah bin Ahmad:** Ya, masa sudah habis?

**Timbalan Yang di-Pertua [Dato' Haji Muhamad bin Abdullah]:** Ya.

**Dato' Haji Amihamzah bin Ahmad:** ...dengan cepat yang tidak perlulah kita menggunakan peraturan biasa. Dengan itu saya mohon menyokong. Terima kasih.

**Timbalan Yang di-Pertua [Dato' Haji Muhamad bin Abdullah]:** Ya, saya bagi Yang Berhormat bagi Larut dahulu, Larut.

#### 4.50 ptg.

**Raja Dato' Ahmad Zainuddin bin Raja Haji Omar [Larut]:** Terima kasih Tuan Yang di-Pertua. Saya bangun untuk sama-sama membahaskan Kajian Separuh Penggal Rancangan Malaysia Kelapan, di mana banyak perkara yang disentuh ketika membahaskan pembentangan Rancangan tersebut pada tahun 2000 nampaknya kini membuahkan hasil.

Saya amat gembira kerana salah satu cadangan yang pernah dikemukakan di Dewan Rakyat ini iaitu pelancongan kesihatan kini mendapat tempat di hati kerajaan, di mana kini lebih 30 buah hospital dikenal pasti untuk dilaksanakan *medical tourism* ini. Ketika mula diperkatakan di Dewan ini pada tahun 2000, jawapan oleh Kementerian Kesihatan ketika itu seperti kurang berkeyakinan, tetapi selepas itu kempen-kempen yang disebut oleh Menteri Kesihatan jelas membuahkan hasil yang mengembirakan.

Seperti sebelum ini soal paling penting yang saya akan terus perkatakan ialah soal kemiskinan. Kemiskinan ini penting diberikan perhatian kerana ia boleh membawa kekufuran. Seseorang yang kufur akan rosaklah iman dan keyakinan yang kelak akan merugikan kita.

Tuan Yang di-Pertua, di Dewan yang mulia ini saya ingin memperkatakan kemiskinan ini dalam dua konteks. Pertama kemiskinan dari segi ekonomi dan kedua kemiskinan dari segi jiwa dan semangat. Dalam konteks kemiskinan ekonomi, usaha kerajaan sangat membanggakan biarpun kita ditekan dari segenap sudut bermula dari kegawatan ekonomi pada tahun 1998, namun penurunan kadar kemiskinan berlaku juga iaitu pada tahap 7.5% pada tahun 1999. Peratusan rakyat termiskin turun dari 2.1% kepada 1.4% pada tahun tersebut.

Berteraskan strategi pembasmian kemiskinan ini bagi mengurangkan kadar kemiskinan kepada 0.5% menjelang tahun 2005, kerajaan melakukan pelbagai pendekatan termasuk Pakej Rangsangan yang juga memberikan kesan terus-menerus bagi mengatasi kemiskinan. Kita bangga dengan pencapaian kita yang ditonjolkan melalui Laporan Kajian Separuh Penggal, di mana tahap kemiskinan kini berada pada 5.1% pada tahun 2002 berbanding 52.4% pada tahun 1970.

Untuk mencapai sasaran iaitu 0.5% atau 0% menjelang beberapa tahun yang akan datang, usaha gigih perlu dibuat. Kerja ini memang sukar tetapi melalui usaha gigih pelbagai kementerian termasuk Kementerian Pembangunan Luar Bandar, Kementerian Pertanian, Kementerian Kebudayaan, Kesenian dan Pelancongan serta Kementerian Pendidikan selain kerajaan negeri, tugas akan menjadi lebih ringan. Dengan meningkatkan

pendapatan peneroka, petani dan nelayan melalui produk pertanian, kraf tangan serta juga hasil satu produk satu kampung, saya yakin ini akan menjanakan lagi ekonomi tempatan.

Penggalakan pelancongan ke kawasan luar bandar serta kawasan pulau seperti yang dibuktikan oleh Langkawi akan menjanakan lagi ekonomi. Kini dengan pembangunan yang akan dilaksanakan di Pulau Tioman, saya yakin ekonomi penduduk seramai 3,000 orang di pulau tersebut akan bertambah baik. Pun begitu, kerajaan sewajarnya mengkaji semula pendapatan yang dikatakan sebagai di bawah garis kemiskinan memandangkan tuntutan kehidupan di abad ke-21 ini jauh berbeza dengan tahun 70-an, 80-an atau awal 90-an. Soal-soal pendapatan isi rumah, belanja pendidikan, pengangkutan, kesihatan dan banyak lagi, saya yakin sudah jauh berubah. Jika selama ini ia sekitar RM350, kini mungkin sudah ke peringkat sekitar RM700 ataupun RM800. Oleh kerana itu, pendekatan kajian kemiskinan perlu diberikan pendekatan baru dengan input-input permintaan atau tuntutan pengguna yang lebih relevan masa kini.

Tuan Yang di-Pertua, bagaimanapun kita tetap yakin sebagai kerajaan yang bertanggungjawab di bawah kepimpinan Perdana Menteri yang sering menyelami masalah rakyat. Kita berkeyakinan penuh usaha ini akan dilipat gandakan lagi. Soal kedua yang kadangkalanya lebih penting dari kemiskinan ialah harta benda, iaitu kemiskinan jiwa. Memang benar kini jarang kita temui rakyat yang mempercayai rezeki secupak tidak akan jadi segantang. Namun ramai yang kita temui mula mempercayai dakyah yang menyalahgunakan hidup di dunia sementara dan di akhiratlah selama-lamanya. Ia benar dari segi agama tetapi Islam mengajar kita supaya bekerja seolah-olah kita akan hidup seribu tahun lagi dan beribadat seolah-olah kita akan mati pada esok hari.

Saya bimbang sikap tidak apa memberikan tumpuan lebih kepada kehidupan selepas kematian dan unsur-unsur negatif lain menyebabkan kumpulan ini akan ketinggalan. Hakikatnya mereka miskin bukan kerana kerajaan tidak memperkenalkan program tetapi mereka sendiri yang menjadikan mereka miskin. Miskin jiwa dan perjuangan ini berbahaya kepada negara dan kelak akan menjadikan mereka beban pula kepada pemerintahnya ketika kita mahukan rakyat kita yang progresif, inovatif dan proaktif. Kewujudan rakyat seperti ini sudah pasti merosakkan dan mencacat usaha Malaysia menuju ke negara maju pada tahun 2020.

Saya menyokong penuh ucapan bekas Perdana Menteri, Tun Dr. Mahathir di Dewan yang mulia ini pada hari Khamis lalu, yang mengatakan,

*“Sesungguhnya kejayaan dan kegagalan sesuatu bangsa mempunyai kaitan yang rapat dengan budaya, dan oleh itu kerajaan akan berusaha untuk membentuk budaya bangsa Malaysia yang bersikap positif terhadap kerja, berdisiplin, rajin dan bertanggungjawab”.*

Tuan Yang di-Pertua, yang pasti jika semua itu diamalkan dengan baik tidak kira oleh penduduk bandar atau pedalaman dan desa di Semenanjung atau di Sabah mahupun di Sarawak, usaha kerajaan membangunkan rakyat khususnya mengatasi kemiskinan akan menjadi lebih mudah. Saya ingin menyeru kepada kerajaan negeri yang dilabelkan sebagai negeri termiskin bekerjasama rapat dengan Kerajaan Pusat untuk mengatasi masalah kemiskinan rakyat kerana jika terus dibelenggu masalah tersebut, kelak ia akan menimbulkan masalah politik yang serius.

Jangan kerana kegagalan kerajaan negeri membangunkan negeri berkenaan, Kerajaan Pusat pula yang hendak dipersalahkan. Lebih buruk jika ada pula pihak tertentu yang mencucuh api di minyak yang memang sudah panas gara-gara kepentingan-kepentingan termasuk kuasa, pengaruh dan lain-lain. Islam membenci kemiskinan dan sewajarnya pemerintah negara Islam seperti Malaysia membasmi habis-habisan kemiskinan ini. Bukan memperbanyakkannya kerana sebab-sebab tersendiri. Adalah tidak relevan bagi sesebuah kerajaan yang mendakwa Islam, tetapi membiarkan kemiskinan dan kemudaratan rakyat berterusan sambil meniupkan dakyah bahawa ia adalah ketentuan daripada Allah.

Tuan Yang di-Pertua, berhubung dengan pendidikan, Kementerian Pendidikan mengumumkan pelbagai langkah untuk mengatasi masalah pembelajaran di negara ini khususnya pada peringkat sekolah. Negara akan mempunyai Sekolah Wawasan dan

Sekolah Bestari bagi menjamin perpaduan dan kejayaan murid. Mengadakan sekolah dan kelengkapan sekolah satu hal, mengajar dan keberkesanannya satu hal yang lain. Ini juga termasuk kegagalan nyata seperti projek komputer sekolah, rumah guru dan banyak lagi.

Saya mohon supaya kerajaan mengkaji semula sedalam-dalamnya usaha pembelajaran berterusan khususnya di sekolah-sekolah kebangsaan, sekolah menengah agama serta sekolah-sekolah menengah seluruh negara mengenai kegunaan masa. Masa itu emas dan Islam menyeru semua daripada kita tidak kira siapa sahaja mementingkan masa. Saya cukup kecewa apabila sekolah-sekolah kita banyak menghabiskan masa ketika sekolah dibuka dan sekolah hampir cuti. Ramai daripada murid terbiar apatah lagi yang baru lepas mengambil peperiksaan. Sikap pentadbir sekolah yang tidak mementingkan masa-masa ini mengecewakan kita kerana jika dibandingkan dengan sekolah bukan jenis kebangsaan, mereka menggunakan sepenuh masa untuk terus mengajar dan kelas berjalan seperti biasa.

Kita cuba mengorek rahsia kejayaan mereka. Bagi saya jawapan itu mudah. Mereka mementingkan masa dan tidak membuang masa sewenang-wenangnya kerana pembelajaran di sekolah tidak mengenal sama ada sekolah baru dibuka, sekolah hampir bercuti atau tempoh selepas peperiksaan. Seharusnya pentadbiran sekolah khususnya sekolah kebangsaan mengambil iktibar kenapa ramai bukan Melayu enggan menghantar anak mereka ke sekolah berkenaan dan kenapa semakin ramai anak Melayu dihantar ke sekolah jenis kebangsaan khususnya sekolah Cina.

Tuan Yang di-Pertua, saya ingin mengucapkan tahniah kerana tadi saya tidak sempat mengambil bahagian dalam perbincangan, dari hati yang ikhlas kepada Perdana Menteri kita yang kelima Yang Amat Berhormat Dato' Seri Abdullah bin Haji Ahmad Badawi kerana melawat mangsa banjir dan meluluskan peruntukan segera sebanyak RM30 juta. Keprihatinan ini menggambarkan memang Perdana Menteri kita berjiwa rakyat dan sanggup bertemu rakyat di desa hingga ke luar bandar. Saya yakin sifat penyayang dan mengambil berat terhadap rakyat akan terus bersemarak di jiwa Yang Amat Berhormat. Sikap seperti ini perlu diikuti oleh semua pemimpin termasuk yang ada di Dewan ini dan teladanilah sikap dan tindakan oleh Perdana Menteri kita yang kita kasihi.

Hakikatnya, Malaysia boleh maju jika semua rakyat berjiwa besar dan berbudaya rajin serta berdisiplin seperti yang saya katakan tadi, sementara kepimpinan pula diminta meneladani Perdana Menteri yang tebal kefahaman dan amalan Islamnya selain berjiwa rakyat. Saya ingin merujuk satu hadis yang berbunyi "*Tidak ada seseorang yang lebih besar mendapat pahala daripada mempunyai seorang wazir atau Perdana Menteri yang soleh yang bersama seorang pemimpin yang ia taat dan ia menyuruhnya mengikut kehendak Allah S.W.T.*" Sekian, saya menyokong.

**Timbalan Yang di-Pertua [Dato' Haji Muhamad bin Abdullah]:** Ya, Kinabatangan dahulu ya.

**5.02 ptg.**

**Datuk Bung Moktar bin Radin [Kinabatangan]:** Terima kasih Tuan Yang di-Pertua. Perkembangan ekonomi negara yang terus bergerak meskipun berhadapan dengan dugaan dan cabaran, kita bukan sahaja berhadapan dengan cabaran dan ancaman daripada parti-parti pembangkang dalam negara kita bahkan juga kita menerima cabaran daripada negara luar yang telah maju dan membangun. Alhamdulillah, semua ini berupaya kita hadapi dan se langit penghargaan kepada mantan Perdana Menteri kita, Yang Amat Berbahagia Tun Dr Mahathir Mohamad yang telah menerajui usaha mengukuhkan, mengekal dan seterusnya mengembangkan ekonomi negara secara berterusan.

Saya ingin merakamkan jutaan terima kasih dan tahniah kepada Perdana Menteri yang kelima, Yang Amat Berhormat Dato' Seri Abdullah bin Haji Ahmad Badawi dan kita percaya, saya juga seperti rakan yang lain tidak berkesempatan untuk membahaskan usul daripada *Backbencher* tetapi kesempatan ini ingin kita gunakan, di mana kita beranggapan bahawa proses pelantikan Perdana Menteri yang baru ini merupakan satu kecemerlangan kepada negara kita yang tidak boleh diambil di negara-negara yang lain. Justeru itu, parti pembangkang khususnya, sebab saya telah mengikuti beberapa rakan

saya daripada pembangkang menyatakan bahawa musuh ketat mereka ialah Tun Dr. Mahathir Mohamad, bukan UMNO.

Saya ingin mencabar mereka, kalau mereka masih lagi memutar-belitkan, memfitnah UMNO dan kepimpinan UMNO yang lain, saya akan intai ceramah-ceramah mereka walaupun saya berada di Sabah.... *[Tepuk]* Sebab pada saya, kata mesti di kota. Ada yang berkata kalau Tun Dr. Mahathir berhenti, mereka akan masuk UMNO semula. Saya ingin lihat pemimpin-pemimpin ini, jangan cakap kosong sahaja.... *[Tepuk]*

**Beberapa Ahli:** Yeah!

**Datuk Bung Moktar bin Radin:** Tuan Yang di-Pertua.....

**Seorang Ahli:** Tumpat, Tumpat.

**Datuk Bung Moktar bin Radin:** Ada, saya boleh namakan satu-satu, sebab saya mengikuti ucapan mereka, dalam Dewan dan di luar Dewan. Saya tahu satu-satu. Awas ini Yang Berhormat-Yang Berhormat.... *[Ketawa]*

Tuan Yang di-Pertua, kita yakin Perdana Menteri kita Dato' Seri Abdullah bin Haji Ahmad Badawi akan berupaya meneruskan kecemerlangan negara dengan kita akan terus menjadi penyokong dan sama-sama berusaha mengukuhkan, mengekal dan mengembangkan ekonomi negara. Strategi dan perancangan dalam Rancangan Malaysia Kelapan bukan sekadar memperlihatkan kejayaan yang membanggakan tetapi juga akan terus membawa kemakmuran dan keharmonian di negara ini.

Tempoh tiga tahun Rancangan Malaysia Kelapan yang berdepan dengan keadaan ekonomi global yang bergolak tidak menghalang kerajaan untuk meneruskan usahanya bagi mempertingkatkan ekonomi selain melaksanakan program-program pembangunan negara. Pelbagai pembangunan infrastruktur telah dinikmati oleh rakyat dalam Rancangan Malaysia Kelapan ini. Dengan pertumbuhan ekonomi yang lebih baik, nikmat ini bukan hanya dirasai oleh penyokong kerajaan tetapi juga penyokong dan juga pengikut, malah pemimpin serta wakil rakyat pembangkang sendiri menikmati kemakmuran hasil daripada perancangan dan usaha yang dilakukan oleh kerajaan.

Saya ingin merakamkan dukacita saya kepada wakil rakyat bagi Parit Buntar. Dalam membahaskan Kajian Separuh Penggal Rancangan Malaysia Kelapan, Yang Berhormat bagi Parit Buntar tidak langsung memperlihatkan satu bentuk yang diusahakan oleh kerajaan ini menampakkan kebaikan seperti KLIA, Lapangan Terbang Antarabangsa yang tahun-tahun mendapat anugerah terbaik tetapi Yang Berhormat bagi Parit Buntar menyatakan bahawa banyak syarikat gergasi telah melarikan diri, menjauhkan diri daripada penerbangan KLIA. Ini dusta, ini bohong. Kalau Yang Berhormat bagi Parit Buntar mungkin buta saya akan membawa dia ke KLIA, saya akan tunjuk mana-mana satu syarikat kapal terbang gergasi mendarat di Lapangan Terbang Antarabangsa Kuala Lumpur (KLIA).... *[Tepuk]*

Dia berkata bangunan Twin Tower, memang ada bangunan yang tinggi daripada Twin Tower tetapi kita ada dua, Twin Tower yang tinggi di dunia. Dia dipenuhi dengan pelbagai aktiviti dan sebagainya tetapi Yang Berhormat bagi Parit Buntar juga mengatakan 70% bangunan ini kosong. Ini pembohongan besar, kalau rakyat di kampung mungkin boleh dia bohongi tetapi kita dalam Dewan ini minta tolong pesan dengan Yang Berhormat bagi Parit Buntar, jangan berbohong dalam Dewan ini....

**Beberapa Ahli:** *[Menyampuk]*

**Datuk Bung Moktar bin Radin:** Berhubung dengan projek kecil jalan raya, saya telah dimaklumkan oleh rakan-rakan di Sungai Burung apabila jalan dibuat, Yang Berhormat bagi Parit Buntar berceramah di pentas menyatakan tidak perlu sokong kerajaan, tidak sokong pun jalan raya dibuat, apabila jalan raya tidak dibuat dia pula maklumkan kerajaan tidak ada tanggungjawab dan sebagainya. Inilah wakil rakyat yang tidak relevan sama sekali.... *[Tepuk]* Dahulu dibina Jambatan Pulau Pinang membazir, Putrajaya membazir, semua membazir.

Kita seharusnya berterima kasih dengan bekas Yang Amat Berhormat Perdana Menteri kita. Sebab Perdana Menteri yang ada sekarang pada saya tidak lagi perlu memikirkan projek-projek mega, bahkan hanya meneruskan perjuangan yang sedia ada di samping memastikan bahawa pembangunan rakyat di luar bandar juga tidak ketinggalan, harus diberi pembelaan sewajarnya.

Pada saya, marilah kita sama-sama, di bulan baik dan hari yang baik ini, kita pun mendapat pemimpin yang baru, Perdana Menteri yang baru yang belum kita cuba tetapi pada saya daripada rakan-rakan yang berhujah dan berbicara termasuk pembangkang saya kagum dengan wakil DAP iaitu Yang Berhormat bagi Kepong walaupun dahulu dia terlalu terkepung-kepung tetapi hari ini dia bijak menggunakan forum dan platform ini untuk menyatakan yang sebenarnya, bukan seperti rakan-rakan yang lain daripada PAS dan juga Kota Melaka. Ini bukan platform untuk *criticize* mana-mana pemimpin tetapi untuk kita menyatakan sokongan kita kepada pemimpin kita, negara kita.

Dalam pilihan raya kita boleh berlawan sebab kita sebuah negara demokrasi terpelihara, jangan takut jangan bimbang tetapi sebelum pilihan raya untuk menentukan kemakmuran negara kita, peranan parti pembangkang, wakil-wakil pembangkang juga harus penting dan diambil kira. Jadi ini adalah merupakan satu tanggungjawab kita bersama, jangan hanya kita memandai-mandai menyuruh pemimpin kita menghakis rasuah dan sebagainya tetapi kita tidak ada sumbangan langsung untuk memastikan pembangunan negara ini dapat dibawa secara adil, bebas, aman dan bertamadun.

Tuan Yang di-Pertua, saya ingin memfokuskan sedikit berhubung dengan kawasan pilihan raya saya. Memang saya ingin berterima kasih sebab banyak sudah jalan-jalan kampung yang telah dibina oleh kerajaan tetapi masih banyak lagi masalah yang dihadapi...

**Beberapa Ahli:** Haah!

**Datuk Bung Moktar bin Radin:** Ada beberapa rangkaian jalan raya yang perlu dinaikkan taraf, hah! Apabila sebut jalan raya pembangkang, ya! Saya hairan. Ini tugas kita wakil rakyat sama ada pembangkang mahupun di pihak kerajaan. Apabila ada lagi jalan raya yang belum terbina, kita minta kerajaan biar dibina untuk rakyat.

Bekalan air bersih masih 65% yang belum dapat di daerah ini. Bekalan elektrik juga masih ada lagi 35% belum dapat dilaksanakan. Dan saya berharap menerusi Kajian Separuh Penggal ...

**Beberapa Ahli:** *[Menyampuk]*

**Tuan Lim Hock Seng:** *[Menyampuk]* Bank tidak ada, bank tidak ada!

**Puan Fong Po Kuan:** *[Menyampuk]*

**Puan Teresa Kok Suh Sim:** *[Menyampuk]*

**Datuk Bung Moktar bin Radin:** Kenapa banyak nyamuk ini?

**Timbalan Yang di-Pertua [Dato' Haji Muhamad bin Abdullah]:** Ya, teruskan Yang Berhormat.

*[Dewan menjadi gamat seketika]*

**Datuk Bung Moktar bin Radin:** *[Ketawa]*

**Timbalan Yang di-Pertua [Dato' Haji Muhamad bin Abdullah]:** Teruskan Yang Berhormat.

**Datuk Bung Moktar bin Radin:** Kalau ini macam pilihan raya kalah ini.

**Timbalan Yang di-Pertua [Dato' Haji Muhamad bin Abdullah]:** Hm, semua orang tahu tentang itu Yang Berhormat.

**Datuk Bung Moktar bin Radin:** Hah!

**Timbalan Yang di-Pertua [Dato' Haji Muhamad bin Abdullah]:** Sila!

**Datuk Bung Moktar bin Radin:** Saya pakai *spray Shelltox* baru tahu ini!...  
[Ketawa]

**Timbalan Yang di-Pertua [Dato' Haji Muhamad bin Abdullah]:** Teruskan Yang Berhormat.

**Datuk Bung Moktar bin Radin:** ....[Ketawa] Tuan Yang di-Pertua, saya sekali lagi mahu mengulangi, saya mahu minta Kajian Separuh Penggal Rancangan Malaysia Kelapan ini kalau boleh mengambil perhatian terhadap pembangunan masalah di luar bandar iaitu bekalan air bersih, pembinaan penaikan taraf jalan luar bandar dan juga bekalan elektrik luar bandar. Ini perlu sebab saya kadang-kadang itulah selalu pembangkang ini apabila kita bercakap mereka sudah jadi nyamuk. Mereka tidak tahan itu gatal, mereka mahu cakap mereka tidak boleh cakap, kita cakap bukan *criticize* kerajaan kita tetapi kita menyampaikan hasrat rakyat.

Inilah masalah yang dihadapi oleh rakyat. Sebagai wakil rakyat yang berkesan dan relevan, inilah tugas wakil rakyat bukan duduk diam, bukan bising macam nyamuk itu tidak ada guna. Memfitnah, mengumpat dan sebagainya. Kita harus melaksanakan tugas kita selaku wakil rakyat. Saya tengok Yang Berhormat bagi Pokok Sena ada kerja untuk rakyat saya tengok tetapi belum tahu juga boleh menang atau tidak... [Ketawa]

Jadi saya mahu mintalah kerajaan kalau boleh meneruskan usaha ini kerana majoriti masyarakat di luar bandar ini memerlukan pembelaan secara langsung. Jadi kalau boleh menerusi Rancangan Malaysia Kelapan ini dan tidak tunggu hingga Rancangan Malaysia Kesembilan. Laksanakanlah mana-mana program untuk luar bandar ini, berilah tumpuan, berilah kewangan yang lebih kepada Kementerian Luar bandar supaya dapat dilaksanakan matlamat yang kita idam-idamkan.

Dengan ini saya mohon menyokong.

**Timbalan Yang di-Pertua [Dato' Haji Muhamad bin Abdullah]:** Ya, Pokok Sena.

5.15 ptg.

**Tuan Haji Mahfuz bin Haji Omar [Pokok Sena]:** Terima kasih Tuan Yang di-Pertua, kerana memberi peluang kepada saya untuk turut mengambil bahagian dalam perbincangan Kajian Separuh Penggal Rancangan Malaysia Kelapan. Terima kasih kepada Yang Berhormat bagi Kinabatangan bagi kredit kepada saya mengisytiharkan saya buat kerja, terima kasih. Dan saya minta kalau boleh Pak Lah tolong tengok mana-mana yang patut Setiausaha Parlimen tidak ada portfolio, tidak ada kementerian kah, bolehlah....

**Timbalan Yang di-Pertua [Dato' Haji Muhamad bin Abdullah]:** Cukup Yang Berhormat.

**Tuan Haji Mahfuz bin Haji Omar:** ....Tetapi saya tolong rekomen lah kepada Pak Lah, insya-Allah dan pada Yang Berhormat bagi Shah Alam jugalah Tuan Yang di-Pertua sebab tadi pun ada gaya jawapan dia sebagai seorang Menteri... [Beberapa Ahli ketawa]

**Dato' Ir. Mohd Zin bin Mohamed:** [Bangun] [Berjalan keluar Dewan]

**Tuan Haji Mahfuz bin Haji Omar:** Hah! Jadi ada gayalah! Saya pun ...

**Puan Fong Po Kuan:** Gaya sahaja!

**Tuan Haji Mahfuz bin Haji Omar:** ..rasa tengok seronok juga kawan-kawan ini berebut bangun hendak tunjuk pada Pak Lah itu, supaya mendapat tempat di lubuk hati Pak Lah itu...

**Timbalan Yang di-Pertua [Dato' Haji Muhamad bin Abdullah]:** Ya, teruskan Yang Berhormat, terus kepada tajuk.

**Tuan Haji Mahfuz bin Haji Omar:** ....[Ketawa] Baik, terima kasih. Jadi hari ini hari kita marhaban. Semua berpakat duduk marhaban, puji Tun yang sudah bersara dan hari ini juga marhaban puji Pak Lah dan sebagainya. Itu saya ucapkan terima kasih kepada rakan-rakan saya.

Dalam membahaskan Kajian Separuh Penggal Rancangan Malaysia Kelapan ini, saya sangat bimbang kalau melihat kepada Kajian Separuh Penggal Rancangan Malaysia Kelapan ini seperti mana yang juga disebut oleh Yang Berhormat bagi Gua Musang tentang pencapaian bumiputera khususnya dalam pemilikan kekayaan bumiputera di mana kalau kita lihat bahawa pencapaian bumiputera ini masih jauh daripada *target* yang telah pun diletakkan di dalam pelaksanaan Dasar Ekonomi Baru iaitu untuk kita mencapai sebanyak 30% sedangkan di dalam Kajian Separuh Penggal ini angka itu hanyalah terletak pada 18.7% sahaja.

Ini menunjukkan bahawa ada permasalahan di dalam pelaksanaan perjalanan Dasar Ekonomi Baru yang kemudiannya di sambung di dalam DPN atau Dasar Pembangunan Nasional yang diteruskan kemudian daripada itu. Jadi oleh sebab itu saya meminta supaya pihak kerajaan dapat melihat perkara ini sebagai satu perkara utama sebagai satu perkara penting untuk kita mencari, di manakah sebab-sebab permasalahan utama yang menyebabkan kegagalan kepada pencapaian Dasar Ekonomi Baru ini khususnya kepada pemilikan kekayaan kepada bumiputera. Sebab kalau kita lihat dalam konteks agihan pendapatan umpamanya, kita lihat bahawa walaupun agihan pendapatan rakyat itu sudah bertambah hasil daripada k-ekonomi ini tetapi jurang perbezaan pendapatan antara kaum jelas begitu merebak khususnya untuk kaum bumiputera.

Kita melihat bahawa pendapatan purata bulanan bagi isi rumah orang-orang Cina adalah 1.8 kali lebih tinggi berbanding dengan orang bumiputera. Begitu juga pendapatan isi rumah untuk orang India ialah 1.28 kali lebih tinggi daripada kaum bumiputera.

Ini menunjukkan bahawa ada permasalahan di dalam kita hendak mengendalikan program pembangunan, dalam hendak menterjemahkan Dasar Ekonomi Baru untuk memberikan hasil yang lebih baik kepada pencapaian atau *target* yang kita letakkan sebanyak 30% untuk kita capai bagi kaum bumiputera.

Saya hendak mempersoalkan dan hendak membangkitkan soal-soal yang berkaitan dengan cara kita mengendalikan dalam usaha untuk memberikan sesuatu kepada kaum bumiputera tidak kita buat secara yang lebih telus dan secara yang lebih bersih kerana ia lebih berlegar kepada persoalan amalan-amalan kroni yang kita tidak memilih kepada mereka itu yang benar-benar mempunyai kelayakan merit yang berasaskan kepada kelayakan, kebolehan tetapi kita lebih kepada merit sebagai kepentingan-kepentingan politik khususnya pada pihak UMNO dan Barisan Nasional. Dan akhirnya kita lihat bahawa mereka ini gagal dalam memenuhi harapan dan impian Dasar Ekonomi Baru itu sendiri kerana mereka bukanlah sebagai seorang ahli perniagaan yang *genuine* tetapi mereka adalah ahli-ahli perniagaan yang hanya berasaskan kepada merit ataupun keupayaan politik semata-mata.

Jadi sebab inilah antara yang menyebabkan punca kegagalan dan pemberian kepada mereka itu lebih dipengaruhi oleh amalan-amalan yang tidak telus seperti mana yang saya sebut tadi termasuklah juga sampai kepada peringkat timbulnya amalan-amalan rasuah. Paling, paling, paling mudah untuk kita lihat dalam pencapaian, paling dekat ini ialah dalam pemberian kontrak kepada makmal komputer umpamanya. Jelas menunjukkan bahawa diberikan kepada syarikat yang bukan mempunyai kelayakan yang cukup untuk mengendalikan projek-projek yang sedemikian rupa. Akhirnya kita lihat projek ini gagal dan bumiputera juga tidak mendapat apa-apa hasil daripada kepentingan untuk kita mengisi baki daripada 18.7% lagi yang sepatutnya kita penuhi untuk mencapai Dasar Ekonomi Baru.

Yang Berhormat bagi Kubang Pasu sewaktu membentangkan Kajian Separuh Penggal ini sewaktu masih lagi menjadi Perdana Menteri menyatakan bahawa kita akan kembali kepada projek yang berasaskan tender terbuka tidak lagi kepada tender runding kecuali dalam kes-kes yang tertentu. Inilah ungkapan-ungkapan yang sering diungkapkan apabila timbul masalah, kita akan katakan kita akan kembali kepada tender terbuka kecuali kes-kes tertentu tetapi hasil akhirnya kita akan lihat bahawa semua projek akan jadi kes-kes yang tertentu. Semua pengagihan dan pemberian itu diletakkan dalam kes-kes yang tertentu dan akhirnya kita lihat bahawa bukan lagi kepada merit keupayaan, kebolehan dari berbagai-bagai sudut tetapi berasaskan kepada kepentingan politik.

Jadi oleh sebab itu kita lihat bahawa kegagalan dalam mencapai Dasar Ekonomi Baru ini merupakan satu perkara yang harus dilihat secara yang lebih bersungguh-sungguh oleh pihak kerajaan. Perkara kedua yang saya hendak sebut dalam kes kegagalan pencapaian dalam Dasar Ekonomi Baru ini adalah kerana dasar kerajaan yang sering berubah-ubah dengan lebih melihat kepada kepentingan pelabur-pelabur asing daripada pelabur-pelabur khususnya syarat baru pelaburan kepada industri pembuatan sudah diberikan 100% kepada pelabur-pelabur asing. Walaupun ada ungkapan daripada pihak Menteri bahawa ianya tidak akan menjejaskan kepentingan bumiputera tetapi bagi saya bahawa ini sangat jelas apabila kita memberikan sepenuhnya pemilikan, 100% untuk pelabur-pelabur asing dengan tidak memberikan kuota kepada bumiputera, ini bermakna bahawa jurang perbezaan itu akan makin jauh khususnya kepada bumiputera.

Begitu juga syarat pegangan bumiputera untuk syarikat-syarikat yang tersenarai di BSKL umpamanya dengan syarikat-syarikat asing ini. Dahulunya kita masih meletakkan bahawa 30% dan apabila disenaraikan, kalau ia dijual maka boleh diganti dengan 30% yang lain tetapi syarat baru yang diletakkan oleh kerajaan hari ini dengan melonggarkan dan dengan memberikan lebih banyak kemudahan dan peluang kepada pelabur-pelabur asing dengan meletakkan bahawa syarat apabila bumiputera menjual selepas disenaraikan 30% itu akan hilang tidak perlu diganti dan ini akan menjadikan bahawa pemilikan kekayaan negara kita ini akan dimiliki oleh pelabur-pelabur asing atau oleh orang-orang yang di luar daripada negara kita. Apatah lagi bagi saya bahawa sebahagian besar daripada syarikat-syarikat yang tersenarai di BSKL ini ialah syarikat-syarikat yang terlibat dalam sektor yang strategik.

Adalah tidak wajar apabila sektor-sektor yang strategik ini kita berikan laluan dan peluang yang begitu besar untuk dimiliki oleh syarikat-syarikat asing, oleh pelabur-pelabur asing yang akhirnya akan menjejaskan yang berkaitan dengan soal kepentingan rakyat dalam negara kita daripada berbilang kaum dan khususnya kepada golongan bumiputera dan ini juga akan memberikan kesan kepada soal keselamatan di sudut politik di dalam negara kita ini.

Jadi, bagi saya bahawa ini antara punca-punca yang menyebabkan kegagalan kepada kita untuk mencapai Dasar Ekonomi Baru untuk memenuhi impian yang dibuat oleh Almarhum Tun Abdul Razak satu ketika dahulu untuk merapatkan jurang perbezaan antara kaum di dalam negara kita ini. Sebab itu bagi saya bahawa kalau kita lihat pula secara yang lebih spesifik, umpamanya di kalangan masyarakat Melayu di Pulau Pinang iaitu negeri Perdana Menteri kita yang kelima ini.

Ini juga satu perkara yang harus dilihat secara yang bersungguh-sungguh kerana bagi saya ungkapan yang pernah diungkap oleh bekas Perdana Menteri kita iaitu Yang Amat Berbahagia Tun, Yang Berhormat bagi Kubang Pasu bahawa masyarakat Pulau Pinang dilihat khususnya di sebelah pulau di Tanjung Tok Kong, seolah-olah kehidupan mereka seperti mana sebelum daripada Perang Dunia Kedua.

Ini satu ungkapan yang sangat menggambarkan bagaimana kesusahan, keperitan, kepayahan kehidupan kepada masyarakat Melayu Pulau Pinang yang satu ketika dahulu Perdana Menteri kita sekarang ini juga merupakan Pengerusi Perhubungan UMNO, pernah mengetuai Yayasan Bumiputera Pulau Pinang, Jawatankuasa Pemandu Bumiputera Pulau Pinang tetapi kita lihat bahawa masyarakat Melayu Pulau Pinang masih gagal untuk dikeluarkan daripada permasalahan kehidupan, kesempitan kehidupan mereka sehingga sebahagian daripada mereka terpaksa mengambil jalan untuk lari keluar pergi mencari tempat-tempat lain di luar Pulau Pinang untuk mencari sumber pendapatan ataupun mencari makan dan sebagainya.

Ini menunjukkan bahawa jeritan batin masyarakat Melayu Pulau Pinang ini terus menjadi satu jeritan yang tanpa diterjemahkan, jeritan tersebut dalam bentuk pelan tindakan yang benar-benar praktik. Apa yang dilakukan oleh UMNO dan Barisan Nasional kepada Melayu Pulau Pinang selama ini hanyalah merupakan yang bersifat retorik. Puluhan, ratusan saya rasa simposium yang berkaitan dengan masyarakat Melayu Pulau Pinang tetapi masih tidak mampu untuk mengeluarkan mereka daripada permasalahan kemiskinan, permasalahan kesusahan, kepayahan peluang untuk mereka memiliki perumahan dan sebagainya.

Ini harus dilihat bahawa permasalahan yang kita hadapi, yang berkaitan dengan usaha untuk kita pastikan supaya Rancangan Malaysia Kelapan ini benar-benar boleh sampai kepada sasarannya termasuklah kepada golongan bumiputera dalam negara kita ini. UMNO tidak seharusnya menyalahkan kepada pihak yang lain. Saya juga agak terkejut apabila Yang Berhormat bagi Kubang Pasu sewaktu diwawancara oleh akhbar *The Star* dalam lebih kurang sebulan ataupun dua bulan yang lalu, apabila ditanya sepanjang Yang Amat Berhormat menjadi Perdana Menteri, 22 tahun ini, dilihat Melayu tidak maju, Melayu mundur. Kenapa? Apa puncanya? Dia menyebut bahawa puncanya ialah PAS.

Bagi saya ini tidak seharusnya kita hendak menyalahkan kepada mana-mana pihak parti pembangkang khususnya. Kita tidak pernah bergerak untuk membawa masyarakat ini kepada tidak maju ataupun kepada kemunduran tetapi persoalannya saya harap kerajaan di bawah kepimpinan yang baru ini harus mencari jalan bagaimana, di manakah kelemahan, di manakah kesilapan dalam kita hendak mengendali, dalam hendak membangunkan masyarakat bumiputera, sama ada di seluruh negara kita, ataupun khususnya di negeri yang diketuai oleh Perdana Menteri kita yang baru sekarang iaitu di Pulau Pinang.

Jangan kita hendak menyalahkan kepada parti pembangkang. Parti Pembangkang tidak berhasrat untuk hendak memundurkan, mengebelakangkan penduduk-penduduk ataupun masyarakat bumiputera dalam negara kita tetapi apa yang harus dilihat oleh kerajaan ialah pengendalian program pembangunan yang benar-benar dapat sampai, dapat memenuhi kepada kelompok-kelompok sasaran yang terdapat di dalam negara kita khususnya kepada masyarakat bumiputera Pulau Pinang itu sendiri dan juga masyarakat bumiputera secara keseluruhannya.

Begitu juga ingin saya sebut di sini yang berkaitan dengan soal kepentingan bumiputera ini, iaitu isu penyenaian FELDA di BSKL. Pada saya masih menjadi satu tanda tanya, walaupun hasrat yang digambarkan sebagai hasrat murni untuk memberikan peluang penyertaan kepada peneroka-peneroka FELDA yang kebanyakannya ialah bumiputera dalam pemilikan kekayaan ini tetapi yang saya bimbang ialah kesan daripada penyenaian ini yang menyebabkan tidak ada satu badan yang benar-benar boleh menjaga kepentingan peneroka.

Sebab saya difahamkan bahawa seluruh kepentingan-kepentingan FELDA itu akan dimiliki di bawah Felda Holding. Saya bimbang apabila disenaraikan Felda Holding nanti - saya difahamkan bahawa Felda Holding ini juga kemudiannya pengagihan lebih kurang 70% ataupun 80% itu akan diberikan kepada individu-individu. Saya difahamkan sudah ada lima, enam individu. Yang paling saya bimbang sekali ialah apabila saya bertanya, Kementerian Tanah dan Pembangunan Koperasi tidak begitu tahu banyak tentang soal penyenaian FELDA ini. Ia lebih diperkatakan, dipercakapkan oleh Kementerian Kewangan.

Walaupun Setiausaha Parlimen menggeleng kepala... *[Ditujukan kepada Yang Berhormat Timbalan Menteri Tanah dan Pembangunan Koperasi]* Tetapi saya percaya bahawa... *[Ketawa]* Kalau ditanya secara *detail* nya soal penyenaian FELDA di BSKL ini, saya percaya bahawa Setiausaha Parlimen Kementerian Tanah dan Pembangunan Koperasi juga tidak boleh menjawab sebab saya difahamkan bahawa ia dikendalikan sepenuhnya oleh Kementerian Kewangan. Seolah-olahnya ada orang-orang yang tertentu di Kementerian Kewangan ini untuk mengaut kepentingan daripada penyenaian FELDA.

Akhirnya saya bimbang nanti bahawa yang ruginya ialah masyarakat FELDA yang tidak akan memperoleh apa-apa, khususnya peneroka FELDA yang tidak akan mendapat perolehan apa-apa kepentingan daripada penyenaian, sebab ia disebut hanya lebih kurang 20%. Itu pun dibahagikan dengan kakitangan FELDA dan juga peneroka.

Menteri Tanah dan Pembangunan Koperasi sebut 30% tetapi bila saya *check* dengan Kementerian Kewangan, sebenarnya bukan 30%. Ini menunjukkan bahawa Menteri Tanah dan Pembangunan Koperasi sendiri pun tidak tahu macam mana proses-proses penyenaian FELDA ke BSKL yang hendak dibuat oleh kerajaan.

Kita mengharapkan bahawa dalam penyenaian FELDA ke BSKL ini akan benar-benar boleh memberikan kepada kepentingan negara dan juga kepentingan rakyat bukan

nanti akhirnya Felda Holding ini akan menjadi milik individu, beberapa kerat pemimpin-pemimpin UMNO yang saya percaya sudah disenaraikan lima, enam orang untuk diagihkan selepas beberapa tempoh, maka ia akan diagihkan seperti mana BERNAS, bila dimasukkan di BSKL akhirnya menjadi pemilikan individu dan sebagainya. Ini yang dibimbangkan. Akhirnya kita lihat masyarakat Pak Tani tidak mendapat apa-apa keuntungan, kepentingan daripada penyenaian BERNAS di BSKL. Samalah ini yang dibimbangkan oleh peneroka FELDA apabila nanti ia disenaraikan di BSKL, maka peneroka FELDA tidak akan dapat memperoleh banyak kepentingan.

Kemudian, Tuan Yang di-Pertua, usaha untuk kita membangunkan sektor pertanian ini, saya lihat bahawa tidak begitu bersungguh-sungguh dalam usaha untuk kita membangunkan sektor pertanian. Malah kalau kita lihat bahawa sasaran pertumbuhan sektor pertanian telah diturunkan daripada 3.0% setahun kepada hanya 2.0% sahaja. Ini diturunkan sasarannya. Ini menunjukkan bahawa komitmen kita dalam sektor pertanian ini tidak begitu tinggi, khususnya kepada sektor pertanian pemakanan yang ada kaitan dengan soal sekuriti, soal keselamatan kepada negara dan juga kepada masyarakat dalam negara kita ini.

Jadi, oleh sebab itu saya hendak mempersoalkan tentang usaha bersungguh-sungguh kerajaan dalam hendak membangunkan sektor pertanian khususnya pada padi ini, yang akan menghasilkan beras yang menjadi makanan utama kepada masyarakat dan rakyat dalam negara kita ini. Kalau kita lihat bahawa hari ini kita masih banyak bergantung sebahagiannya kepada beras daripada luar, beras yang diimport daripada Thailand, daripada Vietnam dan daripada mana-mana negara lain.

Saya minta kerajaan supaya benar-benar berusaha untuk mengurangkan kebergantungan kita kepada beras daripada luar untuk memberikan fokus yang bersungguh-sungguh kepada industri padi di negara kita supaya Pak Tani kita ini akan memperoleh keuntungan yang besar, seperti mana Jepun saya difahamkan. Jepun begitu ketat dia punya dasar dan polisinya sehingga sukar dan sulit untuk beras luar masuk ke dalam negara mereka, kerana kepentingan Pak Tani dalam negara mereka lebih diutamakan.

**Timbalan Yang di-Pertua [Dato' Haji Muhamad bin Abdullah]:** Jam sudah 5.30, Yang Berhormat.

**Tuan Haji Mahfuz bin Haji Omar:** Sambung besok.

**Timbalan Yang di-Pertua [Dato' Haji Muhamad bin Abdullah]:** Ada dua minit lagi. Sambung esok.

**Tuan Haji Mahfuz bin Haji Omar:** Boleh saya terus?

**Timbalan Yang di-Pertua [Dato' Haji Muhamad bin Abdullah]:** Tidak bolehlah, kita sudah habis.

**Tuan Haji Mahfuz bin Haji Omar:** Sambung besok, ya.

**Timbalan Yang di-Pertua [Dato' Haji Muhamad bin Abdullah]:** Ya.

**Tuan Haji Mahfuz bin Haji Omar:** Terima kasih, Tuan Yang di-Pertua.

**Timbalan Yang di-Pertua [Dato' Haji Muhamad bin Abdullah]:** Esok Yang Berhormat sambung dua minit lagi.

Ahli-ahli Yang Berhormat, Dewan kita ditangguhkan hingga jam 10.00 pagi esok.

***Dewan ditangguhkan pada pukul 5.30 petang.***